

JESUCRISTO PIA PEXEINYA DIWESI JUME TATSI LUCAS PETINAE DIWESI

Meje po diwesi yabara xua Lucas tamropata pitaba poxonae tina

1 ¹Jaco Teófilo. Ponxaem nentũ cui xanepanaein, cata tinatsi. Pinmonae bayatha xuya cou tina diwesi Jesús yabara, xua ichamonae cou paeba, xua pinae Jesús poxonae xanepanaya popona pata xantha. ²Pomonae cou xua baxua pepaebixae barapomonae pinae copiya yatsicaewa tane daxita pocotsiwa Jesús exana pata xantha. Matautano pinae barapomonae Nacom Pejume Diwesi tatsi cuidubeiba. ³Xan netsita wũnae daxota nanta xeinan xua yabara tayainyabiwa pomonae petinaexae yawa pecueicueijeixae daxita barapo diwesin xua pinae juinya Jesús exana. Bapoxonae cuita cata tinapoinchi Teófilo jinya neyaputaenexa tsane daxita pocotsiwa Jesús exana juinya xua copiya tsoponae xuano xua bapoxonae tsoponaeno. ⁴Baraxua cata tinatsi jinya neyaputaenexa tsane barapo pexainyei jume po coyene ichamonae bayatha cacuiduba.

**Meje yabara poxonae matatsunpin wũnae yabara tsiwũnae
paeba xua Juan naexanaena pon jiwi Pebautisabin tsane**

⁵Caena bayatha poxonae Herodes popona Judea nacuatha, xua pon Judea nacuapiwi peyanacua ewatsinchi, bapoxonaerũ barichi popona barapo nacuatha sacerdotepin pon pewũn Zacarías. Bapon jiwana po sacerdotepiwi pia matabũxũ jiwi pewũn Abías. Piseuri tatsi pewũn Isabel. Piseuribe pia pamo susato jiwanaepin tatsibe, bapon pewũn Aarón pon yatsicaya tabũ ducua sacerdotepin. ⁶Piseuribe Nacom tsita jũntũ coyene xanepanatsibe xua bara xanepanaya peexanaewabe. Pocotsiwa Nacom pon jiwi Pecanamataxeinaein, nacana jume diwesi itoroba baxua itapeta beta exaneibabe. Daxota jopa yabara paebeibichibe jiwi po coyene xua baponbe natsiaenae cuentabe xua abe peexaneibiwabe. ⁷Ichitha pexui

jopa xeinaeyobe, tsipei Isabel mawecowa, matautano tsipei bayatha acuewa iru tsipei pebin bayatha amo tsecae.

⁸Caentacabi poxonae Zacarías ɸ pia matabuxu jiji pia cuitha exana Nacom nexa, bapon Zacarías xuya piamonae itapetatsi. ⁹Barapomonae sacerdotemonae, pia cui coyene xeina xua caein piamonae jiwana itapetatsi poxonae daxita barapomonae nacuita Nacom pon jiji Pecanamataxeinaein pin pia botha tatsi. Bapon Zacarías itapetatsi xua pejoniyaenexa po tutu peainya cui tutu Nacom pin pia botha po tututha ichaxota exaneiba xua Nacom nexa. Barapo tututha Zacarías tauta petuxusi exanaenexa Nacom nexa xua Nacom peitorobixae. ¹⁰Poxonae Zacarías cataunxuae tuxusi exanawiya petuxueiwa xua tauta Nacom nexa, barapoxonae daxita pomonae aisowa beumeinya barapomonae Nacom tsipaebompa. ¹¹Bapoxonae Zacarías tsita naitutatsi matatsunpin pon Nacom pon jiji Pecanamataxeinaein itoroba. Po muxunene pecoxa weya matatsunpin iboto caquita uncua po ibotha xua ichaxota tauteiba petuxueiwa Nacom nexa. ¹²Poxonae Zacarías taeba matatsunpin jopa yaputaeyo xua peexanaewa, bichocono pejunuwixae. ¹³Ichitha matatsunpin Zacarías baraichi, jeichichi: —Zacarías, jopa junuwinde. Nacom bara cajume tane poxonae tsipaebibame bapon. Methaunxuae jinseuri Isabel tanaexanaeinchi pexuyo. Jinseuri cata pabetsina pebin wuto. Xam wun dutsiname bapontha, po wun Juan, jei. ¹⁴Juntɸ coyene weiweinaename. Barichi pinmonae juntɸ coyene weiweinaena xua bapon penaexanaexae tsane. ¹⁵Bapon Juan Nacom pon jiji Pecanamataxeinaein tsita ainya cui tsainchi. Bapon peatsaxae mera jopa apae tsane. Vino mera jopa apae tsaneno. Poxonae cataunxuae butiyotha eca bichocono juntɸ coyene yucaeinchi Nacom pia Pejumope tɸnaxɸ tatsi pia peayapusɸwa tatsi. ¹⁶Bapon cana exanaena xua ainya Israel nacuapiwi jume cowuntsina Nacom pon Pecanamataxeinaein jiji xua barapomonae barapo Nacom pia Nacom tatsi tsainchi. ¹⁷Juan tsiwanaya poponaena xua pon xua Nacom itorobina bapon tsiwanaya poponaeinchi. Juan xeinaena Nacom pia Pejumope tɸnaxɸ tatsi pia peayapusɸwa tatsi icha cain Elías ichi pon Nacom peitorobi jume pepaebin. Bapon Elías bayatha tɸpa. Juan exanaena xua pexui paxeiwi antobe tsaibi tsainchi. Matautano Juan cana exanaena xua jume cowuntsina Nacom pomonae copiya Nacom pejumefebiwichi. Tsipei exanaena baxua, barapomonae tsiwanaya jume cui yabara najuntɸ coyene wɸnaetsina, xua barapomonae pejume cowuntsinexa Nacom pon Pecanamataxeinaein jiji, jei matatsunpin.

¹⁸Zacarías yainyaba matatsunpin, jeye:

—¿Eta nejumichim yatsicaewara xua inta naexanaena pexuyo? Apara xan amo tsecae. Iru tapetsiriwa aparta inta acue tsecae, jei.

¹⁹Matatsunpin Zacarías jume notatsi, jeye:

—Apara xan Gabriel. Barapara Nacom ba imoxoyo caquita uncueiban. Nacom neitoroba bepara catsipaebichei barapo pexeyna jume diwesi.

Daxota yatsicaya naexanaenaba nexanto. ²⁰Incane jume taema. Yaitama jame maisa aunxuae jopa yabara nejume cowuntsim, daxota methaunxuae jopa cuinaya paebim tsane. Yajume aunyeibiya yantacabi jopaename poxonae beya abu nexanto naexanaena xuaunxuae catsipaebatsi, jei.

²¹Poxonae Zacarías tsipaebauyatsi, Zacarías pesato beya ewatumeinchi pomona Nacom tsipaeba pesatotha. Barapomona nabarai: “¿Eta pocotsiwa metha Zacarías came jopa jondenaeyo Nacom pin pia bo werena?” najei. ²²Poxonae Zacarías matapainya jondena jopa itacupaetsi xua petsipaebiwa barapomonaetha. Bapoxonae barapomona nanta xeina xua metha bara Zacarías tsita naitutatsi xua wuna barapo tututha poxoru Zacarías pecobetha cowai barapomonaetha. Ichitha awiya came jopa cueicueijeiyoy.

²³Poxonae Zacarías daxita nacobe weta xua exana Nacom nexa, Nacom pin pia botha, bapoxonae pia botha pona. ²⁴Pirapaeyo Zacarías piseuri tatsi Isabel bupana taecatsi pexuyo. Barapowa jopa naitutsiyo cinco po xometiyobe. Saya pia botha eca. ²⁵Barapowa nabarai, jeye: “Baxua Nacom inta exana pon Tanecanamataxeinaein. Bapon baxua inta exana xua jiwi jopa aura tana neexanaewa tsane”, najei bapowa.

Meje yabara poxonae matatsunpin wuna tsiwanaya paeba xua Jesús naexanaena

²⁶Poxonae Isabel seis po xometiyobe yapucaewa poxonae pexuyo bupana taecatsi, bapoxonae Nacom itoroba matatsunpin, pon pewun Gabriel. Gabriel Nazaret tomara beitorobiyatsi po tomara eca Galilea nacuatha. ²⁷Gabriel patopa pesiwa ponaenexa yabuyo, powa bapana jopa pebin pichiyo. Bapowa muxu pepichi pecotsiwa, pon pewun José. Bapon José David pia pemomoxi susato jiwana tatsi. Caena bayatha David Israel nacuamona itorobiya pia pepa peewatsinchi. Barapowa powa José pecotsiwaxae tatsi pewun María. ²⁸Matatsunpin Gabriel, patopa ichaxota María eca. Gabriel barai, María baraichi, jeye:

—María jaco. Nacom itapeta cayabara tsita juntu coyene xanepanatsi beyacaincha icha yabuxi. Matautano barapara Nacom pon jiwi Pecanamataxeinaein cabaru popona, jei matatsunpin.

²⁹Ichitha poxonae jume taeba bapowa, yabara jume cuitaya nabenaeca. Pia coutha nayainyaba jeye: “¿Eta xua bapon nejacoba jane?” najei.

³⁰Matatsunpin María baraichi, jeichichi:

—María, jopa junuwinde, Nacom cayabara tsita juntu coyene xanepanatsi. ³¹Matha taema xam methaunxuae pexuyo yapurawa jinaename xuano bara pabetsiname nexanto. Bapoyo wun dutsiname po wun Jesús. ³²Bapon ainya cui peexanaeinchi tsainchi. Bapon wun dutinchi, icha wun jei tsainchi: ‘Nacom Pexanto tatsi pon peitabocotha eca’, jei tsainchi. Nacom pon Pecanamataxeinaein jiwi, bapon pexanto

cana exanaena xua bapon jiwi itorobiya pia pepa Peewatsinchi tsane icha matha David cana ichichi, pon Jesús pia pamo susato jiton tatsi. ³³Bapon yacui tsitecaena xua jiwi peewatsinchi penaexanaewa tsane Israel piamonae susato saineiwi pexantha tatsi. Pia peitorobi coyenewa tatsi jopa weraweracae tsane, jei Gabriel, pon matatsunpin.

³⁴Nexata María jume nota matatsunpin, jeye:

—¿Eta xua yapurwa jinocuaein pexuyo? Apará cataunxuae jopa nacueyabinyo, jei María.

³⁵Matatsunpin jume nota, jeye:

—Nacom pia Pejumoepo tñaxu tatsi cata patopeicaena. Matautano Nacom pon bichocono pepa pejuntú coyene xanepanaein bapon, pia peayapuswa tatsi cantatsun matawacaicha nontsicaena icha be tsaquinaebowa ichi tsane. Daxota po pexuyo naexanaena, barapo pexuyo Nacom tsita juntú coyene xanepanaeinchi. Barapo pexuyo yabara jei tsainchi: ‘Nacom Pexanto tatsi’, jei tsainchi. ³⁶Irurá barichi jinyamonaewayo Isabel, bequein bara acue tsecae, ichitha anoxuae pexanto yapurwa jina. Anoxuae barapowa seis po xometiyobe yapucaewa xua yapurwa jina bequein copiya mawecowa. ³⁷Dapocotsiwa aibi pocotsiwa Nacom tsita ayapubetsi, tsipei bapon daxita bara yaputane.

³⁸Nexata María namchi, jeye:

—Xan bara barapowayun xua taexanaewayon pocotsiwa Nacom pon jiwi Pecanamataxeinaein neitoroba. Bú moya bara Nacom inta exanaena xuaunxuae netsipaebame, jei María, matatsunpintha.

Bapoxonae matatsunpin napitaba.

Meje yabara poxonae María siwa pona, xua Isabel siwa poinchi

³⁹Pirapaeyo María nainya pontaba tomara beya, po tomara eca ichaxota ira marafowoa xua Judea nacuatha. ⁴⁰Baxota barapowa María joniya Zacarías pia botha tatsi. Bapoxonae Isabel jacobatsi. ⁴¹Poxonae Isabel jume tane xua María jacobá, bapoxonae pia pexuyo tsiperu natsixibecatsi Isabel. Bapoxonae Nacom pia Pejumoepo tñaxu tatsi pia peayapuswa tatsi Isabel juntú coyene yucatsi. ⁴²Bapoxonae Isabel jume daunweya wawai xua María baraichi, jeye:

—iNacom cayabara tsita juntú coyene xanepanatsi beyacaincha icha yabuxi! iBarichi nexanto Nacom yabara tsita juntú coyene xanepanatsi!

⁴³iXam powa Tanecanamataxeinaein pena tatsim, bichocono auran xua tana nesiwa ponaewam tsipei jopa taainya cuiwayon! ⁴⁴Poxoru poxonae cajume tainchi xua nejacobame bapoxonae pexuyo netsiperu weiweinaya natsixibeca. ⁴⁵Juntú coyene weiweiname nejume cowuntsixae tsipei bara nayabara jume cui wetsina pocotsiwa Nacom pon jiwi Pecanamataxeinaein yabara catsiwnae muxu duta pon Pecanamataxeinaein jiwi xua poxonae matatsunpin catsipaeba, jei Isabel.

- 46 Nexata María namchi, jeye:
 “Tajüntü coyene Nacom wūnae jaintatsi
 pon jiwi Pecanamataxeinaein.
- 47 Matautano tajüntü coyene Nacom yabara
 weiweinatsi pon Tanecapanepaein.
- 48 Nacom neweyatane xua xan saya tapawin.
 Bara barapowayun, powayun xua
 taexanaewa pocotsiwa Nacom neitoroba.
 Anoxuae xuano bexa tsaneno daxita jiwi pomonae
 naitapataya naexanaponaena wūnae nejainchina
 tsipei Nacom nejüntü coyene weiweina
 exana bichocono beyacaincha icha yabuxi.
- 49 Bapon Nacom pon peayapusü itorobi coyene
 pexeinaein inta bichocono wūnae exana.
 Bapon Nacom pepa pejüntü coyene xanepanaein.
- 50 Bapon Nacom yaweneibina jiwi pia peantobewaxae
 pomonaetha pomonae copiya pecunuweibixaetsi.
- 51 Nacom tsita itüba xua peayapusü
 itorobi coyenewa xeina.
 Baxua exana poxonae jüntü coyene amanayaba
 pomonaetha pomonae atsaquiya penayabara
 paebiwí xua ichamonae paebiwíchi.
- 52 Nacom cui pita cana exana pomonaetha pomonae
 pecanamataxeinaewi xua equeicha barapomonae jopa
 naexanae tsane xua pecanamataxeinaewa jiwi.
 Ichitha nama pomonaetha pomonae pecui pawí
 naexana barapomonaetha Nacom cana exana xua
 barapomonae penaexanaewa pomonae
 pecanamataxeinae jiwi.
- 53 Pomonae xua piyain barapomonaetha Nacom cana
 exana xua barapomonae petonsanaewa xua
 penabanaewa po pexaewa pexeinya pexawan.
 Matautano copei pexeinaewi barapomonaetha Nacom
 cana exana xua barapomonae pecobesainaewa.
- 54 Nacom yaweneiba pijimonae Israel nacuapiwi
 pomonae pia pamo susatopin tatsi,
 bapon Israel pon tanacuita Nacom.
 Nacom jopa yabara jüntemainae yo xua
 peyaweneibiwa barapo pijimonae peantobexae.
- 55 Nacom daxita exana pocotsiwa Abraham wamo
 susatopin yabara tsiwūnae muxu dutatsi
 xuano xua yabara tsiwūnae muxu dutatsi pia

pemomoxi susato jiwi tatsi”, jei María.

⁵⁶María cataunxuae acobi po xometiyoibe eca Isabel pia botha tatsi. Bapoxonae equeicha caibe nawiya pia bo beya.

Meje yabara poxonae Juan naexana pon jiwi Pebautisabin

⁵⁷Nexata Isabel xua bupana taecatsi pexuyo, peru cui nauchitane. Bapoxonae pexuyo tanowaeincuatsi xua pexanto. ⁵⁸Pomonae Isabel pia botha petaenaewichi, iruru piamonae tatsi pomonae pecuariya petaenaewichi daxita barapomonae Isabel siwa poinchi xua pejacobinexa tsainchi. Barapomonae yaputane xua Nacom pon Pecanamataxeinaeinxae jiwi Isabel beta taexanatsi poxonae Isabel dacotsiwa taitorobatsi pexuyo. ⁵⁹Poxonae ocho po matabibe yapucaewa barapoxonae pexuyo wi thabatsi xua pebin wutoxae xua ichaxota nareixacaeca. Barapomonae nanta xeina xua pexuyo wun dutsinchi po wun pexuyo paxa tatsi xeina, xua po wun “Zacarías”, jei. ⁶⁰Ichitha pexuyo pena tatsi namchi barapomonaetha, jeye:

—Jume, jame bewa jei: ‘Juan’, jei, jei pexuyo pena tatsi.

⁶¹Bapoxonae barapomonae Isabel baraichi, jeye:

—¿Exua? Jinyamonae dapocotsi wun aibiba, po wun: ‘Juan’, jei, jei barapomonae.

⁶²Nexata barapomonae moya pecobetha cowai Zacariastha. Matautano pecobetha cowaya yainyaba, Zacarías yainyabatsi jeichichi: “¿Eta po wun jinya nexanto wun dutsichi?” jei barapomonae. ⁶³Zacarías wuca napaewa petinaenexa tsane. Bapoxonae barapo napaewatha jei xua tina: ‘Apara pewun Juan’, jei. Bapoxonae barapomonae najuntu coyene benaeca xua iru bapon namchi: ‘Bara pewun Juan’, jei. ⁶⁴Poxonae baxua exana, caena bapoxonae jemeicha Zacarías equeicha caewa paeba. Equeicha ebato sadujei xua cueicueije. Zacarías tamropata pitaba xua wunae jainta Nacom. ⁶⁵Bapoxonae daxita pomonae imoxoyo jinompa ichaxota Zacarías piseuribe poponabe, daxita barapomonae junuwa. Matautano pomonae xua pejinompaewi daxita ichaxota po ira xua marafofowa xua barapo Judea nacuatha, daxita barapomonae paebinouta pocotsiwa xua bayatha petaexae. ⁶⁶Daxita pomonae jume tane, barapomonae najuntu coyene yabara nanta xeina nawita. Matautano caemonae nantiya nayainyaba najei: “¿Eta bichane metha pexuyo poxonae wichabina?” najei barapomonae. Apara poxoru Nacom pon Pecanamataxeinaein jiwi bichocono pexuyo petsita juntu coyene xanepanaexaetsi daxota barapomonae baxua paeba.

Meje yabara xua Zacarías pia wei

⁶⁷Pexuyo paxa tatsi Zacarías, juntu coyene yucatsi Nacom pia Pejumope tunaxu tatsi pia peayapusuwa tatsi. Matautano bapon cueicueije po jumetha po jume Nacom cata. Zacarías namchi, jeye:

- 68 “Nacom pon Pecanamataxeinaein jiwi,
pon Israel pia Nacom tatsi, barabũ
wũnae jainchinchĩ barapo Nacom.
Tsipei bapon bayatha patopeica waxantha.
Bapon bara piamonaetsi.
Matautano bapon bayatha naca capanepa.
- 69 Pon Nacom nacata itorobica bapon pon jiwi
pecapanenebiyaein pia peayapusũwatha.
Bapon David pia pemomoxi susato jiwana tatsi.
Bapon David pon Nacom pia petanacuitinchi xua
peexanaewa pocotsiwa Nacom itoroba.
- 70 Caena bayatha Nacom yabara naca tsiwũnae
muxu duta, poxonae itoroba pia peitorobi jume
petapaebiwichi xua wanaca tsipaebinexa.
- 71 Bara naca tsipaeba xua pinae bapon pon Nacom
wanacata itorobicaexae, pinae naca
capanepaena pomonae wanaca aitaetaebi
jiwi pia xainya weya tatsi.
Matautano pinae naca capanepaena pomonae
wanaca ita aenae-aenei jiwi pia
xainya weya tatsi.
- 72 Matautano Nacom naca tsipaeba xua pinae
wamo susatopiwi yabara canantaxeinaeinchi
xua peyawenaenexatsi.
Matautano pinae jopa jũntemainae tsane
xua wamo susatopiwi peyawenaponaewatsi
xua bayatha Nacom yabara petsiwũnae
muxu dutsixae baxua.
- 73 Baraxua Nacom naca tsiwũnae muxu duta
xua xainyeya bara paeba poxonae Abraham
tsipaebatsi, pon wamo susatopin.
- 74 Nacom Abraham tsipaebatsi xua pinae naca
capanenebiya tsane wanaca aitaetaebi
jiwi weya.
Baxua pinae nacata exanaena xua pinae
waexanaewa tsane pocotsiwa naca itoroba,
xuano jopa wacunuwinexa tsane
ichamonae pinae.
- 75 Matautano nacata exanaena xua pinae beta
jinompaeinchi bapon peitabaratha, xuano xua
jũntũ coyene xeicaeya jinompaeinchi daxita
matabintha xua jopa abe waexanaponaewa.

- ⁷⁶ Irũ xam taxantom Juan jiwi cayabara wũn
dutsina pon Nacom peitorobi jume pepaebin,
pon itabocotha eca, cayabara jei tsane.
Baxua cayabara jei poxoru xam tsiwanaya
patopaename pon jiwi pia pepa
Pecanamataxeinaein.
Daxita jiwi jũntũ coyene wũnaetsiname
pepatopaenexa tsane pon jiwi pia pepa
Pecanamataxeinaein, pon Mesías.
- ⁷⁷ Nacom caitoroba Juan xua jiwi neyaputane
neexanaenexa tsane xua Nacom jũntemainena
jiwi abe pia peexanae cuiru coyenein tatsi.
Bapoxonae Nacom barapomonae capanenebiya
exanaeinchi bapon beya xua jopa Nacom petsita
natsicuentisixaetsi xua abe peexanaexae.
- ⁷⁸ Wanacom jopa juniya wanaca antobexae xuano
xua wanaca yawenaexae nacata itorobicaena
pexanto itaboco wetsica.
Nacata wũnae exanaena icha xometo ichi xua
nacata wũnae poxonae pentha pena matabixae.
- ⁷⁹ Poxonae patopeicaena pon Nacom itorobicaena,
bapoxonae bapon jiwi jũntũ cui
weiweinaya exanaeinchi.
Baxua exanaeinchi, pomonaetha pomonae pejume
cowũntsiwi bequein copiya barapomonae
muxu pewerapae bichocono abe peexanaexae.
Yawa Nacom naca jumope antasũ exanaena,
xua jũntema wajinompaenexa tsainchi”,
jei Zacarías xua pexanto barai pon Juan.
- ⁸⁰ Barapo pexuyo Juan wichabeca. Matautano ajũntũyapusũya
popona xua Nacom yabara yaputaepona. Juan ira xuepana susato
tsurucuae nacuatha tsana popona, beya poxonae po mataqueitha
poxonae Juan tsita patopa Israel nacuapiwi pebautisabinexa
barapomonae.

**Meje yabara poxonae Jesús nowaeuncua pebin
wũto barapo cae pin nacuathe
(Mt 1.18-25)**

2 ¹ Irũrũ bapoxonae popona romanomonae itorobiya pia pepa
peewatsinchi, pon pewũn Augusto. Bapon itoroba piamonae
peexanaenexa censo matawũn xua pewũn tinaewan xua daxita carepaya
tomaran jiwi wũn tinaeinchi. ² Barapo censo matawũn xua pewũn

tinaewan jiwi, baxua matapainya nacobe cui jũta poxonae Cirenio Siria nacuapiwi pia peyanacua ewatsinchi naexana. ³Daxita jiwi tsanaya barompaya pia pepa tomaran bewa benawibiyaena, ichaxota pia pamo jiwi tatsi tanowaeumeinchi. ⁴Daxota José Nazaret tomara wewarapiya, xua Galilea nacua weya. Belén tomara bewarapiya po tomara eca Judea nacuatha. Baraxota caena bayatha David pon judiomonaе itorobiya pia pepa peewatsinchi nacatsiwa, pon José pia pamo jiwi susato jiwana tatsi, pon yatsicaya tabũ ducua. ⁵José pecotsiwa barũ pona pewũn tinaenexa tsainchibe. Barapowa pewũn María. Barapowa pexuyo bũpana taecatsi. ⁶Poxonae cataunxuae baraxota Belén tomaratha ecabe, bapoxonae María xua bũpana taecatsi pexuyo, bara weaperũtanetsiba. ⁷Bara bapowa tanaexanatsi pexanto pon copiya tanacatsiwatsi. Barapo pexuyo paparuwantha tsiwixitha mata quiyontababota jeriyotha, po naeyotha ichaxota vaca naepanaewa xayathopa. Tsipei tutu quecona po bomũxutha ichaxota jiwi maiteiba pomonaе pateiba pomonaе siwa poneiba.

Meje yabara poxonae matatsunpiwi patsica ichaxota pomonaetha pomonaе oveja duweimonaе peyapu eenaewi

⁸Imoxoyo Belén tomaratha, pebiwi oveja duweimonaе yapu eeneiba wexotha poxonae merawi. ⁹Nexata jemeicha barapo pebiwi tsita naitũtatsi matatsunpin po matatsunpin itorobicatsi xua pon jiwi Pecanamataxeinaein itorobica. Matautano Nacom pon jiwi Pecanamataxeinaein pia peitũpanae coicha tatsino barapomonaе matawacaicha uncueicatsi. Barapo pebiwi bichocono junuwa. ¹⁰Nexata matatsunpin barapomonaе baraichi jeye: “Jopa pajunuwinde. Aparapa tsipaebatsi pexeinya jume diwesi xua po diwesi daxita jiwi jũntũ coyene weiweina exanaeinchi. ¹¹Poxoru anoxuae ichowayo tanaexanatsi pexuyo. Barapo pexuyo naexana David pia tomaratha tatsi xua Belén tomara. Barapo pexuyo, pon jiwi pecapanenebiyaеin. Bapon apara pewũn Mesías pon Pecanamataxeinaein jiwi, pon Nacom weitorobicatsi. ¹²Bara barapo pexuyo paca ita cayopitatsi xua pataebotsiname vaca pia boyotha. Pataebotsiname barapo pexuyo xua paparuwatha mata quiontabobotatsi jeriyotha ichaxota po naeyotha vaca naepanaewan xayathopa”, jei matatsunpin.

¹³Bapoxonae jemeicha equeicha icha matatsunpiwi pin bicheito naitũbarũcũpa ichaxota icha matatsunpin uncua. Barapo matatsunpiwi itaboco wepatsica. Barapomonaе Nacom wũnae jaintatsi. Barapo matatsunpiwi namchi, jeye:

¹⁴ “iMaisa bichocono Nacom wũnae jaintatsi pon itabocotha pecaein, peitorobixae pexanto!
iBarabũ jiwi jũntema jinompa barapo irathe pomonaе xua Nacom jũntũ coyene weiweina

exanatsi!” jei matatsunpiwi.

¹⁵Poxonae matatsunpiwi athabe ichicha caibeicha itaboco beicha, bapoxonae pomonae oveja duweimonae peyapu eenaewi barapomonae nabarai, jeye:

—Bũ poinchi Belén tomara beya wataenexa tsane pocotsiwa bayatha Nacom exana, xuano xuaunxuae matatsunpin naca tsipaeba pon jiwi Pecanamataxeinaein nexa, jei barapomonae pomonae oveja duweimonae peyapu eenaewi.

¹⁶Barapoxonae oveja duweimonae peyapu eenaewi nainya ponarũcũpa. Barapoxonae María irũ José caxibarũcũpatsi. Irũ pexuyo poyo boquesa jeriyotha vaca matabotha caxibarũcũpatsi. ¹⁷Poxonae barapomonae taerũcũpa pexuyo, barapomonae tsipaeba nawita ichamonaetha pocotsiwa bayatha barapomonae petsipaebixaetsi matatsunpin xua pexuyo yabara. ¹⁸Daxita pomonae jume taerũcũpa baxua yabara najũntũ coyene cabenaeca xua pomonae oveja duweimonae peyapu eenaewi pepaebixae baxua. ¹⁹María barapo diwesi moya yawũn xeina pejũntũ coyenewatha xua jume cui cayabara nanta exaba. ²⁰Bapoxonae oveja duweimonae peyapu eenaewi caibe nawibiya. Barapomonae Nacom wũnae jaintatsi petaexae xuano pejume taexaeno xua bayatha matatsunpiwi pepaebixae. Barapomonae namchi, jeye:

—Maisa Nacom pon pepa yatsicaewa pejũntũ coyene xanepanaein, jei.

**Meje yabara poxonae María irũ José caponabe
Jesús Nacom pin pia botha tatsi**

²¹Poxonae ocho po matabibibe yapucaewa, pexuyo wi thabatsi, xua pebin wũtoxae xua ichaxota nareixacaeca. Baxua judiomonae pia cui coyenetha tatsi. Barapoyo wũn dutatsi pewũn Jesús, po wũn bayatha matatsunpin wũn unuta xua María muxu tsipaebatsi poxonae María cataunxuae abũ jopa bũpana taecaetsi pexuyo.

²²Nexata matabibi jopa, xua po mataqueitha María irũ José bewa pepon naxanebibe xua sacerdotemonaepin taexanaena be pocotsi coyeneya bayatha Moisés pia peitorobi coyenewa tatsi paeba xua daxota jopa penataxobinexa. Bapoxonae María irũ José pexuyo caponabe Jerusalén tomara beya pecatsinexa tsanebe pexuyo Nacomtha pon jiwi Pecanamataxeinaein xua petsita itapeinya xeinaenexabe xua barapo pexuyo Nacom petanacuichiwa tsainchi poxonae pinyo tsane. ²³⁻²⁴Baxua exana tsipei Nacom pia peitorobi diwesitha tatsi tina, jeyei: “Daxita jiwi pia pexui tatsi, pebin wũtixi, poxi copiya nacatsiwena, bapoxi Nacom itapeta pia taexanaetsi pocotsiwa Nacom ichichipa”, jei Nacom pia peitorobi jume diwesitha tatsi. Yawa ponabe pecaponaenexabe pepupunaein xua pecatsiwa Nacomtha xua sacerdotemonaepin pebexubinexa xua petautsinexa xua petuxusi exanaenexa tsane Nacomtha

María nexa yawa José nexa. Nacom peitorobi coyenewa tatsi jeyei: “Bara iru ainya tsaqueintobe care. Ichacuitha icha tsaqueintobe aibi, bara iru ainya topibotobe care”, jei.

²⁵ Iruru barapoxonae pebin popona Jerusalén tomaratha, bapon pewun Simeón. Bapon pejuntu coyene xanepanaein. Bapon wuna jainteiba Nacom. Bapon wuna ewateiba xua Nacom itorobina pon Israel nacuapiwi pia Pecanamataxeinaein tatsi nexa. Bapon Israel nacuapiwi pu capanepaeinchi romanomonae weya. Barapo romanomonae icha nacua werena pona xua Israel nacuapiwi cueranta enatsi. Tsipei barapo romanomonae Israel nacuapiwi canamataxeinatsi. Nacom pia Pejumope tñaxu tatsi Simeón baru popoinchi. ²⁶ Nacom pia Pejumope tñaxu tatsi Simeón yaputane exanatsi xua pinae copiya taena Mesías pon xua Nacom, pon jiwi Pecanamataxeinaein itorobina. Bapoxonae xua pinae pirapaeyo tupaena. ²⁷ Nacom pia Pejumope tñaxu tatsi Simeón joniya exanatsi Nacom pin pia botha tatsi. Bara José iru pexuyo pena tatsino patopabe Nacom pin pia botha tatsi. Pexuyo capatopabe petacana exanaenexa tsainchibe icha be pocotsi coyeneya Moisés pia peitorobi coyenewatha tatsi itoroba. ²⁸ Simeón isapita pexuyo. Nacom wuna jaintatsino. Simeón namchi, jeye:

²⁹ “Nacom pon Tanecanamataxeinaem,
 bara anoxuae caitacupa xua tanecopatsiwam
 xua bara junte miya tatupaewa tsane.
 Tsipei anoxuae bara nayabara jume
 wetame pocotsiwa bayatha yabara
 netsiwuna muxu dutame.
 Poxoru xan bapon tsocuaein xua
 exanan xua neitorobame.

³⁰ Xan yatsicaewa bara tanba,
 pon Pecapanenebiyaein jiwi.

³¹ Bapon tan pon xua itorobicapaebame,
 xua daxita jiwi taena xua bapon taeinchi.

³² Bapon yaputane exanaena xua Nacom yaputaeinchi
 pomonae jopa judiomonae naexanaeyo.
 Tsipei bapon be bapocotsin, xua poxonae jiwi
 beta tane exainchi merawi xua xota yonoyonei.
 Yawano bapon exanaena xua Israel nacuapiwi,
 pomonae jinyamonae xua wuna jaintinchi
 xua ichamonae wuna jainchina”, jei Simeón.

³³ María iru José yabara najuntu coyene cabenaecabe pocotsiwa Simeón pexuyo yabara paebatsi. ³⁴ Nexata Simeón barai, Nacom baraichi xua María yabara yawano xua José yabara, jeye: “Juntu coyene weiweina exande baraponbe”, jei. Nexata Simeón, María baraichi xua pexuyo pena tatsi:

—Barapo pexuyo Nacom itapeta xua bapon peexanaenexa tsane po coyene xua Israel nacuapiwi ichamonae Nacom beya peponaenexa xua ichacuitha icha ichamonae Nacom beya jopa peponaenexa tsane. Yawa Nacom itoroba barapo pexuyo, peitubinexa Nacom pia peayapuswa ichitha ichamonae jume cui aitaetai tsaibi tsane. ³⁵Daxota barapo pexuyo yaputaena pocotsiwa jiwi pejuntũ coyeneintha nanta xeineibina. Ichitha xam, María, daxita baxuan caajuntũcoyenerewe exanaena be poxonae ichũn canthũthũ tsapinopaena cusitha, jei Simeón xua María tsipaebatsi.

³⁶Irũrũ baxota poponarũ petsiriwa, pewũn Ana. Barapowayo Nacom peitorobi jume pepaebiwayo. Barapowa Fanuel pexantiyo tatsi. Aser pon yatsicaya tabũ ducua bapon pia pemomoxi susato jiwana tatsi. Barapowa bara nama penapataewa tsoponae. Barapowa caena bayatha poxonae penowayo tsecae jitha eca. Pia pebinbe siete po weiyobe nabarũ poponabe. Bapoxonae pebin tũpa. ³⁷Barapowa caena bayatha piseuri cuenta tũpatsi. Anoxuae nama barapowa yaochenta y cuatro po weiyobe jopaba. Barapowa Nacom pin pia bo weya jopa pichapeibiyo. Saya exaneiba pocotsiwa Nacom itoroba merawintha yawa matakabintha. Najainboteibano poxonae tsipaebeiba Nacomtha. ³⁸Poxonae Jesús caponatsi Nacom pin pia botha xua Nacom pecatsinexatsi bapoxonae Ana imoxoyo caquita uncua barapomonaetha. Barapowa tsipaeba Nacomtha, jeye: “Nacom maisa jũntũ coyene weiweinana xua painta itorobame barapo pexuyo”, jei Ana. Bapoxonae Ana yabara paebaxoya pexuyo jiwitha pomonaetha pomonaewũnae ewateiba po coyene xua Nacom itorobina Israel nacuapiwitha pon Israel nacuapiwi capanenebiya exanaeinchi romanomonaeweya.

Meje yabara poxonae Jesusbarũ caibe iyiya Nazaret tomara beya

³⁹Nexata María irũ José wetabeba daxita xua Nacom, pon jiwi Pecanamataxeinaein, peitorobi jume coyenewa paeba. Bapoxonae caibe canawiyabe pexuyo Galilea nacua beya xua pia tomara beyabe, Nazaret tomara beyabe. ⁴⁰Pexuyo wichabeca. Matautano bichocono daunwei nawita, peyaputae coyene xexeinaponano. Nacom tsita jũntũ coyene xanepanapoinchi.

Meje yabara poxonae Jesús siwa pona Nacom pin pia bo tatsi

⁴¹Jesús pena tatsi irũ paxa tatsi daxita weitha poneiba Jerusalén tomara beya xua nataiba Pascua wũn matakabin. Barapo Pascua wũn jei, poxonae Israel nacuapiwi nanta xeina xua poxonae pinae bayatha pia pamo susato jiwi tatsi capanenebiya exanatsi Egipto nacua weya, xua Nacom capanenebiya. ⁴²Poxonae Jesús doce po weiyobe yapu jopa, María irũ José irũ Jesús, Jerusalén tomara be-iyiya. Tsipei barapomonaepia cui xua poneiba barapo Pascua wũn matakabin nexa. ⁴³María irũ José caibe nawirenabe pia tomara

berena poxonae barapo matababin weta. Ichitha pewowin Jesús naruntaba Jerusalén tomaratha. Jesús pena tatsi iru José jopa taeyobe xua Jesús nacopatata. ⁴⁴Nanta xeinabe xua Jesús mexeya itara napunaecaponawe pin bicheitha. Caentacabitha María iru José namtotha naecaponabe, bapoxonae itaxanawiyabe pexanto. Necobauyabe pexanto pin bicheitha pia matabuxuyo jiwimonaetha, pijiwimonaethano. ⁴⁵Jopa pexanto caxinaebe. Bapoxonae equeicha caibe iyabe Jerusalén tomara beya, pwenaweneinexa tsanebe pexanto baxotiya equeicha.

⁴⁶Poxonae acobi po matababiyobe yapucaewa Jerusalén tomaratha baxota pexanto caxinabe Nacom pin pia botha tatsi. Jesús naeca ichaxota pomona jiji pecuidubiwi Nacom pia peitorobi jume. Jesús jume tane barapomona. Matautano yainyabano nawita barapomonaetha. ⁴⁷Daxita pomona jume tane, najuntũ coyene cabenaeca tsipei Jesús peyaputaen tsecae, matautano tsipei Jesús beta jume nota. ⁴⁸María iru José poxonae baxua cui tanebe najuntũ coyene cabenaecabe. María pexanto barai, jeye: —Owae, çeta xua metha baxua painta exaname? Axa iru xan paca yabara najuntũ coyene exabatsibe, paca jeitompatsi, jei.

⁴⁹Jesús jume nota pena, jeye:

—¿Eta pocotsiwa metha ichawa beya pana nejeitompame? ¿Metha bara jopa payaputaem jampa xua bewa necui eenaena xua Taxa pia cui yabara tatsi? jei.

⁵⁰Ichitha María iru José jopa xapain yaputaeyobe pocotsiwa Jesús paeba.

⁵¹Jesús caibe nanawiya pena tatsibarũtha Nazaret tomara beya. Jesús pena jume jejei tsaiibi yawano José jume jejei tsaibichino xua daxita exana pocotsiwa Jesús itorobeibatsi. Jesús pena, daxita baxuan moicha cacui yabara cananta xeineibatsi pejuntũ coyenewatha. ⁵²Nexata Jesús wiwichabapona yawa juntũ coyene ayapusũya exanapoinchino Nacom pia Pejumopetha tũnaxũ tatsi. Nacom iru jiji Jesús antobe tsoponaetsi.

**Meje yabara poxonae Juan pon Pebautisabin jiji
cuiduba ira xuepana susato tsurucuae nacuatha
(Mt 3.1-12; Mr 1.1-8; Jn 1.19-28)**

3 ¹Iruru Tiberio pon romanomona itorobiya pia pepa peewatsinchi tatsi yapu jopa quince po weibe xua itorobiya canamataxeina barapo nacuanthapiwi. Bapoxonae iru Poncio Pilato Judea nacuapiwi peyanacua ewatsinchi naexana. Barichi Herodes Galilea nacuapiwi peyanacua ewatsinchi naexana. Iru Herodes peweicho tatsi Felipe, bapon Iturea nacuapiwi peyanacua ewatsinchi naexana xua Traconite nacuathano. Barichiru Lisania Abilinia nacuapiwi peyanacua ewatsinchi naexana. ²Barichiru Anás iru Caiús baponbe sacerdotemona pia pepa pentacaponaeinbe tatsibe. Barapoxonaeru Nacom Juan tsipaebatsi poxonae ira xuepana susato tsurucuae nacuatha popona. Juan bapon Zacarías pexanto tatsi. ³Juan popona ducuaeta Jordán nacuatha

ichaxota Jordán mene. Nacom Pejume Diwesi tsipaeba ducuaeta jiwitha. Bapon barai jiwitha, jeye:

—Icha jüntu coyene paxeinare painya neauraxae xua abe paexaname. Paca bautisabina ichamonae xua Nacom paca necayabara jüntemainaenexa abe painya neexanae cuiru coyenein, jei Juan.

⁴Baxua exana, peyabara jeichixaetsi xua peyabara jeixae pon Nacom peitorobi jume pepaebin Isaías poxonae bapon tina pejume diwesi. Barapo diwesitha Isaías caena bayatha wūnae tsiwūnaeya yabara paeba xua Juan yabara. Isaías namchi, jeye:

“Jume tan pon wawai ira xuepana susato tsurucuae nacuatha.

Bapon wawai jeye: ‘Patsinajüntu cui coyene wūnaere pon jiwi pia pepa Pecanamataxeinaeinchi pia pepatopae wūnaeya tsane.

⁵Daxita pemarafotontha paatsa jehebapoinyama.

Daxita petsuton paatsa caxiquiyama. Pejeyajeyowa namton bopiya dubeinya paexande. Pemarafotofotowa namton, panamto dameyama. Apará jopa yabara janyo namton, jame apara yabara jan painya jüntu coyenein. Ichi paichim xua namton paxanebame bara paichinde pana najüntu cui wūnaere painya Nepacacanamataxeinaein nexa poxonae bapon patopeicaena.

⁶Daxita nacuapiwimonae yaputaena Nacom pia pecapanenebiyae coyene tatsi’, jei pon wawai”, jei Isaías pejume diwesitha.

⁷Pin bicheito pata, xua Juan pebautisabinexa tsane. Juan barai barapomonae jeye: “iPaxam pomonae pemuxuitorobi jiwi pam! iPaxam be bara jomomonae pam, tsipei jomo ba cuitaya ducupa nawa! Bara paichim anoxuae paichichipame Nacom pacuitaya ducupame xua abe paca exanaeyainwa. Jopa papanenebiyaem tsane bequein bara paca bautisabinchi tsipei jopa pajüntu coyene xanepanaem Nacomtha.

⁸Xaniwaicha painompare xain ichamonae paca cui tane xua icha jüntu coyene painya nexainaewa Nacomtha, pon jiwi Pecanamataxeinaein. Tsipei bequein paxam pajam: ‘Waxainchi Abraham pia pemomoxi susato jiwichixaetsi Nacom naca capanenebiya exanaena’, pajam, daichitha paxam jopa xaniwaicha pajume cowūntsim Nacom. Daxota Nacom itacupatsi xua paca cui matawenta pia jopa paca nepaca capanenebiyaenexa tsane. Matautano barichino Nacom itacupatsi

xua jiwi forotsinchi barapo ibotixi weya, po ibotixi xote Jordán mene itapatha bobena. Barapo jiwi naexanaena, po jiwi yatsicaewa Abraham pia pemomoxi susato jiwi tatsi, pomonae pejume cowantsixaetsi Nacom. ⁹Poxonae pebin naein uba, sipari ba canacui wunaeta pecaucubobinexa po naein jopa nacoichiyo. Poxonae barapo naein ucuboba nantatsun eta xua petautsinexa isototha. Paxam bara paca juta ichiya paca cana exanaena. Nacom paca yabara nacui wunaeta xua paca bebai tsane isototha, ichaxota po isototha jopa cuinaya itacounayiyo tsipei Nacom jopa xanepanaya pata taexanaem”, jei Juan.

¹⁰Nexata barapomonae Juan yainyabatsi jeichichi:

—¿Eta pocotsiwa Nacom ichichipa pocotsiwa pata exanaenexa xua ichamonae pata necui taenexa tsane xua bara pajuntũ coyene xanepanaein Nacomtha? jei barapomonae.

¹¹Juan jume nota, jeye:

—Pon ainya camisabe xeina, bapon becatsipa pontha pon yatsicaewa jopa nauma xatatsiyo camisa. Irũrũ pon tamatecatsi penabanaewa bapon becatsipa ichũn pontha pon jopa xeinaeyo penabanaewa, jei Juan.

¹²Barichirũ pata, pomonae paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchi nexa. Barapomonae pata xua Juan pebautisabinexa tsanerũ barapomonae. Barapomonae Juan yainyabatsi, jeichichi:

—Pon jiwi Necuidubim, ¿eta pocotsiwa Nacom ichichipa pocotsiwa pata exanaewa tsane? jei barapomonae.

¹³Juan jume nota, jeye:

—Saya meisa jiwi pawũcaename paratixi xua romanomonae paca itoroba. Jopa yabara muxuitorobiya pawũcaeinde ichawan, jei Juan.

¹⁴Barichirũ soldadomonae Juan yainyabatsi, jeichichi:

—Irũ paxan, ¿eta pocotsiwa Nacom ichichipa pocotsiwa pata exanaewa tsane? jei barapomonae.

Juan jume nota, jeye:

—Jopa payabara jume daunweya wecobe noteibinde ichamonae piawan tatsi. Matautano ichamonae jopa pacui yopiteibinde pocotsiwa exana ichamonae poxonae apara jopa exaneibiyo. Bara saya pajuntũ coyene weiweinare poxonae paratixi paxeiname poxonae ichamonae xua pata exaname xua soldadomonae pamxaem, jei Juan.

¹⁵Daxita pomonae wũnae ewateiba xua Mesías pepatopeicaewa tsane, barapomonae poxonae Juan jume tainchi, barapomonae pejuntũ coyeneintha nanta xeina, xua apara Juan metha apara Mesíaswei.

¹⁶Ichitha Juan barai daxita barapomonae, jeye: “Xan paca bautisabatsi meratha. Ichitha nama patopaena pon bichocono ainya cui beyacaincha xan. Bapon pon pepa Pecanamataxeinaein jiwi. Xan saya tapawin. Daxota auran xua tataxu mũ isanaxubiwa pia penataxu xatatsiwa. Bapon paca

jiwana bautisabina Nacom pia Pejumope t̄nax̄tha tatsi. Bapon paca jiwana cui copatsinchi xua atene tsane Jesús pejume cow̄ntsixaetsi tsane. ¹⁷Bapon pon patopaena bapon bayatha tsinacobenata po paparato xua trigo xu nexa. Bapon trigo xu tsanaya seicaya matapepe jehebapona. Trigo xu jehebapona, trigo xu matabotha. Matapepe jehebapona petautsinexa isototha, ichaxota po isoto jopa cuinaya itacounaiyo. Bara juta cana ichi tsane jiwitha icha trigo xu cana ichiya ichichi jiwi Nacom tsananobina pomonae pejume cow̄ntsixaetsi pia nacuatha nexa. Ichamonae tsananobinchi pomonae jopa pejume cow̄ntsiwichi, petautsinexa isototha ichaxota xua jopa itacounaiyo”, jei Juan.

¹⁸Icha diwesi yabara jumeno Juan barapomonaetha paeba Nacom pia pexeinya jume diwesi tatsi. ¹⁹Matautano Juan biatane, Herodes biatainchi pon Judea nacuapiwi pia peyanacua ewatsinchi poxoru Herodes peweicho caiba yab̄yo powa Herodías. Herodes peweicho tatsi pew̄n Felipe. Matautano Juan biatane poxoru bayatha Herodes abe exana nawita jiwitha. ²⁰Ichitha dāmetha equeicha Herodes abe exana xua Juan caenaetatsi ichamonaetha xua pecaponaenexa tsainchi jiwi pec̄bi botha.

Meje yabara poxonae Jesús bautisabatsi

(Mt 3.13-17; Mr 1.9-11)

²¹Poxonae cataunxuae Juan jopa ecaeyo jiwi pec̄bi botha, Juan bautisaba ducuaanaeta jiwi. Barichi ir̄ Jesús nabautisabatsi. Poxonae Jesús tsipaebuncua paxa, peitaboco nayausanaxuba. ²²Nacom pia Pejumope t̄nax̄ tatsi patopeica Jesustha, be topiboto yaruneica. Jesús jume tane pocotsiwa peitaboco wetsipaebicatsi, jeichichi:

—Xam apara Taxantom pom bichocono cantobetsi, pom caitapetatsi. Nejūntu coyene weiweina exaname, jei Nacom.

Meje yabara pomonae Jesús pia pamo susatopiwi tatsi

(Mt 1.1-17)

²³Poxonae Jesús treinta po weibe yapu jopa, bapoxonae nama tamropata pitaba barompaya pia pepa peexanae coyenewan po coyene Nacom Pejume Diwesi pecueicueijeiwa xuano jiwi axaibi exana ducuaanaebiyano. Jesús, José pexanto tatsi. Daxita jiwi nanta xeina xua mexeya itara José yatsicaewa pexantowei. José, Elí pexanto tatsi. ²⁴Bapon Elí, Matat pexanto tatsi. Bapon Matat, Leví pexanto tatsi. Bapon Leví, Melqui pexanto tatsi. Bapon Melqui, Jana pexanto tatsi. Bapon Jana, José pexanto tatsi. ²⁵Bapon José, Matatías pexanto tatsi. Bapon Matatías, Amós pexanto tatsi. Bapon Amós, Nahúm pexanto tatsi. Bapon Nahúm, Esli pexanto tatsi. Bapon Esli, Nagai pexanto tatsi. ²⁶Bapon Nagai, Maat pexanto tatsi. Bapon Maat, Matatías pexanto tatsi. Bapon Matatías, Semei pexanto tatsi. Bapon Semei, Josec pexanto tatsi. Bapon Josec, Judá pexanto tatsi. ²⁷Bapon Judá, Joanán pexanto tatsi. Bapon Joanán, Resa

pexanto tatsi. Bapon Resa, Zorobabel pexanto tatsi. Bapon Zorobabel, Salatiel pexanto tatsi. Bapon Salatiel, Neri pexanto tatsi. ²⁸Bapon Neri, Melqui pexanto tatsi. Bapon Melqui, Adi pexanto tatsi. Bapon Adi, Cosam pexanto tatsi. Bapon Cosam, Elmadam pexanto tatsi. Bapon Elmadam, Er pexanto tatsi. ²⁹Bapon Er, Josué pexanto tatsi. Bapon Josué Eliezer pexanto tatsi. Bapon Eliezer, Jorim pexanto tatsi. Bapon Jorim, Matat pexanto tatsi. ³⁰Bapon Matat, Leví pexanto tatsi. Bapon Leví, Simeón pexanto tatsi. Bapon Simeón, Judá pexanto tatsi. Bapon Judá, José pexanto tatsi. Bapon José, Jonam pexanto tatsi. Bapon Jonam, Eliaquim pexanto tatsi. ³¹Bapon Eliaquim, Melea pexanto tatsi. Bapon Melea, Mena pexanto tatsi. Bapon Mena, Matata pexanto tatsi. Bapon Matata, Natán pexanto tatsi. ³²Bapon Natán, David pexanto tatsi. Bapon David, Isaí pexanto tatsi. Bapon Isaí, Obed pexanto tatsi. Bapon Obed, Booz pexanto tatsi. Bapon Booz, Sala pexanto tatsi xua icha wun Salmón. Bapon Sala, Naasón pexanto tatsi. ³³Bapon Naasón, Aminadab pexanto tatsi. Bapon Aminadab, Admin pexanto tatsi. Bapon Admin, Arni pexanto tatsi. Bapon Arni Esrom pexanto tatsi. Bapon Esrom, Fares pexanto tatsi. Bapon Fares, Judá pexanto tatsi. ³⁴Bapon Judá, Jacob pexanto tatsi. Bapon Jacob, Isaac pexanto tatsi. Bapon Isaac, Abraham pexanto tatsi. Bapon Abraham, Taré pexanto tatsi. Bapon Taré, Nacor pexanto tatsi. ³⁵Bapon Nacor, Serug pexanto tatsi. Bapon Serug, Ragau pexanto tatsi. Bapon Ragau, Peleg pexanto tatsi. Bapon Peleg, Heber pexanto tatsi. Bapon Heber, Sala pexanto tatsi. ³⁶Bapon Sala, Cainán pexanto tatsi. Bapon Cainán, Arfaxad pexanto tatsi. Bapon Arfaxad, Sem pexanto tatsi. Bapon Sem, Noé pexanto tatsi. Bapon Noé, Lamec pexanto tatsi. ³⁷Bapon Lamec, Matusalén pexanto tatsi. Bapon Matusalén, Enoc pexanto tatsi. Bapon Enoc, Jared pexanto tatsi. Bapon Jared, Mahalaleel pexanto tatsi. Bapon Mahalaleel, Cainán pexanto tatsi. ³⁸Bapon Cainán, Enós pexanto tatsi. Bapon Enós, Set pexanto tatsi. Bapon Set, Adán pexanto tatsi. Bapon Adán, Nacom pexanto tatsi.

Meje yabara poxonae Jesús juntu coyene jujutatsi caurimonae pia pentacaponaein tatsi xua Jesús abe coyeneya petaexanaenexa tsane
(Mt 4.1-11; Mr 1.12-13)

4 ¹Poxonae Jesús juntu coyene yucatsi Nacom pia Pejumope tunaxu tatsi bapoxonae caibe nawiya Jordán mene weya. Nacom pia Pejumope tunaxu tatsi Jesús mata cayatsi ira xuepana susato tsurucuae nacua beya. ²Baraxotiya Jesús popona cuarenta po matabibibe. Caurimonae pia pentacaponaein tatsi Jesús piraichi juntu coyene jujutatsi xua Jesús abe coyeneya petaexanaenexa tsane. Barapo cuarenta po matabibetha Jesús jopa nabanaeyo. Poxonae barapo matabin yapucaewa Jesús bichocono jainpa. ³Caurimonae pia pentacaponaein tatsi, Jesús baraichi, jeichichi:

—Icha xam yatsicaya Nacom Pexantom, netsita iture. Barapo iboto itorobare xain pan naexanaxoya, jei caurimonae pia pentacaponaein tatsi.

⁴Jesús jume nota. Caurimonae pia pentacaponaein tatsi jume notatsi, jeye:

—Nacom Pejume Diwesitha namchi: ‘Jopa metha bepa meisa jiwi betiya una jinompaetsipae pan’, jei Nacom Pejume Diwesi, jei Jesús.

⁵Caurimonae pia pentacaponaein tatsi Jesús matacapoinchi ichaxota po demxuwa bichocono atororo. Baraxotiya Jesús tsita itutarabatsi daxita nacuan, xua barapo cae pin nacuathe. ⁶Bapoxonae caurimonae pia pentacaponaein tatsi Jesús baraichi, jeichichi:

—Daxita barapo nacuan cacatinchi jiwi neitorobinexa tsane. Matautano daxita cacatinchi nacuan pia pewunaewan, tsipei bayatha necata daxita barapo nacuan xua taitorobeibiwa coyenewan. Tawaxae catsin ichuntha pontha pon xua ichichipan xua tacatsiwa. ⁷Ichaunxuae nentabocototha uncuaename taitabaratha, xuano ichaunxuae newunae jainchiname xua nenanta xeinaewaxae xua xan jinya tacacanamataxeinaeinchi, bapoxonae baxuan daxita bara cacatsinchi jinya Necanamataxeinaenexa barapo nacuan, jei caurimonae pia pentacaponaein tatsi.

⁸Ichitha Jesús jume nota, jeye:

—Yaitama Nacom Pejume Diwesitha namchi, jeye: ‘Meisa wunae jainde jinya Necanamataxeinaein Nacom. Meisa bapon yatsicaewa taexande pocotsiwa caitoroba’, jei Nacom Pejume Diwesitha, jei Jesús.

⁹Cotacaya nama equeicha Jesús matacapoinchi Jerusalén tomara beya, Nacom pin pia botha pentatupa beicha capoinchi. Jesús baraichi, jeichichi:

—Icha bara xaniwaicha Nacom Pexanto tatsim, wenaxoreinque.

¹⁰Nacom Pejume Diwesitha namchi, jeye:

‘Nacom itorobina pia matatsunpiwi necayanabinexa.

¹¹Barapo matatsunpiwi asiya cawaetaboutsina pecobetha, xua jopa necataxu tsaquituncuaenexa tsane ibototha poxonae wenaxorecame’, jei Nacom Pejume Diwesitha, jei caurimonae pia pentacaponaein tatsi.

¹²Jesús jume nota, jeye:

—Barichi Nacom Pejume Diwesitha namchi, jeye: ‘Jopa juntu coyene jujutsiya wucaeinde Nacom pon jinya Necanamataxeinaein, xua cajume jejei tsane necayawenaenexa poxonae jopa xapain exanaem’, jei Nacom Pejume Diwesitha, jei Jesús.

¹³Poxonae caurimonae pia pentacaponaein tatsi yaputane xua jopa xeinaeyo po coyenetha equeicha Jesús pejuntu coyene jujutsiwa tsainchi, bapoxonae nama Jesús wepu poinchiba xua saya bara caeto nexa.

**Meje yabara poxonae Jesús tamropata pitaba
pia penacuichiwa Galilea nacuaatha**
(Mt 4.12-17; Mr 1.14-15)

¹⁴Jesús caibe iya Galilea nacua beya. Matautano jopa juniya xeinaeyo Nacom pia Pejumope tñaxu tatsi pia peayapusu itorobi coyenewa tatsi. Daxita jiwi pomonae jinompa barapo nacuaatha Jesús yabara paebinoutatsi. ¹⁵Jesús cuidubeiba barapomonaе judiomonaе pia penacaetutsi bontha tatsi xua daxita tomarantha. Barapomonaе Jesús wñnae jainteibatsi.

Meje yabara poxonae Jesús Nazaret tomaratha popona
(Mt 13.53-58; Mr 6.1-6)

¹⁶Nexata Jesús Nazaret tomara beya pona, po tomaratha ichaxota wichaba. Judiomonaе barompaya pia pentaquei seicaе matabitha tatsi Jesús joniya judiomonaе pia penacaetutsi botha tatsi tsipei pia cui xeina xua peponeibiwa barapocotsi botha. Jesús xenta iya barapomonaе peuncuaenexa peitabaratha, peyorobinexa Nacom Pejume Diwesi, xua barapomonaе pejume taenexa. ¹⁷Nexata Jesús catatsi Isaías pejume diwesi, pon Nacom peitorobi jume pepaebin, pon caena bayatha tupa. Poxonaе Jesús diboro pataxuba baxota taeba pocotsiwa baxota paeba, xua jeye:

¹⁸ “Nacom pia Pejumope tñaxu tatsi neyanta popona.

Nacom neitapeta tatacueicueijeinexa tsane pia pexeinya jume diwesi tatsi pomonaetha pomonaе peacopeibi jiwi.

Matautano neitoroba xua tayawenaenexa pomonaе anthuthutane.

Matautano neitorobano xua tayawenaenexa pomonaе caurimonaе itorobatsi nawita xua barapomonaе pepanenebiyaenexa.

Matautano neitorobano xua tane tacana exanaenexa pomonaе peitata nacutsi jiwi.

Matautano neitorobano xua tayawenaenexa pomonaе xua bichocono taayapubetsi xua pejinompaewa tsane xua barapomonaе jopa pexeinaе dubenanaebiyaenexa tsane barapo coyenein.

¹⁹ Matautano neitorobano xua jiwi tatsipaebinexa po coyene xua Nacom nacui wñnaeta xua jiwi peyawenaewa tsainchi pomonaе ichichipa xua Nacom pejume taewatsi”;

jei Isaías pejume diwesitha, jei Jesús xua yoroba.

²⁰Poxonae Jesús barapo diboro acataraba, bapoxonae cata pontha pon jiwi peyawenequeibin judiomonae pia penacaeutsti botha tatsi. Bapoxonae Jesús econeca. Daxita pomonae baxota ena, Jesús necotenatsi xua cui ewatenatsi xua pecueicueijejwa tsane Jesús. ²¹Bapoxonae Jesús tamropata pitaba xua paeba, jeye:

—Anoxuae xuaunxuae pajume taneme baxua apara barapo mataqueithe Nacom nayabara jume cui weta painya itutha, jei Jesús.

²²Daxita carepaya jiwi Jesús xanepanaya yabara paebatsi. Daxita barapomonae najüntü coyene cabenaeca xua pejume taexae xua po jume barapomonae petsipaebixaetsi. Barapomonae nantiya nabarai, jeye:

—Maisa jume xeica bapon, jume wunaeya paeba. ¿Bara bapon José pexanto tatsi jampa? najei barapomonae.

²³Jesús barai barapomonae, jeye:

—Metha pana netsipaebichipame icha be pocotsi diwesiyo iche xua pecayabara juta pepaebi diwesiyo xua ba jei: ‘Pon jiwi neyawubin, jinya coutha nayawubare’, xua ba jei. Barichi anoxuae pana nejam tsane: ‘Xua paxan pajume tan xua juinya Capernaum tomaratha exaname, barichinde xote exande jinya tomaratha’, pana nejam tsane, jei Jesús.

²⁴Awiya cataunxuae Jesús cueicuejei. Equeicha namchi, jeye:

—Xaniwaicha paca tsipaebatsi pon ba Nacom peitorobi jume pepaebin pia nacuamonaepiwi ba aitaftabichi. ²⁵Xaniyan paca baraichi xua caena bayatha poxonae Elías popona pon Nacom peitorobi jume pepaebin, ainyawaxi powaxi pecuenta werapaewaxichi pia seuriwi Israel nacuatha jinompa. Barapo nacuatha cuinaya jopa duneicaeyo acoibi po weiyobe xuano seis po xometiyobethano. Daxita jiwi piyain barapo nacuatha Israel nacuatha. ²⁶Nacom jopa itorobiyo, Elías jopa itorobichi xua peyawenaenexa tsane caewayo jiwana powaxi pecuenta werapaewaxichi pia seuriwi xua Israel nacuatha. Ichitha saya meisa Nacom itoroba, Elías itorobatsi powatha powa pecuenta tupaewayotsi piseuri, powa popona Sarepta tomaratha, xua Sidón nacuatha xua barapowayo peyawenaenexatsi. ²⁷Barichi Israel nacuatha pinmonae jinompa pomonae peperu sawatsi jiwimonae, poxonae Eliseo popona pon Nacom peitorobi jume pepaebin. Eliseo jopa jiwana axaibi exanaeyo. Ichitha meisa Eliseo Naamán axaibi exanatsi pon bichocono peperu sawinchi. Bapon Naamán, Siria nacupin, jei Jesús.

²⁸Poxonae barapomonae jume tane pocotsiwa Jesús paeba pomonae judiomonae pia penacaeutsti botha ena, bapoxonae barapomonae Jesús casebatsi. ²⁹Asiya umenarucupa barapomonae. Jesús tomara penma beitaweyatsi. Jesús capoinchi pitapatororo itapa beya, po tsututha bomuxun jeba, xua bara wepexorecaenexa tsainchi Jesús. ³⁰Ichitha Jesús barapomonae xenta iya, pu seicataba.

Meje yabara poxonae pebin pon cauri xeina
(*Mr 1.21-28*)

³¹Nexata Jesús pona Capernaum tomara beya po tomara eca Galilea nacuatha. Baxotiya Jesús cuiduba jiwi po mataqueitha pentaquei seicae maticabitha. ³²Barapomonae yabara najüntu coyene cabenaeca tsipei pocotsiwa bapon barapomonae cuidubatsi be pon peyaputaein pia peyapusu itorobi jume coyeneya tatsi paeba.

³³Judiomonae pia penacaetutsi botha tatsi pebin baxota eca, pon cauri xeina. Bapon bichocono wawaya exanatsi cauri. Bapon Jesús baraichi xua namtsebiya wawai, jeye:

³⁴—iJesús Nazaret tomarapim, warapare pata xainya weya! ¿Eta xua metha patopame pata xantha xua jinya apara abe pata neexanaetsim? ¿Apara patopame jinya pana nejutebicham? Paca yaputainchi yawa paca yaitainchi. Xam apara pon Nacom caitoroba, pon pepa Nentacuiruyapuxanepanaem, jei cauri.

³⁵Jesús itaweta cauri, jeye:

—iMoyande! iBapon wepu ponde! jei Jesús.

Nexata cauri pebin iratha xotsi barapomonae peitutha tatsi. Pebin wepu poinchi cauri, saya jüntema. Equeicha jopa ateneyono. ³⁶Daxita barapomonae yabara najüntu coyene cabenaeca, nayainyaba namchi:

—¿Eta po jumera xua bapon paeba? Jamaisa barapo pebin itaweta caurimonae pia peyapusuya itorobi coyenewatha. Matautano barapo caurimonae bara pona.

³⁷Daxita jiwi paebinouta Capernaum tomara cuariyatha pocotsiwa Jesús exana.

Meje yabara poxonae Jesús axaibi exana Simón Pedro pamiyo tatsi
(*Mt 8.14-15; Mr 1.29-31*)

³⁸Bapoxonae Jesús judiomonae pia penacaetutsi bo tatsi wejoniya. Jesús joniya Simón pia botha tatsi. Simón pamiyo tatsi atene, domaebatsi. Barapowa piamonae tatsi Jesús jume daunweya wucatsi xua bapowa axaibi peexanaenexa tsainchi. ³⁹Jesús imoxoyo caquita uncua pentasipatha. Jesús domaetha namchi, jeye:

—Barapowatha jopa bayatha yacacaewiyande, jei Jesús.

Domae aichurucuae. Nainya barapowa nantacotaxuba. Bapoxonae bapowa pexaewa apata barapomonaetha.

Meje yabara poxonae Jesús axaibi exana pin bicheitomonae
(*Mt 8.16-17; Mr 1.32-34*)

⁴⁰Poxonae tabopiya tsanaicha pomonae piamonae barompaya taatenetsi pomonae xua jopa nayaromae jupaeyo, daxita barapomonae Jesús betacarendenatsi. Jesús ichawa beya jayabapona pecobetha, bapoxonae

daxita carepaya axaibi. ⁴¹Barichi pomonae cauri pexeinaewi Jesús taitaweta barapomonae. Barapo caurimonae wawaya jeye:

—Apara xam Nacom Pexantom, jei.

Bequein caurimonae baxua paeba ichitha Jesús awiya daumetha itaweta caurimonae. Jesús jopa najume copatsiyo xua equeicha pepaebiwa tsane poxoru barapo caurimonae yaputane xua bapon yatsicaewa Mesías pon Nacom itorobica.

Meje yabara poxonae Jesús cueicueijeji Nacom Pejume

Diwesi judiomonae pia penacaetutsi bontha tatsi

(Mr 1.35-39)

⁴²Poxonae baya juntucuru pentha tsina, Jesús tomara weiya ichaxota jiwaibi bara beya pona. Ichitha jiwi Jesús jeitatsi. Barapoxonae bapomonae pata ichaxota Jesús popona. Barapomonae aichaxaibi xua Jesús pewepu warapaewa barapomonae. ⁴³Ichitha Jesús namchi, jeye:

—Bewa iru yabara paebin Nacom pia pexeinya jume diwesi tatsi, po diwesi yabara xua Nacom waba jiwi petanaexanaenexatsi piamonae pomonae Nacom juntu coyene itorobiya ewata. Apara baxua netsiyabara itorobica, jei Jesús.

⁴⁴Daxota Jesús paeba ducunaeta Nacom Pejume Diwesi Judea nacuaatha xua judiomonae pia penacaetutsi bontha tatsi.

Meje yabara poxonae Jesús piamonae yawena xua duwei yamona

(Mt 4.18-22; Mr 1.16-20)

5 ¹Caentacabi Jesús Genesaret pucua itapatha uncua. Pin bicheito pata bichocono nacucunaxuba Jesustha, tsipei barapomonae ichichipa jume tane Nacom Pejume Diwesi tatsi. ²Jesús ainya jerabe tane pucuatha taetabo itapatha, po jera saya naebe. Tsipei duwei peyamonaewi bayatha nacui wetarucupa, matautano poxoru bayatha nonobouna taetabotha. Barapomonae pia peyamonaewan iquicompa. ³Nexata Jesús jeratha nontabiya Simón pia naetha tatsi. Jesús Simón baraichi:

—Tsiwiyo neyana torotaxoyam, jei Jesús.

Barapoxonae Jesús eca jeratha. Jesús mene wecuidubecarena jiwi Nacom Pejume Diwesi. ⁴Poxonae Jesús najume weta, Simón baraichi, jeye:

—Jeratha ponde ichaxota pentatheibu. Paxoyama painya neyacamonaewa painya necapirenaenexa duwei, jei Jesús.

⁵Simón, Jesús jume notatsi, jeye:

—Pon jiwi Necuidubim, bequein barapo merawithe payamonompan, pacobesa patan. Yaitama aunxuae neitorobame, methaunxuae xoyaein tayamonaewa, jei Simón.

⁶Poxonae barapomonae xoya, duwei pin tunto capirena, muxu peucubabi xua peyamonaewa. ⁷Nexata barapomonae moya pecobetha

itacowaeba pomonae penabarũ yaxunobompaexae, pomonae icha jeratha jinompa itacowaebatsi, penayawenaenexa. Barapomonae pata. Jera ainya naebe wũntabe duwei. Muxu pebunopaebe jerabe. ⁸Simón pon Jesús icha wũn duta, xua Pedro baraichi, bapon tane baxua. Bapoxonae bapon Jesús peitabaratha tauncuatsi pentabocotha. Simón, Jesús baraichi, jeye:

—Tanecanamataxeinaein, newepu ponare, tsipei xan abe taexanaein, jei Simón Pedro.

⁹Poxoru Simón Pedro junuwiya najũntũ coyene cabenaeca yaitama peyacamonae watha capirena duwei pin tunto. Irũ pomonae Simón Pedro pia jeratha petaenaewichi barapomonae irũ junuwiya najũntũ coyene cabenaeca. ¹⁰Irũ Zebedeo pexantobe tatsi, Santiago irũ Juan baponbe irũ junuwiya najũntũ coyene cabenaecabe. Baponbe ponbe Simón pebarũ yamonaeinbe tatsibe. Ichitha Jesús Simón baraichi, jeichichi:

—Simón, jopa junuwinde, anoxuae caexanaeinchi xua pinmonae yawenaename xua barapomonae pejume cowũntsiwa tsane Nacom icha bayatha ichim poxonae yamoname duwei nawita, jei Jesús.

¹¹Nexata poxonae barapo jerabe botounabe, barapoxonae barapomonae baxuan daxita nacui barapenta. Bapoxonae barapomonae Jesús puna poinchi.

Meje yabara poxonae Jesús axaibi exana pon peperũ sawinchi

(Mt 8.1-4; Mr 1.40-45)

¹²Jesús icha tomara siwa pona. Bapoxonae pebin patopa pon peperũ sawinchi. Poxonae Jesús taebatsi, bapon Jesús peitabaratha tatsi pentabocototha tauncuatsi yawa ira betaeuncuareca. Bapon Jesús jume daunweya wũcatsi, jeichichi:

—Pon Necanamataxeinaem jiwi, icha bara ichichipame bara caitacupa xua axaibi tana neexanaewam, tsipei jinya neayapusũ itorobi coyenewa nexainaem, jeichichi Jesús bapon.

¹³Nexata Jesús, nacobe yota, yawa mata jayaba bapon, pon peperũ sawinchi. Jesús barai, jeye:

—Bara ichichipan. ¡Bara axaibinde! ¡Bara caaperũxaibi exanatsi! jei Jesús.

Bapoxonae bapon nainya taaichurucaetsi xua peperũ sawiwatsi.

¹⁴Nexata Jesús barai bapon, jeye:

—Jopa yabara tsipaebinde ichamonaetha xua neaxaibiwam. Saya jame meisa ponde sacerdotemonaepintha xua nenaitutsinexa xua bapon necataenexa xua bayatha nejumewa. Bapontha care pocotsiwa xua pecatsiwa Nacomtha, pocotsiwa xua bayatha Moisés cui itoroba xua equeicha jopa jinya nenataxobinexa jinya pepontha. Bapoxonae daxita jiwi cayaputaena xua tsita itapeinya xeinatsi xua xam bara jumem yawa xua perũ wũnaem, jei Jesús.

¹⁵Ichitha daxita jiwi taju beya jume taetaepona pocotsiwa Jesús exana. Pin bicheiton nacaetutapona Jestustha pejume taenexa tsane pocotsiwa

Jesús exana. Matautano nacaetutapona xua Jesús peaxaibi exanaenexa barapomona. ¹⁶Ichitha Jesús ichaxota jiwaibi bara beya poneiba compa. Baxotiya Paxatha tsipaebeiba.

Meje yabara poxona Jesús axaibi exana pon pecuenobinchi
(Mt 9.1-8; Mr 2.1-12)

¹⁷Caentacabi Jesús cuidubauya. Iruru baxotiya ena pomona fariseomona jiwana tatsi. Iru baxota ena pomona jivi pecuidubiwi Moisés pia peitorobi coyenewa tatsi. Barapomona daxita tsiqui tomaraxi werendena po tomaraxi ena Galilea nacuatha. Iru daxita tsiqui tomaraxi werendena po tomaraxi ena Judea nacuatha, iru ichamona Jerusalén tomara werendena. Nacom pia peayapusu itorobi coyenewa tatsi Jesús yawenatsi, daxota axaibi exana peatene jivi. ¹⁸Nexata pebiwi pata. Barapo pebiwi carendena pon pecuenobinchi. Xua xota pocotsiwatha maiteiba, barapomona barapocotsiwatha carendenatsi pecuenobinchi. Barapomona bepa bomuxutha cajojoniya ei xua bepa Jesús peitabaratha tabotichei. ¹⁹Ichitha barapomona jopa cajojoniyaeyo bomuxutha tsipei pin bicheito boupa quecona. Barapo bo matatupa perca. Nexata daxota barapo bo matatupa beenoinya. Barapomona barapo penta tupa weatsa caxina xoreca. Nexata barapomona nantiya opi quetabe bamacatha barapo pemaiteibiwatha. Bapoxona bara weyawa yorecatsi barapo pecuenobinchi jivi pexainya deca tatsi, Jesús peitabarayo decano tatsi. ²⁰Jesús tane xua barapomona yabara cui jume cowanta xua Jesús bara peitacupaewatsi xua axaibi peexanaewatsi pon pecuenobinchi. Daxota Jesús barai pecuenobinchi, jeye:

—Tajiton cayabara cui junte mainatsiba abe jinya neexanae cuiru coyenein, jei Jesús.

²¹Nexata pomona jivi pecuidubiwi Moisés pia peitorobi coyene, iru fariseomona, daxita barapomona caemona natsipaeba, najei: “Maisa bapon bichocono abe tsipei pocotsiwa bapon paeba bichocono Nacom tsita ajumebetsi. Jiton dapocotsin aibi pon xua jivi cacui yabara junte mainaya juntu puxana exanatsi abe pia peexanae cuiru coyenein tatsi. Jame meisa apara caein Nacom yaputane xua jivi cacui yabara junte mainaya juntu puxana exanatsi abe pia peexanae cuiru coyenein tatsi”, najei barapomona.

²²Ichitha Jesús yaputane xua barapomona caemona natsipaeba. Jesús barai barapomona, jeye:

—¿Eta pocotsiwa metha baxua pana natsipaebame? ²³¿Eta po jumetha baran tsane pecuenobinchin? ¿Metha jan tsane: ‘Abe jinya neexanae cuiru coyenein cata junte mainatsi’, jan tsane? Ichacuitha ¿metha jan tsane: ‘Asiya uncuatabare yawa ponare’, jan tsane? ²⁴Daxota aunxuae paca tsita itapeinya xeinaeinchi xua xan ponxaein Nacom Tananeitapetsin, xua

xeinan taayapusu itorobi coyenewa xua bara tana neitacupaewa xua jiwi tayabara cacui juntemainaya juntu puxana exanaewa abe pia peexanae cuiru coyenein tatsi pomonae jinompa barapo cae pin nacuathe, jei Jesús.

Bara nexata pecuenobinchi Jesús barai, jeye:

—Catsipaebatsi, nontaponde. Jinya nemaituncuaewa pire. Jinya bo be-iyandeno, jei Jesús.

²⁵Bapoxonae pon pecuenobinchi caena nainya nontapona barapomonae peitatha tatsi, yawa pita xua pemaituncuaewa. Pia bo be-iyawa Nacom wuna jaintatsi poxonae namtotha ecapona. ²⁶Barapomonae daxita yabara najuntu coyene cabenaeca yawa Nacom wuna jaintatsi. Barapomonae junuwiya namchiya jeye:

—Anoxuae waxainchi tainchi xua pewunaewa pocotsiwa jopa yaputaetsi, jei barapomonae.

Meje yabara poxonae Leví wabatsi, Jesús waba

(Mt 9,9-13; Mr 2,13-17)

²⁷Poxonae baxua Jesús nacui weta, bapoxonae Jesús pontaba. Jesús tane pebin pon pewan Leví. Leví bapon pon paratixi pentoma noteibin po paratixi jiwi bewa catsibina pon romanomonae pia pepa peyanacua ewatsinchi nexa. Bapon eca ichaxota paratixi matoma noteibeca. Jesús Leví baraichi, jeichichi:

—Nepuna ponde, jei Jesús.

²⁸Bapoxonae Leví nontapona. Daxita baxua xubota, cuenta pona. Bapoxonae Jesús puna poinchi.

²⁹Pirapaeyo Leví pin penabanaewa exana pia botha xua Jesús tsiexanatsi. Iru pebiwi pinmonae pomonae paratixi pentoma noteibiwi po paratixi jiwi bewa catsibina pon romanomonae pia pepa peyanacua ewatsinchi nexa, barapomonae Jesús baru eca pexaethopeibiwatha, iru ichamonaeno baru enatsi penabarú nabanaenexa tsane. ³⁰Ichitha fariseomonae iru pomonae jiwi pecuidubiwi Moisés pia peitorobi coyenewa, daxita barapomonae Jesús pijimonae abeya tsipaebatsi xua Jesús yabara. Barapomonae namchi, Jesús pijimonae tatsi baraichi, jeichichi:

—Maisa Jesús abe exana poxoru baru xayeca pomonae paratixi pentoma noteibiwi po paratixi jiwi bewa catsibina pon romanomonae pia pepa peyanacua ewatsinchi nexa. Matautano baru xayeca pomonae abe peexanae cuiru coyene peexanaewi, jeichichi Jesús pijimonae tatsi barapomonae.

³¹Jesús jume nota barapomonae, jeye:

—Pomonae ba xua xaniwaicha jinompa xua jopa ateneyo barapomonae ba jopa canantawenonaeyo pon jiwi peyawubin. Saya jame meisa pomonae ba atene canantawenona pon jiwi peyawubin.

³²Barichinno xan patopan apara tha jopa tawabinexa tsane pomonae pejuntũ coyene xanepanae jiwi. Apara tha meisa tawabinexa tsane pomonae peajuntũcoyenebe jiwi, xua barapomonae icha jũntũ coyene pexeinaenexa tsane Nacomtha, jei Jesús.

*Meje yabara poxonae Jesús yabara yainyabatsi
po coyene xua Nacom peyabara nainbotsiwatsi
(Mt 9:14-17; Mr 2.18-22)*

³³Nexata barapomonae fariseomonae irũ pomonae jiwi pecuidubiwi Moisés pia peitorobi coyene, daxita barapomonae Jesús yainyabatsi, jeichichi:

—Pomonae Juan pia pepuna jinompaewichi jopa juniya nainboteibiyo xua jopa juniya tsipaebibiyo Nacomtha. Irũ pomonae fariseomonae barichirũ. Ichitha nama jinyamonae daxua jopa cou daichiyo, saya cou Ʃ penabaneibi xuano saya Ʃ peapeibi cou, jeichichi Jesús.

³⁴Jesús jume nota barapomonae, jeye:

—Paxam jopa bewa paexanaem tsane xua ichamonae nainbotsina, pomonae patsiwabame pexaewa xua penabanaenexa xua poxonae pebin pecotsiwa pita. Poxonae cataunxuae awiya bapon eca poxonae jiwi nabane, jopa ba bapoxonae nainbotsi. ³⁵Ichitha icha pon aena piowa pita, bapon caena nainya waetabatsi, ichamonae waetaba xua bapon tajũ pecaponaenexatsi, bapoxonae jame jiwi ba bewa wecoyeya yabara nainbotsi, xua equeicha bapon caewa pepatopaewa tsane, jei Jesús.

³⁶Matautano Jesús pecayabara jũta pepaebi diwesiyo tsipaeba barapomonae, jeye:

—Jiwi ba jopa exanaeyo xua pena dorouto tsiwiyo jiwana caxinaxubeta xua peru dorouto pewan botsinexa. Icha baxua exanaetsipa xua pena paparuwatha wan bota peru dorouto, bapoxonae barapo dorouto abe tsanaya. Tsipei poxonae barapo dorouto matanaxuba barapo pena paparuwa natsaquetabiya. Poxonae barapo pena paparuwa natsaquetabiya equeicha wan tsitsipanarena barapo dorouto. Bapoxonae equeicha pin wan tsanaya beyacaincha xua poxonae copiya. ³⁷Matautano jiwi ba pena vino mera jopa eparecaeyo peru bocoto, tsipei icha baxua exanaetsipa, barapo pena vino mera abe exanaetsipa barapo bocoto tsipei barapo bocoto jopa nayeyetaponaeyo poxonae barapo vino mera atsaxa. Barapo pena vino mera naxuba xuano barapo bocotono naxuba poxonae barapo bocoto tsitsica. ³⁸Daxota bewa jame pena vino mera eparecae pena bocoto. Bapoxonae pena vino mera jopa naxubiyo, xuano pena bocoto jopa nacubiyo poxoru boco yeyena xuano poxoru pena bocoto. ³⁹Pon ba xua peru vino mera apa pirapaeyo jopa ichipaeyo pena vino mera. Bapon jei: ‘Maisa peru vino mera xeica, beyacaincha pena vino mera’, jei.

Meje yabara poxonae Jesús pijimonaе tatsi yaboto nota trigo xu judiomonaе barompaya pia pentaquei seicaе mataqueitha tatsi
(*Mt 12.1-8; Mr 2.23-28*)

6 ¹Caentacabitha judiomonaе barompaya pia pentaquei seicaе matabitha tatsi Jesús pijimonaе baru iya pabi iyiya. Jesús pijimonaе tatsi xunumenapona trigo xu, bapoxonaе barapomonaе pecobetha xu mata pepeta yawa xu xane. ²Nexata Jesús pijimonaе tatsi tayainyabatsi, fariseomonaе yainyaba, jeye:

—¿Eta pocotsiwa baxua paexaname? Aparajiwijopa yabara cui copatsiyo xua ichamonaе penacuichiwa barapo matabithe, xua judiomonaе barompaya pia pentaquei seicaе matabi tatsi, jei barapomonaе.

³Jesús jume nota barapomonaе, jeye:

—Barapo tajimonaе jopa apara abe exanaeyo. ¿Jopa payabara yorobim pocotsiwa bayatha David exana poxonaе jainpa poxonaе iru pijimonaе tajainpatsiru? Bapon David pon caena bayatha Israel nacuamonaе itorobiya pia pepa peewatsinchi. ⁴Bapon David iru pijimonaе tatsi barapomonaе Nacom pin pia botha jojoniya. David xane pan, po pan ichamonaе cana exana xua Nacomtha pecatsiwatsi. Iru barapo pan David pijimonaе cata xua pexaenexaru. Barapomonaе xane bequein barapo Nacom pia peitorobi coyenewatha copata xua saya meisa sacerdotemonaе itacupatsi xua pexaewa barapo pan.

⁵Jesús namchi, jeye:

—Xan ponxaein Nacom Tananeitapetsin taitorobi coyenewa xeinan xua jiwitacoya taitorobiwa pentaquei seicaе matabitha, jei Jesús fariseomonaetha.

Meje yabara poxonaе Jesús cobe wunaе exana pon pecobe mubinchi
(*Mt 12.9-14; Mr 3.1-6*)

⁶Icha matabitha judiomonaе pia pentaquei seicaе matabitha tatsi Jesús joniya judiomonaе pia penacaetutsi botha tatsi. Matautano tamropata pitaba xua cuiduba barapomonaе. Barapo botha eca pon pecoxa weya pecobe mubinchi. ⁷Pomonaе jiwipecuidubiwi Moisés pia peitorobi coyene tatsi, iru fariseomonaе baxota ena. Daxita barapomonaе Jesús necotenatsi pecui taenexatsi icha bara metha Jesús cobe wunaе exanaena pentaquei seicaе mataqueitha pon pecobe mubinchi. Icha Jesús pon pecobe mubinchi axaibi exanatsi, bapoxonaе barapomonaе xeinaena po coyenewa xua Jesús abe peyabara paebiwatsi tsainchi. ⁸Ichitha Jesús yaputane pocotsiwa barapomonaе nanta xeina. Jesús barai pontha pon pecobe mubinchi, jeye:

—Nontaponde, uncuare xote, jei Jesús.

Bapon nontapona, asiya uncua Jesús peitabaratha tatsi. ⁹Nexata Jesús barai ichamonae, jeye:

—Paca yainyabinchi, ¿eta xua copata pentaquei seicae matacabitha? ¿Wūnae jampa? ¿Abe jampa? ¿Eta xua, xua exana jane? ¿Xua pebin capanepatsi jampa? ¿Xua pebin bexotsi jampa? ¿Eta xua jane? jei Jesús.

¹⁰Nexata Jesús naita muxunene cauncuapona, tane pomonae pematawacaicha enaewichi. Jesús barai pon pecobe mubinchi, jeye:

—Nacobe doire, jei Jesús.

Bapon nacobe doita. Nainya cobe wūnae tsanaya. ¹¹Ichitha barapomonae bichocono Jesús casebarucupatsi. Barapomonae caemonae natsipaeba najei:

—¿Etabe cui yabara ichainchi Jesús? jei barapomonae fariseomonae.

Meje yabara poxonae Jesús itapetsiya waba pia peitorobiwi tatsi pomonae xua doce poyobe

(Mt 10.1-4; Mr 3.13-19)

¹²Barapo matacabintha Jesús pona demxuwatha petsipaebinexa Paxa. Baraxotiya Jesús Paxa matowa tsipaeba barapo merawitha. ¹³Poxonae baya xometo pentha tsina bapoxonae Jesús pijimonae waba. Barapomonae jiwana itapetsiya waba doce poyobe, pomonae baraichi xua jeye: “Jesús pia peitorobi jiwi tatsi”, yabara jeichichi. ¹⁴Meje barapo doce poyobe pomonae Jesús pia peitorobiwi tatsi. Meje barapomonae: Simón, pon icha wūn “Pedro”, baraichi, irū ichūn pewūn Andrés, pon Simón peweicho tatsi, irū ichūn pewūn Santiago, irū ichūn pewūn Juan, irū ichūn pewūn Felipe, irū ichūn pewūn Bartolomé. ¹⁵Irū ichūn pewūn Mateo, irū ichūn pewūn Tomás, irū ichūn pewūn Santiago, pon Alfeo pexanto tatsi, irū ichūn pewūn Simón, pon celotemonaepin. ¹⁶Irū ichūn pewūn Judas, pon Santiago pexanto tatsi, irū ichūn pewūn Judas Iscariote, pon Jesús caenaetaxubatsi ichamonaetha xua Jesús pebexubinexatsi.

Meje yabara poxonae Jesús pin bicheitomonaе cuiduba

(Mt 4.23-25)

¹⁷Barapo doce poyobe Jesús demxuwa webarū dunareca, peira matafatanaewatha barū patopa. Baxota peira matafatanaewatha pin bicheito Jesús ewatumeinchi. Ichamonae pomonae Jesús pejume cowūntsiwichi baxota umena. Irū Jerusalén tomarapiwi pata xua Judea nacuapiwi. Barichi Tiro tomarapiwi, Sidón tomarapiwino pata. Barapo tomarabe mar mene itapatha ecabe. Daxita barapo pin bicheito pata xua Jesús pejume taenexatsi xua cueicueijeji xuano xua Jesús pia axaibi exanaetsi peatene jiwi. ¹⁸Pomonae cauri pexeinaewi barapomonae Jesús taitaweta cauri. ¹⁹Daxita jiwi ichichipa xua Jesús pejayabiwatsi tsipei Jesús daxita jiwi axaibi exana pia peayapusuwatha.

**Meje yabara poxonae Jesús yabara cuiduba pejuntũ coyene weiweinaewa,
xvano jopa pejuntũ coyene weiweinaewa**

(Mt 5.1-12)

²⁰Nexata Jesús pijimonaec necota. Jesús barai pijimonaec, jeye:

“Pajuntũ coyene weiweiname bequein anoxuae peacopeibi jiwi pam. Tsipei Nacom pia pejume cowuntsiwichi tatsi piamonaec tatsi pam, pomonaec Nacom juntũ coyene itorobiya ewata.

²¹“Pajuntũ coyene weiweiname, bequein bara anoxuae pajainpame, bexa tsane patonsanaename.

“Pajuntũ coyene weiweiname, bequein bara anoxuae pawecoyam, bexa tsane bichocono pajuntũ coyene weiweinaename.

²²“Pajuntũ coyene weiweiname poxonaec bequein jiwi paca ita aenaec aenei, bequein paca itaweta bo weya xvano poxonaec bequein abeya paca muxutainyaba. Matautano poxonaec bequein jiwi paca yabara abe paeba. Barapomonaec baxua paca cana exana tamonaec jiwi pamxaem xua xan ponxaein Nacom Tananeitapetsin. ²³Bichocono pajuntũ coyene weiweinare barapo matacabitha, tsipei peitabocotha Nacom paca catsibina pia pexeinya peitupanaewan pocotsiwan Nacom paca juntana jeba pia nacuatheicha. Icha barapomonaec paca ichi, barapomonaec pia pamo susato jiwi tatsi, Nacom pia peitorobi jume pepaebiwi barichichi abeya biatainchi yawa abe exanatsi.

²⁴“iIchitha pai jaibo paxam, anoxuae copei paacabem tsobenaem poxoru methaunxuae equeicha jopa painya neraichiwa tsane!

²⁵“iPai jaibo, paxam pomonaec anoxuae patonsanabename tsipei methaunxuae bexa tsane pajainpabenaename!

“iPai jaibo, paxam pomonaec pajuntũ coyene weiweinabename tsipei anoxuae methaunxuae pajuntũ coyene wecoyam tsane!

²⁶“iPai jaibo, pomonaec jiwi wunaec paca jainteibena painya necueicueijeixae po diwesi jopa Nacom Pejume Diwesiyo! iIcha barapomonaec paca ichi barichi barapomonaec pia pamo susato jiwi tatsi, wunaec jainta pomonaetha pomonaec naerabiya paeba xua pinaec barapomonaec Nacom pia peitorobi jume pepaebiwi!” jei Jesús.

**Meje yabara poxonae Jesús yabara cuiduba xua jiwi bewa antobe
pomonaetha pomonaec pia peaitafaetabi jiwichi**

(Mt 5.38-48; 7.12)

²⁷⁻²⁸Equeicha Jesús namchi, jeye: “Paxamtha pomonaec beta pana nejume taneme, barapomonaec paca baraichi: Paantobeinde pomonaec bequein painya nepaca caaitafaetabi jiwi. Matautano beta pata taexande pomonaec paca ita aenaec aenei. Matautano amanaya beta papaebare pomonaetha pomonaec paca yabara abe paeba. Nacomtha patawucare pomonaec xua paca biatane. ²⁹Icha

ichun paca jumata tsaquinopa pecobetha, moya equeicha icha jumata pana najumata caeware xua painya necajumata tsaquinopaenexa. Icha ichun pacata pita peamtiyu camisa, po camisa xua athawe peruyaewa yawa bara saya moya pacopare xua equeicha painya nepacata pichiwa tsane camisa. ³⁰Daxita coyenexi pocotsiwa ichamonae paca wuca moya bara pacaiachabeibare. Pon pacata pita painyawa jopa equeicha caewa pawucaeinde. ³¹Paexande ichamonaetha xua po coyene painya neichichipaewa xua barapomonaetha beta painya nepacata exanaewa tsane.

³²“Icha saya meisa paantobem pomonaetha painya nepaca antobexae, Nacom jopa paca cui yabara matomacae tsane. Tsipei apara iru pomonaetha peajuntucoyenebewi antobe ichamonaetha pomonaetha peantobewixaetsi. ³³Barichi icha saya beta pata exaname pomonaetha beta pacata exana, Nacom jopa paca cui matomatsiyo tsaneno baxua. Tsipei pomonaetha peaitabe jiwi barapocotsi coyene iru exana ichamonaetha pomonaetha peaitabe jiwitha. ³⁴Barichi icha saya pacatsibame ichamonaetha xua bexa xuya painya nepaca catsibinexa, Nacom jopa paca cui matomatsiyo tsane baxua. Tsipei pomonaetha peaitabe jiwi barichi icha peaitabe jiwitha catsiba xua xuya equeicha pecatsibeibinexatsi. ³⁵Paxam jame bewa paantobem tsane painya nepaca caaitafaetabi jiwi, xuano jame beta bewa paexanaem ichamonaetha. Matautano jame bewa bara pacatsibim ichamonaetha xua jopa painya neyabara ewateibiwa xua xuya painya nepaca catsibeibiwa tsane. Icha baxua paexanaename Nacom paca catsibina pia nacuatheicha pocotsiwa xua paca juntana jeba pia nacuatheicha. Matautano Nacom paca cana exanaena pia pexanton jiwi tatsi pam, pon peitabocotha eca. Tsipei Nacom pejuntu coyene xanepanaein, daxota yawena barapomonaetha, pomonaetha bequein xua jopa wecobe noteibiya jacobeibiyo xuano xua peaitabe jiwi. ³⁶Payabara cui nanta xeinare po coyene xua ichamonaetha painya neyawenaewa. Icha be Nacom ichi xua yabara cui nanta xaina po coyene xua peyawenaenexatsi jiwi, bara paichinde”, jei Jesús.

**Meje yabara poboxonae Jesús cuiduba xua jiwi jopa bewa yabara paebina
ichamonaetha xua penatsicuentisiwa xua abe peexanaexae
(Mt 7.1-5)**

³⁷Equeicha Jesús namchi, jeye: “Jopa ichamonaetha payabara paebinde xua penatsicuentisiwa xua abe peexanaexae. Nexata bapoboxonae Nacom jopa paca yabara paebi tsane painya xua nenatsicuentisiwa xua abe painya exanaexae. Ichamonaetha jume daunweya jopa pajande: ‘Apara bapon picoya, apara bapon picoya’, jopa pajande. Nexata Nacom jopa paca daichi tsane baxua. Pacui yabara juntemainare po coyene ichamonaetha pacata abe exana, nexata Nacom paca cui yabara juntemainana xua abe painya neexanaewa. ³⁸Ichamonaetha, jopa juniya pacatsibinde, nexata Nacom jopa juniya paca catsibi tsane. Painya dorotha paca catsina, beta pacata pesabina, yawa beta pacata xatabacorecaena pecobetha yawa pacata nuncatuxuina. Yawa pacata wunca exanaena. Icha

daunweya payabara paebinae xua penatsicuentisiwa ichamonae xua abe peexanaexae, Nacom barichi daunweya paca yabara paebina xua painya nenatsicuentisiwa xua abe painya neexanaexae”, jei Jesús.

³⁹Jesús tsipaeba barapomonaе pecayabara juta pepaebi diwesiyo, jeye: “Pon ba peitata nacutsin jopa itacupaetsi xua pematacaponaewa ichun pon iru peitata nacutsin. Icha bapon baxua exanaetsipabe, baponbe fetotha joparecaetsipabe. ⁴⁰Pon ba aena nacuiduba xua peyaputaenexa, bapon jopa be bapocotsinyo, pon pecuidubin jiwi, pon peyaputaein. Ichitha pon poxonaе wetsina xua nacuiduba, bapon be pia pecuidubin cui jupa”, jei Jesús.

⁴¹Barichi equeicha Jesús paeba caeintha pomonaе pijimonaе tatsi jiwana icha pecayabara juta pepaebi diwesiyo, jeye: “Xam be jinya jiton itata taneme poxonaе naeputiyo itata jopiyatsi, ichitha jopa taem xua iruru xam nama pin naeputo neitacueretha ducua. Barapocotsi juta coyeneya ichi, xam ba jinya jiton cui taneme xua poxonaе abe exana, ichitha jopa nayaputaem xua iruru xam bara ichim nama bichocono abe exaname. ⁴²Icha jopa taem pin naeputo xua neitacueretha ducua, jopa caitacupaeyo xua nejeiwa jinya jitontha: ‘Tajiton, cata jutinchi naeputiyo xua ducua neitacueretha’, xua nejeiwa. Xam nepaebin xua ichun exana xua baxua neexanaewatha iru. Xam copiya nata jure barapo pin naeputo xua neitacueretha ducua. Bapoxonaе beta taename nejutsinexa tsane naeputiyo xua jinya jiton peitacueretha tarucuatsi”, jei Jesús.

**Meje yabara poxonaе Jesús yabara cuiduba xua
pinae jiwi yaputane nae penacoichixae
(Mt 7.17-20; 12.34-35)**

⁴³Jesús namchi, jeye: “Po naein pexeinya naein jopa bapana nacoichiyo po pethei camatsa thei. Barichi po naein camatsa naein jopa bapana nacoichiyo po pethei pexeinya thei. ⁴⁴Jiwi yaputane nae po nae penacoichixae. Daxita jiwi yaputane xua higo thei, po pethei pexeinya thei jopa bapana teracae po naetha sojei xua camatsa nae. Matautano jiwi yaputane xua uva thei po thei unbototha xuwa jopa bapana teracae naexitha. Bara juta ichi jiwi yaputane xua pebin pejuntu coyene xanepanaein pon xanepanaya peexanaeinxae. ⁴⁵Pon ba pejuntu coyene xanepanaein, bapon ba jame ba paeba pocotsiwa pexeinya coyene, pejuntu coyene xanepanaeinxae. Barichi pon ba peajuntucoyenebein bapon ba abe paeba, peajuntucoyenebeinxae. Pocotsiwa jiwi nanta xeina pejuntu coyenetha, baxua ba pecoiboto tsina cueicueijej”, jei Jesús.

**Meje yabara poxonaе Jesús ainya bomuxube yabara paeba
(Mt 7.24-27)**

⁴⁶Equeicha Jesús namchi, jeye: “Paxam pana neyabara jam: ‘Patatanecanamataxeinaem’, pajam, daichitha jopa paexanaem pocotsiwa

paca itorobatsi. ⁴⁷Incane yabara paca tsipaebinchi pon xua patopa taxantha, nejume naitomata pocotsiwa paeban, matautano exanano pocotsiwa ichichipan, bapon beta popona Nacom nexa. ⁴⁸Bapon barapocotsi juta coyeneya nacana exana icha be ichi pon bo acabanota peira matatsucaewatha xua ichaxota ira daunwei. Meje jeye: Copiya mũthũn tajũ exanareca pecuaranobinexa bomũxũ naeton. Poxonae mene matacaewaxuba, barapo bomũxũ jopa joparenaeyo poxoru naeton tajũ umenareca xuano poxoru bomũxũ uncua pematatsucaewatha ichaxota ira daunwei. ⁴⁹Ichitha nama pon nejume taetha, xuano jopa exanaeyo pocotsiwa ichichipan, bapon be meje: Bapon be pocotsin bo acabanota ichaxota ira matafatsana, xuano naeton jopa tajũ umenarecaeyo. Poxonae mene matacaewaxuba, barapo bomũxũ joparena poxoru naeton jopa tajũ umenarecaeyo, xuano poxoru bomũxũ uncua ichaxota ira matafatsana. Barapo bomũxũ nainya joparena. ¡Maisa bomũxũ bichocono abe!” jei Jesús.

**Meje yabara poxonae Jesús axaibi exana pon soldadomona
romanomona pia pentacaponaein tatsi tanacuitatsi**
(Mt 8.5-13)

7 ¹Poxonae Jesús baxuan najume weta xua barapomona jume tane, bapoxonae Capernaum tomara beya pona. ²Baxotiya popona romanomona soldadomona pia pentacaponaein tatsi, pon xeina pia petanacuiteibinchixaetsi. Barapon bichocono antobe pia petanacuitinchi. Bapon pon petanacuiteibin bichocono atene, xua awatha petũpae. ³Poxonae romanomona soldadomona pia pentacaponaein tatsi Jesús yabara jume tainchi, bapoxonae itoroba pitiri jiwi judiomona jiwanaapiwi Jesús beya xua petaxaibi exanaenexa tsainchi pia petanacuichin tatsi. ⁴Barapomona Jesús imoxoyo caquita poinchi. Barapomona Jesús jume daunweya tsipaebatsi, jeichichi:
—Barapo pentacaponaein, pentacui xanepanaein, daxota yawende. ⁵Poxoru bapon wanacuamona wũnae yabara cananta xeineibatsi. Matautano bapon itoroba xua acaba pata penacaetutsi bo pia paratixitha, jei barapo pitiri jiwi.
⁶Nexata Jesús barũ poinchi barapomona. Ichitha poxonae Jesús muxu pepatopae, romanomona soldadomona pia pentacaponaein tatsi pia botha tatsi, barapo soldadomona pia pepa pentacaponaein tatsi, bapon itoroba pia jiwi xua petacajume jeichinexa tsainchi Jesthath: “Tanecanamataxeinaein, xan saya tacui pawin. Auran xua xam nepatopaewa tsane tabohta tsipei xam ainya cuim. ⁷Daxota jopa patopaeinyo nexainya beya, tsipei xam ainya cuim, xua paebiname pia peatenewatha tatsi bapoxonae bapon axaibi bara tsane pon inta nacuiteiba. ⁸Xan bichi xeinan tanecanamataxeinaein, pon neitoroba. Barichirũ xeinan soldadomona pomona itorobeiban. Poxonae ichũn itoroban: ‘ponde’, jan, bapon pona. Poxonae ichũn waban: ‘antha’, jan,

bapon patopa. Pon inta nacuita, itoroban: ‘inta exande’, jan, inta exana”, jeye pentacaponaein, jei pomonae penacajume caitorobixaetsi.

⁹Poxonae Jesús baxua jume taeba, jume cui yabara cananthũthũ nanta xeinanaya cabenaeca beta pepaebixae romanomonae soldadomonae pia pentacaponaein tatsi. Jesús necotaba pomonae puna poinchi, barai, jeye:

—Xaniyan paca tsipaebatsi Israel nacuatha irũ dapocotsin jopa caxinaeinyo pocotsin icha pon iche pon tana necui yabara jume cowũntsin xua bara neitacũpa xua axaibi taexanaewa jiwi, jei Jesús.

¹⁰Poxonae barapomonae botha caibe nawibiya, barapomonae taeba dũcũpa xua axaibiya boca romanomonae soldadomonae pia pentacaponaein tatsi pia petanacuichin tatsi.

**Meje yabara poxonae Jesús petũpaein asũ exana pexanto
tatsi powa pecuenta tũpaewayotsi piseuri**

¹¹Poxonae Jesús baxua nacui weta, bapoxonae Naín tomara beya pona. Jesús cueyabatsi pijimonae, irũ pin bicheitomonaeno napona. ¹²Poxonae Jesús muxu pepatopae tomaratha, Jesús tane xua pewowin petũpaein cajojondenatsi xua pemũthũthũ xubinexa tsainchiba, pon pena tsita compa. Barapo pewowin powa pecuenta tũpaewayotsi piseuri barapowa pexanto tatsi. Barapowa puna poinchi pin bicheito. ¹³Bapon Jesús pon Pecanamataxeinaeinxae jiwi, barapowa yabara cui nanta xeinatsi. Jesús barai bapowa, jeye:

—Jopa wecoyande, jei Jesús.

¹⁴Nexata Jesús imoxoyo caquita pona petũpaein, yacaja jayabano. Pomonae yacaja capona yacaja caumenarũcũpa. Jesús barai petũpaein, jeye:

—Pewowin catsipaebatsi, nontaponde, jei Jesús.

¹⁵Nexata pewowin pon tũpa, nantacotecataba, yawa tamropata pitaba xua pecueicueijeiba. Jesús coxiwatha cana cobenata pexanto. ¹⁶Poxonae pin bicheito taerũcũpa baxua, barapo pin bicheito bichocono junuwa. Barapoxonae barapo pin bicheito Nacom wũnae jaintatsi, barapomonae namchi:

—Nacom peitorobi jume pepaebin, pon ainya cui, waxantha patopa. Nacom siwa pona peyawenaenexa pijimonae pomonae pia pejume cowũntsiwichi, jei barapomonae.

¹⁷Daxita jiwi jume tane xua Jesús exana Judea nacuatha, irũ po nacuan imoxoyo caquita ena Judea nacuatha.

**Meje yabara poxonae Juan itoroba pijimonae
Jesús beya peyainyabinexa tsainchi Jesús
(Mt 11.2-19)**

¹⁸Juan pijimonae tsipaebatsi daxita baxua xua Jesús exana. Juan waba ainya pebinbe pijimonae jiwana tatsi. ¹⁹Baponbe Juan itoroba Jesús beya

xua najume caruta baponbetha matauta xua Jesús peyainyabinexatsi xua icha metha bara baponde jei pon bewa patopeicaena, bapon Cristo, jei. Ichacuitha metha ichun jampa, xua pawunaewatsin jampa jei. ²⁰Bara baponbe ponbe Juan peitorobixaebe, baponbe imoxoyo Jesús caquita uncuatsibe. Baponbe Jesús baraichi:

—Juan pon jiwi Pebautisabin, bapon pana nejume caruta, bapon namchi: ‘¿Metha bara xaniwaicha baponda, pon bewa patopeicaena, bapon Cristo?’ jei. ‘¿Ichacuitha metha bara ichun pawunaewatan jampara?’ jei Juan, jei baponbe.

²¹Poxonae baponbe patopabe, Jesús axaibi exana peatenewi, iru pomonae pin domae xainchi, yawa taitaweta pomonae cauri xeina. Matautano yawenano xua equeicha tane pomonae jopa necotsiyoy.

²²Baponbe jume notatsibe. Jesús jume nota, jeye:

—Paponarebe Juan beya. Juan patsipaebarebe xuaunxuae pocotsiwa panecui tanemebe, matautano xuaunxuae pocotsiwa pana nejume tanemebeno. Matautano patsipaebarebe xua pomonae peitata nacutsi jiwi equeicha tane, matautano xua pomonae pejajuyajuyejimonae beta pona equeicha. Matautano xua pomonae peperu sawichimonae equeicha peru wunaewatsin, matautano xua pomonae pemuxusipanaewi equeicha muxu nasaba, matauta xua pomonae pewerapaewi equeicha asu. Matautano pomonae xua peacopeibiwi jume tane Nacom pia pexeinya pecapanenebiyae diwesi jume. ²³Patsipaebarebe Juan xua xan janje: ‘Juntu coyene weiweinaena pon jopa ainya unthuthunyo, pon xaniwaicha neyabara cui jume cowunta’, xua jan, jei Jesús.

²⁴Nexata ponbe Juan itorobabe ponabe Juan beya. Bapoxonae Jesús tsipaeba jiwitha, xua Juan yabara paebatsi, jeye barapomonaetha: “Ira xuepana susato tsurucuae nacuatha paponame. Poxonae bara beya paponame, ¿eta xua painyatsi? ¿Painya jume taetsi pebin pon ainya unthuthuto cui xeina icha be naepanaewa ichi xua saya joibo ba jubabiya caya tsaibi? Jume apara. ²⁵Bara paichim paponame, ¿painya nejume taenexa pebin, pon peitupanae paparuwa nama xatata? Jume apara. Payaputaneme pomonae peitupanae paparuwan nama xataba, barapomonaetha jinompa pexeinya bontha pomonae jiwi itorobiya pia pepa peewatsiwixatsi. ²⁶Jume. Jopa baxua patsiponaem xua jopa painya jume taenexa pebin pon ainya unthuthuto cui xeina, matautano xua jopa painya jume taenexa pebin pon peitupanae paparuwa nama xatata. Apra jame baxua patsiponaem xua painya nejume taenexa pon Nacom peitorobi jume pepaebin. Bapon Juan bichocono peainya cuin pon Nacom pia peitorobi jume pepaebiwi jiwanapin beyacaincha ichun pon Nacom peitorobi jume pepaebin. ²⁷Juan bapon apara, pon yabara paebatsi Nacom Pejume Diwesitha poxonae Nacom netsipaeba, nejeyi:

‘Catsiwanae itorobinchi copiya pon

tana nacajume carutsin.

Barapon jũntũ cui wũnaetsina jiwi,
xua daxita jiwi najũntũ cui
wũnaetsina xam nexa, xua necantenta
weyataeya wabinexa poxonae patopaename,
nejei Nacom Pejume Diwesitha.

²⁸Paca tsipaebatsi, xua daxita Nacom peitorobi jume pepaebiwi pomonae Juan tsiwanaya jinompatsi bayatha, dapocotsin aibi barapomonae jiwana pon yatsicaewa peainya cuin beyacaincha pon Juan, pon jiwi Pebautisabin. Juan peainya cui diwesi yabara cueicueijeji po coyene xua Nacom itorobina jiwi. Ichitha po diwesi xua tamonae anoxuae paeba barapo diwesi bichocono ainya cui diwesi beyacaincha xua Juan cueicueijeji, bequein jiwi nanta xeina xua tamonae jopa ainya cui jiwi.

²⁹“Daxita barapomonae baxua jume taerũcũpa. Irũrũ jume taerũcũpa pomonae paratixi pentoma noteibiwi romanomonae pia pepa peyanacua ewatsinchi nexa, pomonae bayatha Juan bautisaba. Daxita barapomonae nanta xeinarũcũpa xua Nacom bara pepa pentacui xanepanaein. ³⁰Ichitha fariseomonae irũ pomonae jiwi pecuidubiwi Moisés pia peitorobi coyene tatsi, barapomonae jume itaweta, Nacom jume itawetatsi pocotsiwa xua Nacom beexanaena barapomonae nexa. Mataũtano barapomonae cui itaweta, Juan cui itawetatsi xua pia pebautisabi coyenewa.

³¹“Jiwi pia Pecanamataxeinaeinchi tatsi, bapon Jesús namchi, jeye: ¿Eta pocotsimonae cui jũpatsi barapomonae pomonae xote jinompe pomonae Nacom jume itawetatsi? ¿Etabe jũta ichi barapomonae? ³²Barapomonae be pexui, pocotsixi panatha nabarũ jinompa. Nabarũ wawai tsurubenanaebiya. Barapoxi nabarai, jeye: ‘Bayatha oibo paca tsimumu obatsiba ichitha jopa panawirabim. Bayatha paca tsimumu wecoyeichiba icha be ichi poxonae ichũn tatũpatsi, ichitha jopa pana itanuwe jume notsim xua painya newecoyeinexarũ’, jei barapoxi. ³³Juan patopa pon jiwi Pebautisabin. Bapon jopa xaeyo pan. Mataũtano jopa apaeyo vino mera. Ichitha paxam pajam: ‘Apara Juan puna popoinchi cauri’, pajam. ³⁴Bapoxonae xan, ponxaein Nacom Tananeitapetsin patopan. Xan pan taxaein yawa vino mera taapaein. Paxam pana neyabara paebame, pajam: ‘Bapon maisa jopa juniya nabanaeyo, yawa jopa juniya apaeyo. Peatsacae jiwi abe peexanae jiwi pia jiton tatsi, irũ pomonae paratixi pentoma noteibiwi barapomonae pia jiton tatsi’, pana neyabara jam. ³⁵Nacom piamonae tatsi barapomonae tsita exana xua jiwi tsita exanatsi Nacom pia peyaputae coyeneintha tatsi. Po coyene barapomonae exana baxua Nacom tsita pexeinya coyenetsi”, jei Jesús.

Meje yabara poxonae Jesús siwa pona Simón fariseomonaepin pia bo beya tatsi

³⁶Caein fariseomonaepin bapon Jesús wabatsi petaxaenexa tsainchi pia botha. Jesús pona bara beya yawa naeca pexaethopaewatha

penanabanaenexa tsane. ³⁷Nexata petsiriwa patopa powa pesi cui weiweinaewa, powa barapo tomaratha popona. Barapowa yaputane xua Jesús nanabanaeicha fariseomonaе jiwana pintha. Barapowa alabastro ibo wun bosibu atsato capatopa Jesustha xua petuxuei nasiwa xua bichocono wunca. ³⁸Barapowa Jesús imoxoyo caquita wecoyei tsuncuaetsi yawa peitacuere mentha Jesús taxu atatsica exanatsi. Bapoxonaе barapowa pia pentanatha baxota Jesús taxu tsewa exanatsi. Barapowa Jesús taxu tsutsubatsi poxoru Jesús Pecanamataxeinaein jiwu. Bapoxonaе barapowa Jesús taxu eatabatsi petuxuei nasiwatha. ³⁹Poxonaе fariseomonaе jiwana pin pon Jesús pewabixaetsi petaxaenexa tsane pia botha, poxonaе bapon tane baxua, bapon pia coutha nabarai: “Icha bapon xaniwaicha tsipae pon Nacom peitorobi jume pepaebin tsipae metha yaputaetsipa xua powa jayabatsi apara powa pesi cui weiweinaewa, matautano xua bapowa powa peatsacaewa. Ichitha bapon xaniwaicha jopa daponyo pon Nacom itoroba”, jei barapon pon fariseomonaepin. ⁴⁰Nexata Jesús barai fariseomonaе jiwana jiton, jeye:

—Simón incane catsipaebinchi, jei.

Bapon jume nota, jeye:

—Pon jiwu Necuidubimxae, moya taema, jei.

⁴¹Jesús barai, jeye:

—Pebinbe nacueyatabe nacowaetabe paratixi ichuntha. Ichun jopa cataunxuae xuya catsiyo quinientos po paratiximonaеbe po paratixi quinientos po matabibe nexa poxonaе nacuita. Ichun jopa cataunxuae xuya catsiyo cincuenta po paratiximonaеbe pontha pon penacowaetsixaetsi. ⁴²Poxoru baponbe jopa itacupaetsibe xua xuya equeicha pecatsiwa tsanebe pontha pon penacowaetsixaеbe, daxota pon penacowaetsixaetsi paratixi, bapon namchi, jeye: ‘Metha basaya paca cui yabara junte mainatsibe’, jei. Incane netsipaebare Simón xua baponbe, çjintam yatsicaewa antobetsira xua beyacaincha ichun antobetsi xua antobe pon nacowaetatsi paratixi? jei Jesús.

⁴³Simón jume nota, Jesús jume notatsi, jeye:

—Bu, metha moya pon bichocono cacui yabara junte mainatsi bichocono pon penacowaetsixaе quinientos po paratiximonaеbe, jei Simón.

Jesús barai:

—Bara beta nejume notame, jei Jesús.

⁴⁴Nexata Jesús necota barapo petsiriwa, bapoxonaе Jesús Simón baraichi: Taema pocotsiwa barapo petsiriwa inta exana. Xan patopan jinya botha ichitha jopa meratha netaxu waexubim xua painya cui coyenyathaxae xua judiomonaе pamxae. Nama barapowa peitacuere mentha netaxu atatsica exana yawa pia pentanatha netaxu tsewa exana. ⁴⁵Xam jopa netsutsubim, ichitha bapowa poxonaе caena jonarenan awiya came netaxu tsutsuba.

⁴⁶Jopa nenta epatabim petuxuei tuxusi nasi mera. Ichitha barapowa petuxuei tuxusi nasi mera netaxu epataba. ⁴⁷Daxota catsipaebatsi xua bapowa matowa nasi cui matacaeta. Daxita baxuan yabara jüntemainan, daxota bichocono neantobe. Ichitha nama pon be conotha nasi cui matacaeta, be conotha yabara cui jüntemainan. Bapon be conotha neantobe, jei Jesús.

⁴⁸Equeicha Jesús namchi bapowatha. Petsiriwa baraichi, jei:

—Cacui yabara jüntemainaya jüntu puxana exanatsiba abe jinya neexanae cuiru coyenewan, jei Jesús.

⁴⁹Pomonae Jesús pebaru nabanaexaetsi, barapomonae nabarai, jeye:

—Bapon, ¿jintamda, jamaisa bapowa cacui yabara jüntemainaya jüntu puxana exanatsi abe pia peexanae cuiru coyenewan tatsi? jei barapomonae pomonae baxota naena.

⁵⁰Jesús barai petsiriwa, jeye:

—Bayatha necacapanepaewa caexainchi tsipei yabara tana nejume cowuntsixaem. Saya jüntemiya poponde, jei Jesús.

Meje yabara yabuxi powaxi Jesús yanabatsi

8 ¹Bapoxonae pirapae Jesús daxita tomarantha pona ducuaeta, tsica tomaraxithano po tomarantha pin tomaranthano. Matautano paeba ducuaeta Nacom pia pexeinya jume diwesi tatsi po diwesi yabara xua Nacom waba jiwi petanaexanaenexatsi piamonae pomonae Nacom jüntu coyene itorobiya ewata. Jesús yanabatsi pia peitorobiwi tatsi pomonae doce poyobe. ²Barichi Jesús yanabatsi petsiriwaxi, powaxi Jesús bayatha taitaweta cauri xuano axaibi exanano xua domae xainchi. Barapowaxi jiwana caewayo pewun María Magdalena, tsipei pia tomara tatsi pewun Magdala. Barapowa María powa bayatha taitawetatsi siete poyobe cauri. ³Bichiru petsiriwa, powa pewun Juana, bapowa napona. Bapowa Juana, Cuza piowa tatsi. Bapon Cuza pon Herodes pia bo tatsi tayapucaeatsi. Iru ichowa pewun Susana, bapowa napona. Iru ichowaxi ainya yabuxiru napona. Daxita barapowaxi Jesús upain exaneibatsi xua xoxi barapowaxi pexeinaexae.

Meje yabara poxonae Jesús cuiduba jiwi pecayabara

juta pepaebi diwesiyo xua pon peubin yabara

(Mt 13.1-9; Mr 4.1-9)

⁴Daxita tomaranpiwi pata. Poxonae pin bicheito nacaetuta Jesús cuiduba barapo bicheito po diwesiyo pecayabara juta pepaebi diwesiyo. ⁵Jesús barai: “Pebin pon peubin pontaba pia ubichi pabitha. Poxonae pon peubin ubauya, icha xu namtotha othopeica, pexu jiwi taxunaunaba, yawa pepupunaewi xu xane. ⁶Icha xu, xu othopeica ibowantha. Poxonae barapo xu xuwa, barapo xu, xu yunna poxoru

jopa tajũ xuwarecaeyo poxoru ibotixi nacũcũna yawa poxoru ira tsewa. ⁷Icha xu, xu othopeica ichaxota pesoiwana xuwinaena. Barapo xu yaboto nanta capanaba poxoru yawa muxuna xuwina pesoiwana. ⁸Icha xu, xu othopeica ichaxota ira wũnae. Poxonae barapo xu, xu xuwa, xu nawũnaeta. Cae xuto nacoita cien po xu matabũxũyobe”, jei Jesús.

Poxonae Jesús baxua paeba, bapoxonae jume daunweya namchi: “Icha pamuxu dubename, moya pana nejume naitaeware pocotsiwa tapaca tsipaebiwatsi”, jei Jesús.

**Meje yabara poxonae Jesús namchi xua exua metha
pecayabara jũta pepaebi diwesiyo yabara, jane jei
(Mt 13.10-17; Mr 4.10-12)**

⁹Nexata Jesús yainyabatsi pijimonae, barapomonae namchi, jeye: “¿Eta pocotsiwa yabara caunutame poxonae pana netsipaebame barapo pecayabara jũta pepaebi diwesiyo?” jei bapomonae. ¹⁰Jesús jume nota, jeye: “Meisa paxam yatsicaewa Nacom yabara paca yaputane exana po pecuidubiwa xua moya peyawũn xeinaewa. Barapo moya peyawũn xeinaewa apara xua Nacom exana xua paca cana exana xua painya nepaca itacũpaewa xua painya nenaexanaewa Nacom piamonae tatsi pam, pomonae pamxaem Nacom itorobiya paca ewata. Ichitha jame ichamonae meisa pomonae jopa nejume cowũntsiyo jopa daichichi Nacom jopa copatsiyo xua barapomonae peyabara yaputaewa baxua. Daxota barapomonae cuiduban pecayabara jũta pepaebi diwesintha xua Nacom peyabara yaputaenexatsi. Baxua paeban xua bequein pia tana necui taibenaewatha tsane ichitha jopa pia tana necui yaputaibenaewatha tsane. Yawa xua bequein pia tana nejume taibenaewatha tsane ichitha jopa pia tana nejume copi taibenaewatha tsane”, jei Jesús.

**Meje yabara poxonae Jesús pijimonae muxu yaputane exana po
diwesi xua pecayabara jũta pepaebi diwesiyo pon peũbin yabara
(Mt 13.18-23; Mr 4.13-20)**

¹¹Equeicha Jesús namchi: “Meje apara baxua yabara caunutan poxonae paeban pecayabara jũta pepaebi diwesiyo: Po xuto xua iratha xuwa nacoichiya xanepanaya exana. Barapo xuto yabara caunuta Nacom Pejume Diwesi xua poxonae pebin jũntũ coyene webocatsi pebin wũnaeya xanepanaya cana exanatsi. ¹²Po xuton xua namto beothopiya, aichurubena. Barapo xuton yabara caunuta xua jiwi bara jũntũ coyene weichichi caurimonae pia pentacaponaein tatsi. Jiwi jũntũ coyene weajumetsurubena exanatsi Nacom Pejume Diwesi xua bayatha po jume jume tane, xua bapoxonae jopa petajume cowũntsinexa tsainchi Nacom,

yawa xua jopa petana capanenebiyaenexa tsainchi Nacom beya xua Nacom exanaena. ¹³Po xuton xua xu othopa ibowantha, barapo xuton yabara caunuta po jiwi xanepanaya jume tane Nacom Pejume Diwesi xuano juntu coyene weiweinaya Nacom jume cowuntatsi. Ichitha bara caeto jume cowunta poxoru barapomonae antufaetabiya jume jeba Nacom Pejume Diwesi pejuntu coyeneintha. Matauta cauri juntu coyene wemuxu paeba xua abe peexanaenexa tsane. Daxota barapomonae cayabara juntemaina Nacom. ¹⁴Po xuton xua xu othopa pesoiwantha barapo xuton caunuta xua pomonae Nacom Pejume Diwesi jume tane ichitha saya barompaya pia juntu coyeneyatha jinompa, yawa saya u copei cayabara nanta xeina, yawa saya exana pocotsiwa juntu coyene weiweina cana exanatsi. Po coyene pebiwi exana baxuan barapocotsi juta coyeneya exana icha ichi xua po xuton be pesoiwantha xu othopiya. Barapo xuton jopa thei dubenaeyo. Barapocotsi juta coyeneya ichi, barapo jiwi jopa xanepanaya jinompaeyo Nacom nexa. ¹⁵Po xuton xua xu othopeica peira wunaewatha, bara nacoita. Barapo xuton yabara caunuta pomonae jume tane Nacom Pejume Diwesi xuano jume cowuntano poxoru juntu coyene xanepanaya jume tane. Matautano beta exana dubenanaebiya beya matapainya jiwi cui tane xua barapomonae juntu coyene xanepana Nacom peitabaratha tatsi”, jei Jesús.

**Meje yabara poxonae Jesús pijimonae tsipaeba
pecayabara juta pepaebi diwesiyo xua pecoicha yabara
(Mr 4.21-25)**

¹⁶Equeicha Jesús namchi: “Poxonae jiton pecoicha coicha exana bapoxonae jopa coicha matacatsiyo. Matauta jopa coicha exanaeyo cama peupana deca. Jame asiya coicha exanatsi, pecoicha taenexa pomonae jojoneibarena. ¹⁷Daxita pocotsiwa xua moya peyawun xeinaewa bexa tsane jiwi yabara yaputaena. Barichi barapo diwesi xua pecayabara juta pepaebi diwesi xua paebaponan jiwi itacupaeinchi xua peyabara yaputaewa tsane.

¹⁸“Pana nejume naitaeware painya neexanaenexa pocotsiwa paca tsipaebatsi. Pon ba be conotha Nacom yabara yaputainchi, Nacom bapontha cana exanaena xua ichawa peyabara yaputaewa tsane beya poxonae bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom peyabara yaputaewatsi, Nacom wepichina po coyene bapon yaputane xua beya daxota Nacom jopa pejume cowuntsiwa tsainchi”, jei Jesús.

**Meje yabara Jesús pena tatsi iruru peyapin jiwi tatsino
(Mt 12.46-50; Mr 3.31-35)**

¹⁹Nexata Jesús pena tatsi iruru peyapin jiwi tatsino pata ichaxota Jesús uncuca. Ichitha jopa Jesús imoxoyo caquita ponaetsi tsipei bichocono pin bicheito. ²⁰Ichun Jesús baraichi:

—Ena, irurũ neyapin jiwino pesato beya umena. Bepara bequein cataei, jei bapon.

²¹Jesús namchi barapomonaetha:

—Apara jame be taena tsicotan yawano be tayapin jiwi tsicotan pomonae xua jume tane Nacom Pejume Diwesi xuano xua exana pocotsiwa Nacom itoroba, jei Jesús.

**Meje yabara poxonae Jesús xainya ducuanaya exana joibo,
yawa maratsacano xainya mene ducuanaya exanano**
(Mt 8.23-27; Mr 4.35-41)

²²Caentacabi Jesús barũ pona pijimonae jeratha. Jesús pijimonae barai:

—Antha, poinchi icha muxunene beya, pucua beya, jei Jesús.

Bara ponarũcũpaba. ²³Poxonae cataunxuae jeratha yana enapona bapoxonae Jesús maituncuataba. Bapoxonae jemeicha pin joibo naetaba mentha. Matauta bichocono jera mene wũnca, muxu pebunarecae.

²⁴Nexata Jesús yaũbaxotsi. Jesús baraichi:

—¡Jesús, Patatanecuidubim, yana bunarecatsi! jei barapomona.

Nexata Jesús nacosataxuba. Jesús itawetaxuba joibo maratsacano. Daxita caewanaya joibo yawa maratsacano. ²⁵Nexata Jesús barai pijimonae:

—¿Jopa pana nejume cui yabara jume cowũntsim xua bara tana neitacũpaewa xua tapaca yawenaewatsi? jei Jesús.

Barapomona bichocono junuwa yawa najantũ coyene cabenaecarũcũpa. Barapomona caemonae natsipaeba, jeye:

—¿Jintam metha baponda? ¡Jamaisa bapon itaweta joibo yawa maratsacan xua daxita xainya dubenanaya! najei barapomona.

**Meje yabara xua pebin yabara pon caurimonae
pexeinaein pon Gerasa nacuapin**
(Mt 8.28-34; Mr 5.1-20)

²⁶Pirapaeyo jebouna Gerasa nacia itapatha, po itapa eca Galilea nacia icha itapa panawa beya. ²⁷Poxonae Jesús muxu penontounae jeratha, pebin pon copiya tomarapin pon equeicha aisowapin naexana, bapon patopa. Jesús caquita uncuatabatsi. Caena bayatha bapon puna jinompatsi caurimonae. Paparuwa jopa yawa poponaeyo, mataũtano botha jopa poponaeyo, saya ibo wountha poponeiba. ²⁸Poxonae Jesús tainchi, iratha jopa. Pentabocototha uncua bapon, Jesús peitabaratha tatsi. Jume daunweya wawai:

—Jesús, Nacom Pexantom, pon peitabocototha eca. ¿Eta pocotsiwa metha patopame taxantha? ¡Jume daunweya cabaraichi jopa neperaxa exanaeinde! jei.

²⁹Daxota bapon baxua paeba yaitama Jesús taitaweta cauri xua peponaenexa bapon pia xainya weya tatsi. Bapon matowa teiqueibatsi cauri. Bayatha bequein jiwi taxu cubeiba yawa pemaxuno penaintotha xua bapon xua jopa peponaenexa, ichitha bapon nain xuneiba. Bapon ira xuepana susato tsurucuae nacua beya itorobeibatsi cauri. ³⁰Jesús yainyaba:

—¿Eta po wum? jei Jesús.

Bapon jume nota exanatsi Jesustha. Bapon namchi, jeye:

—Tawun ayei, jei.

Baxua namchi tsipei bayatha cauri bicheito cunto pata bapontha.

³¹Equeicha barapo pebin cueicueije exanatsi barapo cauri bicheito cunto. Barapo cauri cunto namchi, jeye: “Jesús jopa pana neitawetsinde po nacua ira bereca ichaxota jiwi atene tsaibi”, jei bapon xua cueicueije exanatsi cauri.

³²Pin marrano duweimona pitapatororotha jinompa xua yawa xayompano. Caurimona Jesús jume daunweya wucatsi, jeye: “Pana nepu copabare marrano duweimonaetha”, jei. Jesús namchi: “Moya pataema”, jei. ³³Nexata caurimona pebin wepu ponatsi, yawa marrano duweimonaetha pata. Barapo marrano duweimonae ducupa, pin pitapatororo othopareca. Pucuatha bunothopa. Caurimona cabunothopatsi.

³⁴Pomona yapu eena barapo marrano duweimona junuwiya cuinaenouta tomarantha xuano tomaran aisowapiwi, xua pepaebinexa xua baxua exana.

³⁵Jiwi poxona baxua tane, pata baxota ichaxota Jesús uncua. Tainchi pon wepu poinchi caurimona. Bapon Jesús petaxu deca taecatsi, xuano paparuwa nama xatateca. Axaibiya eca, be pocotsin jopa matsiyaibichi. Barapo jiwi junuwa nawita. ³⁶Pomona copiya tane, barapomona equeicha tsipaeba ichamonaetha pomonaetha pomona jopa taeyo po coyene xua bapon equeicha jume xua copiya bequein caurimona pexeinaewa. ³⁷Poxona daxita barapo Gerasa nacuapiwi jume tane baxua, daxita barapomona Jesús itawetatsi xua pewarapaenexa bara weya xua Gerasa nacua weya, poxoru barapomona junuwa bichocono. Daxota Jesús jeratha nontabiya bara warapano. ³⁸Pebin, pon wepu poinchi caurimona, Jesús wucatsi xua bepara puna ponaetsei Jesús. Ichitha Jesús jopa copatsiyo xua pepuna ponaewa tsainchi bapon.

³⁹—Jinya bo beya ponare. Daxita paebare jiwitha xua bayatha Nacom cata exana, jei Jesús.

Pebin nawiya tomara beya yawa daxita paebano tomaratha xua po coyene bayatha Jesús taexana xua bapon tacana exanatsi.

**Meje yabara xua poxonae Jairo pexantiyo taaxaibi exanatsi;
yawa yabara xua bapoxonae iru icha yabuyo axaibi
exanatsi poxonae Jesús pia paparuwa tajayabatsiru
(Mt 9.18-26; Mr 5.21-43)**

⁴⁰Poxona Jesús caibe patoparena Galilea nacua berena, jiwi Jesús matenta weiweinaya wabatsi, tsipei daxita barapomona Jesús

ewatatsi. ⁴¹Nexata pebin patopa pon pewun Jairo. Bapon Jairo pon canamataxeina judiomonae pia penacaetutsi bo tatsi. Jesús petaxutha irabe tatayecarecatsi. Baxua Jairo exana poxoru Jesús pon ainya cui peexanaeinchi. Bapon Jairo Jesús jume daunweya wabatsi, jeye: “Antha tabotha ponare”, jei Jairo. ⁴²Bapon baxua paeba tsipei Jairo pexantiyo saya compa tatsi. Barapowayo doce po weibe xeina. Bapowayo muxu petupae.

Poxonae Jesús iya iru pin bicheito napona. Bichocono jiwi acucu. ⁴³Barapo pin bicheitha yabuyo iru napona. Bapowa caena bayatha beya yadoce po weiyobe jopa xua pentabu janatha boca xua be nantawane. Barapowa daxita cobe caewitatsi xua peaxaibi exanaenexa tsainchi. Pomonae jiwi peyawubiwi cobe caewita daichitha jopa axaibi exanaetsi. ⁴⁴Bapoxonae barapowa imoxoyo caquita uncuataba Jesús peputha tatsi. Barapowa Jesús pia paparuwa tatsi tajayabatsi xua peopirawa. Bapoxonae caena nainya bapowa ajaneibi tsanareca. ⁴⁵Nexata Jesús yainyaba barapo pin bicheitha, jeye:

—¿Jintam nejayabara? jei.

Daxita barapomonae paeba xua pinae jopa jayabichiba. Daxota Pedro barai:

—Patatanecuidubim, barapo pin bicheito acucu canapuna torobabiya tane, dacotsiwa jam: ‘¿Jintam nejayaba?’ jam, jei Pedro.

⁴⁶Ichitha Jesús jume nota:

—Ichun nejayaba tsipei taayapusuwa newepu jiwana aichurucuae xua axaibi exanan, jei Jesús.

⁴⁷Petsiriwa yaputane xua cobe yaputainchi xua Jesús cobe yaputane poxonae bapowa jayaba. Barapowa junuwiya patopa yawa pentabocototha uncu ira betaeuncuarecano Jesús petaxutha tatsi. Baxua exana bapowa poxoru Jesús ainya cui peexanaeinchi. Nexata barapowa namchi barapo bicheito peitabaratha, jeye:

—Apara xan jayaban. Poxonae jayaban caena nainya axaibin, jei.

⁴⁸Nexata Jesús barai, bapowa baraichi, jeye:

—Yabuyo caaxaibi exanatsi tana neyabara jume cowuntsixaem xua bara tana neitacupaewa xua tacaaxaibi exanaewatsi. Saya junte miya poponde, jei Jesús.

⁴⁹Poxonae cataunxuae Jesús tsipaeba xua bapowatha, pebin patoparu pon Jairo pia bo tatsi weya pona. Bapon tsipaeba pontha pon pecanamataxeinaeinxae judiomonae pia penacaetutsi botha tatsi pon Jairo. Jairo baraichi, jeichichi:

—Nexantiyo bayatha cata tupa. Jopa came fayacotsinde pon jiwi Pecuidubim, jeichichi Jairo bapon.

⁵⁰Ichitha poxonae Jesús jume tane baxua, xua Jairo baraichi, Jesús barai, Jairo baraichi, jeye:

—Jopa junuwinde, maisa saya nejume cowunde. Nexantiyo cata axaibi tsane, jei Jesús.

⁵¹Poxonae botha pata, Jesús jopa juntucuru bebaru joniyaeyo ichamonae. Saya meisa Pedro iru Santiago iru Juan iru powayo tupa paxa tatsi, bapon Jairo yawa pena tatsi, Jesús baru joniya barapomonae. ⁵²Daxita barapomonae yabuyo siwa wawaya wecoyeichi. Ichitha Jesús barai barapomonae, jeye:

—Jopa pawecoyande, yabuyo apara jopa tupaeyo, maituncua apara, jei Jesús.

⁵³Ichitha Jesús jume caponatsi barapomonae. Tsipei barapomonae yaputane xua yatsicaewa apara tupa barapowayo. ⁵⁴Nexata Jesús jume daunweya cobe pichiya barai, jeye:

—iJa, owae asiya uncuatabare! jei Jesús.

⁵⁵Barapowayo equeicha petupaewa nacosataxuba, caena nainya asiya uncuataba. Jesús itoroba barapomonae xua barapowayo peapatsinexatsi pexaewa. ⁵⁶Barapowayo paxa tatsi iru pena tatsi najuntu coyene cabenaecaeya tanebe. Jesús barapomonae tsipaeba xua jopa cui yopichi tsainchi ichamonaetha xua po coyene bapon peexanaexae.

**Meje yabara poxonae Jesús pijimonae itoroba xua barapomonae
peyabara cueicueijeinexa jiwitha po coyene xua Nacom
waba jiwi xua petanaexanaenexatsi pijimonae tatsi
(Mt 10.5-15; Mr 6.7-13)**

9 ¹Jesús pijimonae caetuta pomonae xua doce poyobe. Yawa pijimonae cata pia peayapuswa. Matautano catano peitorobi coyenewa xua barapomonae peitaweteibinexa tsane cauri xuano xua peaxaibi exanaenexa tsaibi tsane jiwi pomonae atene. ²Jesús itoroba barapomonae xua barapomonae peyabara cueicueijeinexa tsane jiwitha xua po coyene Nacom waba jiwi xua petanaexanaenexatsi pijimonae pomonae itoroba peewatsixae. Matautano itoroba xua barapomonae peaxaibi exanaenexa tsane jiwi pomonae atene. ³Jesús barai pijimonae: —Jopa pacaponaeinde ichawa xua painya necawarapaenexa. Matautano jopa iwabi pacaponaeinde, yawa jopa cote pacaponaeinde. Matautano jopa pacaponaeinde pexaewa, yawa jopa pacaponaeinde paratixi. Saya cae camisa panama xatabare, jopa icha camisan pacaponaeinde. ⁴Botha po botha papatsiname, bara po botha painya nepu enaeinde bapoxonae barapo botha painya nepu warapaeinde. ⁵Pomonae xua ichaxota jopa paca matenta weyataya wabiyo barapo tomara weya pawarapare. Pana taxu wenunubabare tsorobon po tsorobon painya taxutha dubena. Baxua paexande xua barapomonae peyaputaenexa xua abe exana paxamtha, jei Jesús.

⁶Bara barapomonae ponarucupa. Matautano barapomonae pona daxita carepaya peya tomaraxitha. Matautano papaeba tsiniya Nacom pia

pecapanenebiyae diwesi jume tatsi. Yawa axaibi exana tsiniyano jiwi pomonae atene.

**Meje yabara poxonae Herodes Juan yabara jume
unthuthu deideijeichi pebexubixaetsi bayatha
(Mt 14.1-12; Mr 6.14-29)**

⁷Bapoxonae Herodes Galilea nacuapiwi pia peyanacua ewatsinchi daxita jume tane xua Jesús exana. Bapon Herodes jopa xapain beta nanta xeinaeyo. Tsipei ichamonae catsawa Jesús yabara namchichi: “Apara bapon Juan, pon bequein bayatha tupa, equeicha asu juina”, jei. ⁸Iru ichamonae namchi: “Bapon apara Elías, pon tsita naituta jiwitha”, jei. Iru ichamonae namchi: “Apara pomonae bayatha Nacom peitorobi jume pepaebiwi, barapomonae jiwana, bapon apara, pon petupaein equeicha juina”, jei barapomonae. ⁹Ichitha Herodes namchi:

—Bara bayatha ichamonae cobe itorobacumba xua Juan pewisi ucuibiwatsi. ¿Jintam metha bapon xua yabara jume tan nawita xua pinae peitupanaewan exana? jei.

Herodes bichocono beyaitaena, Jesús beyaitaeinchi pon wanae peexanaein.

**Meje yabara poxonae Jesús apata pexaewa cinco mil pebiwi
(Mt 14.13-21; Mr 6.30-44; Jn 6.1-14)**

¹⁰Poxonae pata pomonae Jesús itoroba, barapomonae Jesús tsipaebatsi pocotsiwa xua barapomonae exana. Jesús tsana baru jopa barapo pijimonae tatsi xua pin bicheito weya. Ichaxota jiwi aibi, Jesús bara beya baru pona pijimonae, Betsaida tomara pecuariya beya baru pona.

¹¹Ichitha poxonae barapo bicheito yaputane xua xota Jesús ponaena, barapo bicheito iru Jesús puna poinchi. Jesús matenta weiweinaya waba barapo pin bicheito. Matautano Jesús yabara tsipaeba barapo bicheitha po coyene xua Nacom waba jiwi petanaexanaenexatsi pijimonae pomonae itorobiya pecanamataxeinaexae. Matautano Jesús axaibi exana atenemonae.

¹²Poxonae imoxoyo tabopiya Jesús barompaya pijimonae tatsi pomonae xua doce poyobe, barapoyobe Jesús imoxoyo caquita umenarucupatsi. Jesús baraichichi, jeye:

—Barapo bicheito itorobare pejeichinexa tsane xua ichaxota maichina xuano xua pexaewa pejeichinexa tsane tomaranxitha yawa po bon pipatoha umena, poxoru xote aibi pexaewa yawa bon xua ichaxota pemaichiwa tsane, jeichichi Jesús pijimonae.

¹³Ichitha Jesús barai pijimonae:

—Paxam paapare pexaewa, jei Jesús.

Jesús jume notatsi pijimonae:

—Saya apara cinco po panbe paxeinan matautano saya ainyoyobe paxeinan duweiyobe. Apara acoibi tsipei pin bicheito. Metha paponan pata comotsinexa icha pexaewa, daxita barapomonae nexa, jei.

¹⁴Barapo bicheito be cinco mil pebiwi. Nexata Jesús pijimonae barai:

—Pana nantaure xua ichamonae tsana eeniyaena be cincuenta po matabuxyobe tsiniya, jei.

¹⁵Bara Jesús pijimonae tatsi exana pocotsiwa xua Jesús paeba.

Bapoxonae barapo pin bicheito iratha ena. ¹⁶Bapoxonae Jesús pan pita cinco po panbe, yawa duwei ainyobe pitano. Jesús itaboco benecoicha, Paxa tsipaeba: “Axa, maisa juntu coyene weiweinan xua pexaewa pata tanecatsiwaxaem”, jei Jesús. Poxonae Jesús epa janaquiya nacobe weta, pijimonae caitoroba xua pecatsibaponaenexa tsane barapo bicheitho. ¹⁷Bara daxita nabane, yawa bara daxita jain cowuntarucupatsi.

Bapoxonae Jesús pijimonae tatsi doce po cote matabuxyobe wunba xua bayatha nacopaba pocotsiwa xua bayatha barapo jiji jopa xaeyo petonsanaexae.

Meje yabara poxonae Pedro namchi Jesthaja jeye:

“Xam apara Mesías pon Nacom caitorobica”, jei Pedro

(Mt 16.13-19; Mr 8.27-29)

¹⁸Caentacabitha Jesús Nacom tsipaebawiya, meisa pijimonae baru pona. Bapoxonae Jesús yainyaba pijimonae, jeye:

—¿Eta jiji neyabara jei po coyene xua xan bapon aparan? jei Jesús.

¹⁹Barapomonae Jesús jume notatsi, jeye:

—Ichamonae cayabara, jei: ‘Apara bapon Juan pon jiji Pebautisabin, pon equeicha petupaen asu juina’, jei. Iru ichamonae cayabara, jei: ‘Apara bapon Elías, pon equeicha petupaen asu juina’, jei. Iru ichamonae cayabara, jei: ‘Apara bapon jiwana pomonae Nacom peitorobi jume pepaebiwi, pon petupaen equeicha asu juina’, jei, Jesús pijimonae tatsi.

²⁰Nexata Jesús pijimonae yainyaba, jeye:

—Incane iru paxamdu, ¿eta pana neyabara jumichimdu xua xan eta pondun? jei Jesús.

Pedro jume epa pita:

—Xam apara Mesías, pon Nacom caitorobica, jei Pedro.

Meje yabara poxonae Jesús nayabara diwesi

paeba po coyene xua petupaewa tsane

(Mt 16.20-28; Mr 8.30-9.1)

²¹Jesús pijimonae muxu barai, xua pijimonae jopa peyabara paebinxatsi ichamonaetha baxua. ²²Yawa barai pijimonae po coyene xua bexa ichamonae Jesús cana exanaeinchi. Jesús namchi, jeye:

—Xan ponxaein Nacom Tananeitapetsin, jiwi bichocono neperaxa jubina. Matautano pitiri jiwi iruru sacerdotemonae pia pentacaponae wi tatsi, iruru pomonae jiwi pecuidubiwi Moisés pia peitorobi coyenewa tatsi, daxita barapomonae neitawetsina. Matautano barapomonae nebexubina. Ichitha equeicha asu poponaein poxonae acobi po matabiyobe tsuxubi tsane, jei Jesús poxonae nayabara paeba.

²³Bapoxonae Jesús barai daxita pijimonae, jeye:

—Icha pebin ichichipa xua tajiwiwimonae jiwanapin penaexanaewa tsane bewa bapon yabara naitematsi pocotsiwa xua bapon ichichipa pia peexanae coyenewan tatsi. Bapoxonae jame bapon bewa eexanaponae daxita matabi pocotsiwa itoroban bequein bara bapon bexotsi ichamonae, tajiwiwimonae jitonxae. ²⁴Pon naantobeya nata exana pocotsiwa bapon ichichipa, bapon jopa xeinaeyo peajuntuyapuswa, po peajuntuyapuswa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan bapon xeinaena peajuntuyapuswa, po peajuntuyapuswa ataya tsiteca xua Nacom pia nacua beicha. ²⁵Icha pebin bichocono copei xeina pocotsiwa xeina po cae pin nacuathe, ichitha jopa xeinaeyo peajuntucoyeneswa, po peajuntucoyeneswa ataya tsiteca, bapoxonae bapon jopa itacupaetsi xua penajuntu coyene capanepaewa xua jopa peweraweracaewa. ²⁶Icha ichun neacaura, yawa nejume diwesi acaurano, xan ponxaein Nacom Tananeitapetsin xuya bapon acauran tsane. Baxua exanaein poxonae patopaetsicaein be jiwi pia pecanamataxeinaein tatsi yaitupanae susato patopaetsicaein. Taxa pia peitupanaewa tatsi yawa patopeicaein. Matautano Taxa pia matatsunpiwi tatsi nebaru patsicaena, jei Jesús. ²⁷Bara xaniwaicha paca tsipaebatsi xua pomonae xote umene abu barapomonae jopa werapae tsane. Barapomonae jiwana copiya matha necotsina xua po coyene Nacom waba jiwi xua petanaexanaenexatsi piamonae pomonae itorobiya peewatsixae, bapoxonae barapomonae werapaena, jei Jesús.

**Meje yabara poxonae Jesús pijimonae peitutha
pexeinya itupanae coicha tsanaya naexana
(Mt 17.1-8; Mr 9.2-8)**

²⁸Poxonae ocho po matabibe jopa xua poxonae Jesús barapo diwesi paeba, bapoxonae Jesús pona demxuwa beicha petsipaebinexa Nacom. Pedro iru Juan iru Santiago barapo matabuxyobe baru poinchibe.

²⁹Poxonae Jesús cataunxuae Nacom tsipaebauya, bapoxonae icha itabara tsanaya. Matauta penama xatatsiwano inyapana tsanaya yawa bichocono daedaena tsanaya. ³⁰Nexata pebinbe yaitupanae be damacu patopabe. Baponbe, iru Jesús, bapoyobe nabaru cueicueijeibe. Ponbe xua Jesús jemeicha tsita patopatsibe, bapon Moisés iru ichun pewun Elías, ponbe xua caena bayatha naxubabe. ³¹Baponbe yabara baru cueicueijeibe

xua Jesús petupaewa tsane xua peraxa jabinchi ichamonae Jerusalén tomaratha. ³²Bequein Pedrobarũ bichocono itamaipana daichitha nacosatumena. Pedrobarũ tane xua Jesús yamatawacaicha pexeinya itupanae be damacu tsuncuaetsi. Matautano Pedrobarũ tane ponbe Jesús barũ uncua, Moisés irũ Elías. ³³Moisés irũ Elías, poxonae baponbe Jesús weya naetababe, bapoxonae Pedro Jesús baraichichi, jeye:

—Jiwi Necuidubin, maisa wũnae xua xote pata umenaewa. Pacata acabinchi acobi po boutobe, cae bouto xam nexa, icha bouto Moisés nexa, icha bouto Elías nexa.

Ichitha Pedro beta jopa yaputaeyo xua baxua paeba. ³⁴Poxonae Pedro cataunxuae barũ cueicueijeí Jesús, bapoxonae daxita pexainya bematawacaicha tarunicatsi tsaquinaebowa. Poxonae barapomonae tsaquinaebowa tututha nataerũcũpa bichocono junuwa. ³⁵Nexata barapomonae tsaquinaebowatha pejume jume tane xua Nacom namchi, jeye: “Bapon apara Taxanto, pon bichocono antobein, pon itapetan. Bapon beta pajume taema pocotsiwa paca tsipaeba”, jei Nacom.

³⁶Poxonae Nacom najume weta, Pedrobarũ necobarũcũpa xua Jesús beya compa uncua. Pedrobarũ saya moya. Jopa pejumeyo ichamonaetha xua tane.

Meje yabara poxonae Jesús cauri taitaweta xua pewowin xeina
(Mt 17.14-21; Mr 9.14-29)

³⁷Baya poxonae Jesús barapo acobi poyobe pijimonaebe dabe barũ dunareca Jesús pin bicheito matenta poinchi. ³⁸Nexata barapo bicheitha jiwana pebin, bapon jume daunwei wawai, jeye:

—Jiwi Necuidubin, incane inta taema taxanto. Bapon taxanto inta compa pebin. ³⁹Taxanto inta waetabatsi cauri, inta papai exanatsi, yawa inta iratha bebaichi. Matauta inta coibo thamthamei exanatsi poxorũ matayaibatsi exanatsi. Inta taxanto cui tatainchi jopa bepu sorobabeibichi barapo cauri. ⁴⁰Bayatha bequein jinyamonae jume daunweya cui itoroban: ‘Painta taxanto taitawere cauri’, jan. Ichitha jopa itacũpaetsi xua taxanto inta petaitawetsiwatsi cauri, jei pewowin paxa tatsi.

⁴¹Jesús barai pin bicheitha, jeye:

—iPaxam barapomonae pam pomonae jopa xapain cataunxuae pana nejume cowũntsim! iPaxam barapomonae pam, peajũntũcoyenebe jiwi pam! ¿Eta po weibe nantawenonan xua bewa tapaca barũ ecaewa tsainchi xua beya poxonae tapana nejume cowũntsiwam tsane? ¿Matautano eta po weibe equeicha nantawenonan xua tapaca cayawenaewatsi tsainchi? jei Jesús.

Nexata Jesús barai pewowin paxa tatsi, jeye:

—iNexanto inta carenande! jei Jesús.

⁴²Poxonae pewowin cataunxuae Jesús itiya poinchi, bapoxonae equeicha pewowin iratha xotsi cauri. Equeicha pewowin coibo

thamthamei exanatsi. Ichitha Jesús taitaweta cauri pewowin. Jesús axaibi exana pewowin. Equeicha Jesús caewa cata. Coxiyán caewa catatsi pexantoxae. ⁴³Daxita barapo pin bicheito yabara najuntũ coyene cabenaeca pocotsiwa pewowin pexeinya coyene taexanatsi Nacom.

Meje yabara poxonae equeicha Jesús nayabara paeba xua poxonae tũpaena
(Mt 17.22-23; Mr 9.30-32)

Poxonae awiya cataunxuae yabara najuntũ coyene cabenaecompa barapo pin bicheito pocotsiwa Jesús exana, bapoxonae Jesús pijimonae barai:

⁴⁴—Incane beta pajume taema, yawa jopa pana nejume cayabara jũntemainaeinde. Xan, ponxaein Nacom Tananeitapetsin jiwi, necaenaetsina ichamonaetha xua tanebexubinexa tsane, jei Jesús.

⁴⁵Ichitha Jesús pijimonae jopa xapain jume yaputaetsi xua barai. Barapomonae jopa tacopatichi Nacom xua Jesús pejume yaputaewa tsainchi. Barapomonae junuwa xua Jesús yabara peyainyabiwa tsainchi xua Jesús yaputane peexanaenexa xuaunxuae paeba.

Meje yabara poxonae Jesús yabara yainyabatsi pijimonae
po coyene xua pon peainya cui peexanaeinchi
(Mt 18.1-5; Mr 9.33-37)

⁴⁶Nexata Jesús pijimonae tatsi caemonae yabara nayainyaba, najei: “¿Jintam paxantha bichocono peainya cuinda xua beyacaincha ichũn?” jei. ⁴⁷Jesús yaputane baxua pocotsiwa barapomonae yabara nanta xeina. Nexata Jesús cobe pita pexuyo yawa pexainya cuaranoreca. ⁴⁸Nexata Jesús barai pijimonae:

—Pon matenta weyataeya waba peyawenaenexa pontha pon tana nejume cowũntsixae xua pocotsin icha be barapocotsi pexuyo ichi barapon bara apara nententa weyataeya waba. Xan jopa meisa nententa weyataeya wabiyo apara bara irũ matenta weyataeya wabatsi pon tana neitorobixae xua pon bara Nacom. Daxota pon paxam jiwana pam, pon jopa paca tsita ainya cuiyo, bapon jame Nacom tsita ainya cuichi, jei Jesús.

Meje yabara poxonae Jesús barai pijimonae:

“Pon jopa nacata abe exanaeyo, bapon ba apara naca yawena”, jei
(Mr 9.38-40)

⁴⁹Nexata Juan Jesús baraichi, jeye:

—Ja Tanecuidubim, paxan caein patan pon cawũn taiba poxonae itaweta caurimonae, xua caurimonae itawetatsi. Paxan baxua pacui itawetan tsipei jopa naca puna poponaeyo, jei Juan.

⁵⁰Ichitha Jesús jume nota, jeye:

—Jopa pacui itawetsinde, tsipei pon jopa nacata abe exanaeyo bapon ba apara naca yawena, jei Jesús.

Meje yabara poxonae Jesús jume itaweta, Santiago iru Juan jume itawetatsibe

⁵¹Poxonae imoxoyo matabi jopaena, po matabitha Jesús athabe icha tsane, xua Nacom exanaena, bapoxonae Jesús bichocono awiya nantusuba xua peponaewa tsane Jerusalén tomara beya. ⁵²Jesús nawuna jume caitoroba pia jitonbe tatsi. Barapo Jesús pia jitonbe tatsi ponabe Samaria nacua beya. Ponabe xua bo tutu pewucaenexa tsanebe po tomara barapo Samaria nacua eca xua Jesús peecaenexa. ⁵³Ichitha barapo tomarapiwi xua Samaria nacua jinompa, barapomonae aichaxaibi xua Jesús weiweina pententa wabiwatsi baxota poxoru barapomonae yaputane xua Jesús pona Jerusalén tomara beya. ⁵⁴Ichitha Santiago iru Juan poxonae baxua tanebe, ponbe bequein tawucabe bo tutu Jesús nexa, baponbe Jesús baraichi, jeye:

—Patatanecanamataxeinaem, cxam ichichipame xua paxan isoto pawucaein po isoto xua itaboco wetsica xua petautsinexatsi barapomonae? jei baponbe.

⁵⁵Nexata Jesús pijimonae napatomeicha necota yawa jume itaweta.

⁵⁶Nexata equeicha Jesús pijimonae baru pona icha tsiqui tomariyo beya.

Meje yabara poxonae Jesús yabara paeba pomonae

ichichipa xua pepuna ponaewatsi

(Mt 8.19-22)

⁵⁷Poxonae namtotha enapona, pebin Jesús baraichi, jeye:

—Patatanecanamataxeinaem, ichichipan xua tacapuna ponaewatsi xua ichaxota poname, jei pebin. ⁵⁸Jesús jume nota, jeye:

—Namomonae ba pia muthun xeina ichaxota pemaitathopeibiwa. Iru peyapupunaewi ba coton xeina ichaxota peyamaitathopeibiwa. Nama xan ponxaein Nacom Tananeitapetsin nama jopa daichinyo. Nama jopa xeinaeinyo bo xua tabo xua xota nafinacaecan, jei Jesús.

⁵⁹Jesús barai ichantha, jeye:

—Nepuna ponde.

Ichitha bapon Jesús jume notatsi, jeye:

—Tanecanamataxeinaem, nepu copare xua taxa matha muthutha xubichi copiya xua bapoxonae tacapuna ponaenexatsi, jei.

⁶⁰Jesús jume nota, jeye:

—Bara copare xua petupaewi muthucaeinchi, pomonae xua be pewerapaewi jopa betanejume cowuntsiwixae, barapomonae muthucaena. Ichitha xam ponare jinya neyabara tsipaebinexa jiwitha po coyene xua Nacom waba jiwi petanaexanaenexatsi pijimonae pomonae itorobiya pecanamataxeinaexae, jei Jesús.

⁶¹Nexata ichun Jesús baraichi, jeye:

—Tanecanamataxeinaem, ichichipan xua tacapuna ponaewatsi. Ichitha copiya bara necopare xua tana napeyabiwa tsane tamonae, tabopiwi, jei bapon.

⁶²Jesús jume nota:

—Pebinba jopa itacupaetsi xua beta penacuichiwa pabi icha saya napatomeicha necobiya nacuita. Barapocotsi juta coyeneya ichi, icha pebin exana Nacom pia petanacuichiwa tatsi jopa xapain exanaeyo xua peyabara paebiwa po coyene xua Nacom waba jiwi petanaexanaenexatsi pijimonae pomonae itorobiya pecanamataxeinaexae icha bapon saya cayabara nanta xeina pocotsiwa barapo cae pin nacuathe xeina, jei Jesús.

Meje yabara poxonae Jesús pijimonae itoroba setenta y dos poyobe pebiwi

10 ¹Barapoxonae Jesús pon jiwi Pecanamataxeinaeinxae tatsi, bapon itapeta equeicha icha pijimonae tatsi setenta y dos poyobe. Daxita tomarantha Jesús itoroba be dos poyobe tsiniya, tsica tomaraxithano, pin tomaranthano xua ichaxota Jesús cotacaya ponaena. ²Jesús barai barapomonae poxonae muxu peitorobi, jeye: “Bara xaniyeya paca tsipaebatsi. Pabitha ba pocotsiwa peubiwan naweta nawita, daichitha ba penacuichiwi pomonae jota pinmonae aibi. Bara juta ichi barapo cae pin nacuathe. Jiwi pinmonae jinompa pomonae nantawenona pejume taenexa Nacom pia pexeinya jume diwesi tatsi. Daichitha pomonae Nacom Pejume Diwesi cueicueijeji tsurubenanaebiya ichamonaetha barapomonae pinmonae aibi saya tsiquimonaeyo. Daxota Nacom pawucare xua pecaitorobinexa tsane ichamonae xua petacamuxu tsipaebinexa tsainchi pia pejume diwesi pomonae barapo cae pin nacuathe pejinompaewi nexa. ³Paponde ichaxota paca itorobatsi. Paca itorobatsi pia xainya beya pomonae jopa jume cowantsiyo, pomonae itacupatsi xua abe painya nepaca exanaewa icha oveja ichi xua poxonae pona ichaxota neuthu jinompa xua itacupatsi xua abe peexanaewatsi. ⁴Jopa pacaponaende cote. Yawa paratixi jopa pacaponaende. Yawa jopa pacaponaende painya nenataxu xatabiwan. Matauta jopa ichamonae namtotha paewatumeyaeinde xua saya painya netsipaebinexa. ⁵Poxonae bomuxutha pajojoniyaename, barapo bopiwi pajacobare, pajande: ‘Barabu Nacom juntema jinompa paca cana exanaena’, pajande. ⁶Icha baxota jinompa pomonae juntema jinompa, baxua Nacom taexanaena xua papaebame. Ichitha icha baxota jinompa pomonae jopa juntema jinompaeyo, baxua Nacom jopa taexanae tsane xua papaebame. Equeicha caewa pacata parenana xua baxua papaebame. ⁷Barapo botha paenare. Paxaema paapareno pocotsiwa barapomonae paca apata. Painya xoba paauram xua paca cata tsipei baraxua xua paca cata painya matoma painya netanacuichixae Nacom. Jopa ichawa beya paponaeinde bontha, saya bara po botha paenare. ⁸Poxonae tomaratha papanenebiyam, icha barapomonae paca matenta weyataeya waba, moya paxaema pocotsiwa barapomonae paca apata. ⁹Axaibi paexande peatene jiwi, pomonae xua barapo tomaratha ena. Barapomonae pabarande: ‘Anoxuae Nacom

waba jiwi xua petanaexanaenexatsi piamonae tatsi pomonae itorobiya peewatsixae', pajande. ¹⁰⁻¹¹Ichitha poxonae icha tomaratha papatsiname icha barapo tomarapiwi jopa paca matenta weyataeya wabiyo, pajande barapomonaetha: 'iPo tsorobon panataxu wenunubaban painya tomaratha, apara xua abe paexaname pata xainya berena poxonae pana nejume itawetame! Payaputaema, anoxuae Nacom waba jiwi petanaexanaenexatsi piamonae tatsi pomonae itorobiya peewatsixae ichitha pana nejume itawetame pomonae Nacom pata tana neitorobiwi panxaein', pajande. ¹²Xaniyeya paca tsipaebatsi matabi patopaena. Barapo matabitha Nacom yabara paebina jiwi xua penatsicuentisiwa xua petsita exanaexaetsi. Barapo matabitha jopa juniya bichocono atene tsane pomonae paca jume itaweta. Ichitha nama pomonae barapo tomaratha jinompa pomonae paca jume itaweta jopa juniya atene tsane, beyacaincha poxonae Sodoma tomarapiwi atene", jei Jesús.

**Meje yabara poxonae Jesús yabara paeba po
tomaranpiwi jopa pejume cowantsiwichi
(Mt 11.20-24)**

¹³Jesús equeicha pijimonaetha namchi, pomonae setenta y dos poyobe xua ichamonae yabara paebatsi, jeye: "iPai jaibo Corazín tomarapiwi tsobena! iRru Betsaida tomarapiwi tsobena! Po tsita itutsi coyenewan exanan Corazín tomaratha yawa Betsaida tomaratha ichun jopa bapana exanaeyo barapo tsita itutsi coyenewan Tiro tomaratha yawa Sidón tomaratha. Icha barapo tsita itutsi coyenewan exanaetsipa Tiro tomaratha Sidón tomarathano, barapo tomanbepiwi icha penanta xinae coyenewatha yabara nanta pentsipa Nacomtha. Barapomonaetha iratha enaetsipa yawa paparuwan nama xatabichipa xua pocotsiwa be peru mapaton xua axun, yawa ipuna nacaxuebichipa pia pepontha. Barapomonaetha baxua exanaetsipa xua ichamonae petsita itapeinya xeinaenexa tsainchi xua icha juntu coyenein Nacom petsita xeinaewatsi peauraxae xua abe peexanaexae. ¹⁴Poxonae barapo matabi patopeicaena po matabitha Nacom yabara paebina daxita jiwi xua petsita natsicuentisixae xua abe petsita exanaexaetsi, Tiro tomarapiwi, Sidón tomarapiwino, daxita barapo tomarabepiwi bichocono peraxa jubebinchi. Ichitha nama paxam pomonae Corazín tomarapiwi pam, iruru Betsaida tomarapiwi pamdu, daxita paxam jopa juniya paca peraxa jubebi tsane, beyacaincha xua peraxa jubebinchi Tiro tomarapiwi iru Sidón tomarapiwi. ¹⁵iIncane iru Capernaum tomarapiwi pamdu! ¿Bara pananta xeiname xua paca capanenebiya tsane peitaboco beicha? Jume, apara paca itorobina petupae coyene cuiru bereca.

¹⁶"Pon xua paca jume naitawata, barapara nejume naitawataru. Pon xua paca jume itaweta, barapara nejume itaweta xan berena.

Pon xua nejume itaweta, barichi Nacom jume itawetatsi pon xua tana neitorobixae”, jei Jesús.

Meje yabara poxona equeicha caibe parenaena Jesús pijimonae tatsi pomonae setenta y dos poyobe pebiwi

¹⁷Barapo setenta y dos poyobe jüntü coyene weiweinaya caibe nawibarena, jeje:

—Patatanecanamataxeinaem, caurimonae pana nejume cowunta xua paitawetan poxona paca wun wun taibatsi, jei Jesús pijimonae tatsi.

¹⁸Jesús jume nota, jeje:

—Aa, bara bayatha cauri pia pentacaponaein tatsi Satanás tan xua jopeica itaboco wetsica icha yamuxu ichi poxonae uncueica. ¹⁹Paxam paca catatsi taayapuswa painya netaxunaunabaponaewa tsane jomon yawa putonno, xua jopa painya nepaca capepeichinexa. Po peayapuswa paca catatsi bichocono daunwei, beyacaincha painya nepaca caaitaetabi jiton, pon cauri pia pentacaponaein pia peayapuswa tatsi xua xota jiwi abe exanatsi. Jiwi dapomonae aibi pomonae abe paca cana exana. ²⁰Jopa pajüntü coyene weiweinaeinde xua caurimonae pia paca jume jejeixae xua ducupa poxona paitawetame, saya jame pajüntü coyene weiweinare xua Nacom painya nepaca wun dubixae pia diborotha itabocoeicha.

Meje yabara poxona Jesús jüntü coyene weiweina exanatsi Nacom pia Pejumope tñaxü tatsi (Mt 11.25-27; 13.16-17)

²¹Bara caena bapoxona Jesús jüntü coyene weiweina exanatsi Nacom pia Pejumope tñaxü tatsi. Jesús namchi, jeje: “Axa peitaboco Necanamataxeinaem, yawa ira Necanamataxeinaem. Wunae cajaintatsi tsipei jopa tsita itubim pocotsiwa pexainyei coyenewa xan yabara pomonaetha pomonae bichocono penacuidubiwi pomonae be pinyon penatsicotaewi tsipei nanta xeina xua bichocono peyaputaewi daxita. Jame nama tsita itutame barapo pexainyei coyenewa xan yabara pomonaetha pomonae jopa bichocono penacuidubiwi pomonae be pexui penatsicotaewi tsipei jopa nanta xeinaeyo xua bichocono peyaputae jiwi daxita. Axa baxua exaname necatsita xanepanaexae baxua”, jei Jesús Paxatha.

²²Equeicha Jesús pijimonae barai pomonae xua setenta y dos poyobe, jeje: “Taxa daxita necata xua pia peitorobi coyenewa tatsi matautano xua pia peyaputae coyenewan tatsi. Dapon aibi pon xaniwaicha nejüntü cui coyene yaputane. Jame saya meisa Taxa Nacom, nejüntü cui coyene yaputane. Dapon ajibi pon Taxa jüntü cui coyene yaputainchi ichun, saya meisa Taxaxae jüntü cui coyene yaputan. Matauta barichi Taxa meisa

jũntũ coyene yaputainchi pon saya bara copatan xua bara Taxa pejũntũ cui coyene yaputaewa tsainchi pomonae ichichipan”, jei Jesús.

²³Nexata Jesús pijimonae napatomeicha necota pomonae xua doce poyobe. Meisa barapomonaebetha barai, jeye: “Jũntũ coyene weiweina pomonae xua tane, pocotsiwan xua pataneme. ²⁴Poxoru paca tsipaebatsi, xua Nacom pia peitorobi jume pepaebi jiwimonae irũ nacuan peewatsiwimonae, pomonae bayatha napenta barapomonae bequein betaena pocotsiwa pataneme ichitha jopa taeyo. Mataũta barapomonae bequein bejume taena pocotsiwa pajume taneme ichitha jopa jume taeyo”, jei Jesús.

**Meje yabara poxonae Jesús yabara paeba
Samaría nacuapin, pon wũnae exana**

²⁵Nexata irũrũ pon jiwi pecuidubin Moisés pia peitorobi coyene tatsi, barapon Jesús piraichi jũntũ coyene jũjũtsiya yainyabatsi xua barapon pejume barabotsinexatsi. Barapon Jesús jeichichi:

—Ja Tanecuidubim, ¿eta xua copiya matha exanocuaein xua ajũntũyapusũya tapoponaewa tsane xua ataya tsane? jei.

²⁶Jesús jume nota, jeye:

—¿Eta xuara xua barapo Moisés pia peitorobi coyene diwesitha tina? ¿Eta xua yabara yorobame barapo diwesitha? jei Jesús.

²⁷Pon jiwi pecuidubin Moisés pia peitorobi coyene bapon Jesús jume notatsi, jeye:

—Antobeinde jinya Necanamataxeinaein, bapon Nacom, daxita xua nejũntũ coyene wetsina, mataũtano xua daxita jinya nepoponae coyenewatha, mataũtano xua nanta xeiname, daxita xua nenanta xeinaewatha nentasiþatha, mataũtano daxita xua nedaunwei coyenewatham, mataũtano antobeinde necatsicuarabũ ecaein icha ichim xua naantobem jinya coutha, jei pon jiwi pecuidubin Moisés pia peitorobi coyene.

²⁸Nexata Jesús jume nota, jeye:

—Bara beta nejume notame. Icha baraxua exanaename peajũntũyapusũwa xeinaename po peajũntũyapusũwa xua ataya tsiteca, jei Jesús.

²⁹Ichitha pon jiwi pecuidubin Moisés pia peitorobi coyene tatsi, barapon awiya nanta xeina nawita, pia jiwi nanta xeinaetsi xua bapon xeina pexeinya peyainyabiwa. Bapon Jesús yainyabatsi, jeye:

—¿Jintam barũ pomonae tanetsicuarabũ enaewi? jei.

³⁰Nexata Jesús jume nota, jeye:

—Irũrũ pebin Jericó tomara bereca pona, Jerusalén tomara namtotha weya pona. Poxonae awiya namtotha ecapona jemeicha waetabatsi pomonae jiwi pecaibiwi. Barapon daxita wecobe notatsi

xua pocotsiwa xeina, yawa bŭtsi. Barapomonaē aichurubenaē, tsica cuiyotha copatabatsi. ³¹Bapoxonaē irŭ sacerdotemonaēpin barapo namto ecapona. Poxonaē barapon yasusŭinya taebotatsi sacerdotemonaēpin tajŭ matawacaicha toquetaba. ³²Irŭ levimonaēpin baxoyo ecapona, bapon irŭ tajŭ matawacaicha toquetaba poxonaē yasusŭinya taebota. ³³Ichitha Samaria nacuapin baxoyo irŭ ecapona poxonaē yasusŭinya taebota, yabara najŭntŭ coyene xeinanareca peyawenaenexa. ³⁴Nexata Samaria nacuapin imoxoyo caquita uncuataba pon yasusŭinya boca. Bapon wan yawŭbecapona penasiwatha vino merathano. Bapoxonaē paparuwatha wan yarabecapona. Bapoxonaē burrotha cuaretsica piyŭntha. Bomŭxŭ beya capona ichaxota jiwi maiteibathopa. Baxota xanepanaeya bota. ³⁵Bapoxonaē baya poxonaē juntucuru Samaria nacuapin ponaenaba, pita ainya paratixi. Bapoxonaē cata pontha pon bo pexeinaein. Samaria nacuapin barai pontha pon bo pexeinaein: ‘Barapon beta xanepanaya bore. Icha paratixi seicanaya, equeicha bexa cacatsinchi poxonaē caewa denan tsane’, jei Samaria nacuapin, jei Jesús.

³⁶Equeicha Jesús namchi, jeye: “Barapo acoibi poyobe jiwana, ŭjintam yabara cananta xeiname xua wŭnae exana xua peantobexaetsi pon waetabatsi pomonaē jiwi pecaibiwi, yawa xua bŭtsino?” jei Jesús.

³⁷Pon jiwi pecuidubin Moisés pia peitorobi coyene tatsi, bapon Jesús jume notatsi, jeye:

—Pon xua yabara najŭntŭ coyene xeinanareca xua peyawenaenexa, jei bapon.

Jesús jume nota, jeye:

—Ponare, icha pocotsi coyeneya Samaria nacuapin ichi barichiya exande, xanepanaya exande ichamonaetha, jei Jesús.

Meje yabara poxonaē Jesús, Marta yawa María siwa poinchibe

³⁸Jesús pijimonaē cataunxuae barŭ ecapona namtotha Jericó tomara beya barŭ pona. Pijimonaē barŭ patopa tsica tomariyotha ichaxota petsiriwa popona powa pewŭn Marta. Barapowa Jesús matenta weyataeya wabatsi pia botha. ³⁹Marta peyapiyo nantaŭta powa pewŭn María. Barapowa María Jesús caquita ecatsi xua Jesús pejume taenexatsi pocotsiwa paeba. ⁴⁰Ichitha Marta enatsi pia penacuichiwa xua Jesús tsiexanatsi pexaewa xuano xua pijimonaē tatsi nexano. Barapowa pona Jesús beya, namchi, jeye:

—Tanecanamataxeinaem, ŭjopa taem xua tayapiyo necopata xua compa nacuitan? Awiya bobena penacuichiwan. Itorobare bŭ neyawena, jei Marta.

⁴¹Ichitha Jesús jume nota, jeye:

—Marta, caenauya jinya nenacuichiwan xua pocotsiwa xua ichichipame neexanaewa. ⁴²Saya cae coyene ainya cui xua xam nantawenoname

pocotsiwa xua María exana xua barompaya itapeta xua wūnae exana poxonae nejume tayeca. Jiton dapocotsin aibi xua pon María jūntu coyene weaichurubenaē exainchi xua nejume tayeca, jei Jesús.

**Meje yabara poxonaē Jesús pijimonaē yabara
cuiduba xua Nacomtha petsipaēbiwa
(Mt 6.9-15; 7.7-11)**

11 ¹Caentacabi Jesús tsipaebauya Nacom ichawatha. Jesús najume weta, bapoxonaē pijimonaē tatsi jiwana poyobe xua doce poyobe Jesús baraichi, jei:

—Jesús, Patatanecanamataxeinaem, pana necuidubare xua Nacomtha pata tsipaēbiwa, icha Juan ichi xua pijimonaē cuiduba, jei bapon.

²Jesús barai barapomonaē, jeye:

—Poxonaē Nacom patsipaēbame, pajande:

‘Pata Taxam xam ponxaem peitabocotha athabeicha neecaein.

Barabū daxita jiwi cabarū cui itura jina nejūntu coyene wūnaewa nexēinaexae.

Barabū jopaena matakabi po matakabi xua poxonaē xam jiwi itorobiya canamataxeinaename barapo cae pin nacuathe.

³Daxita matakabin pexaewa pana catsibeibare po pexaewa daxita matakabi pata canantawenonaewa.

⁴Pana neyabara cui cana jūntemainare xua abe pata catsita exanaewatsi.

Bapoxonaē pana neyabara cui cana exanare xua

jopa equeicha pata catsita natsicuentisiwatsi

tsainchi xua abe pata catsita exanaewatsi.

Baraxua painta exande icha paichin ichamonaetha.

Tsipei paxan copiya payabara cui cana exanan

xua ichamonaē jopa pana netsita natsicuentisiyo

xua abe pata tanetsita exanaewa.

Jopa pana copatsinde xua abe pata exanaewa

tsane poxonaē jiwi pana nejūntu coyene

jūjūta xua abe pata exanaewa tsane’

pajande poxonaē Nacomtha patsipaēbame, jei Jesús.

⁵⁻⁶Equeicha Jesús barai, jeye:

—Metha beya tsipae xua caein paxam jiwana bapon nantaūta pon peyaputaēinchi. Bapon pia peyaputaēinchi beya pona papaetha. Pia peyaputaēinchi barai: ‘Tamo, cacowaetatsi acoibi po panbe, yaitama icha taneyaputaēin patopa pon anoxuae warapa tabo berena. Jopa xeinaēinyo xua taapatsiwa bapon’, jei pebin. ⁷Metha pon bomūxū tututha boca

bapon jume notsipa, jei tsipae: ‘Jopa nejume fayacotsinde bomuxu boupa daunwei, tapexui baru maituncuan camatha. Jopa benontaponaeyino xua pan tacacatsiwa tsane’, jei tsipae pon bomuxu tututha boca. ⁸Paca tsipaebatsi bequein bapon bomuxutha jopa benontaponaeyo, bequein bara pia peyaputaeyinchi, daichitha cata poxoru jume fayacotatsi pia peyaputaeyinchi. Matautano cata daxita xua pia peyaputaeyinchi nantawenona. ⁹Daxota paca tsipaebatsi. Matowa pawucare Nacom, bapoxonae paca catsibina pocotsiwa xua pawucame. Baraxua matowa paexande icha paichim poxonae matowa pajeiteibame beya poxonae pataebame, yawa icha paichim poxonae matowa pawawam bomuxutha beya poxonae ichun paca jume nota. ¹⁰Tsipei pon matowa wuca ichun bara catatsi. Tsipei pon matowa necoba, bara taeba. Tsipei pon bomuxu pecoibotha matowa wawai bara tacoibo sarana xorenatsi yawa jume notatsino.

¹¹⁻¹²“Paxam pomonae pexui paxeyname paca yainyabatsi. Poxonae painya pexui paca wuca duwei, upainya pexui pacatsipame jomo? Jume. Ichacuitha tsipae poxonae painya pexui paca wuca petobu, upainya pexui pacatsipame puto? Jume, jopa baxua paraichim tsane. ¹³Bara bequein peajuntucoyenebe jiwi pam, ichitha paxam payaputaneme xua pewunaewan painya pexui pacatsibeibame. Ichitha nama Nacom painya axa jopa juniya paca catsiyo Nacom pia Pejumope tuxaxu tatsi poxonae pawucame. Nacom paca cata beyacaincha poxonae painya pexui pacatsibeibame poxonae paca wuqueiba”, jei Jesús.

**Meje yabara poxonae Jesús baraichi xua pinae xeina
Beelzebú pia peyapusu itorobi coyenewa tatsi
(Mt 12.22-30; Mr 3.20-27)**

¹⁴Iruru Jesús taitawetauya cauri xua pebin muxusipana exainchi. Poxonae cauri pebin wepu poinchi, bapoxonae pebin equeicha paeba. Jiwi yabara najuntu coyene cabenaeca poxonae baxua tane. ¹⁵Ichitha ichamonae namchi: “Bapon caurimonae itawetatsi apara pexeinaexae Beelzebú pia peyapusu itorobi coyenewa tatsi pon caurimonae pia pentaponaeyin tatsi”, jei barapomonae.

¹⁶Ichamonae Jesús wucatsi: “Pana netsita iture peitupanaewa xua peitaboco wetsica jopeicaena”, jei. Barapomonae baxua paeba poxoru ichichipa xua Jesús tsita itutsina, pia yaputaetsi icha barapon pon yatsicaewa Nacom itoroba. ¹⁷Ichitha Jesús yaputane xua barapomonae nanta xeina. Jesús barai:

“Icha cae nacuapiwi nawepu tsatabe xua matauta nababe, bapoxonae jopa xaexaenaecaeyo. Matauta iruru icha cae bo matabuxuyomonaebe nababe yawa nawepu tsatajopabe, bapoxonae jopa xaexaenaecaeyo.

¹⁸Barichi icha Satanás pijimonae tatsi nawepu tsatajopabe matautano

xua nababe bapoxonae jopa xaexaenaecaeyo. Satanás jopa itacupaetsi xua itoroba pijimonae tsipei amsiya exana. Baxua paca tsipaebatsi tsipei naerabiya pana baram: ‘Apara bapon cauri itaweta Beelzebú pia peayapusu itorobi coyenewa tatsi pexeinaexae pon cauri pia pentacaponaein tatsi’, pana neyabara jam. ¹⁹Ichha Beelzebú pia peayapusu itorobi coyeneya tatsi cauri itawetan pon cauri pia pentacaponaein tatsi, ñnexata eta po peayapusu itorobi coyeneya tatsi painyamonae cauri itaweta? ¿Iruru barapomonae cauri itawetatsi Beelzebú pia peayapusu itorobi coyeneya tatsi? Daxota painyamonae paca yaputane xua apara paxam panaerabame. ²⁰Ichitha nama xan cauri itawetan Nacom pia Pejumope tñaxu tatsi pia peayapusu itorobi coyenewatha tatsi xua barapo pia pejumope tñaxu tatsi tanecatsixae. Baxua apara paca tsipaebatsi painya neyaputaenexa, xua painya xantha patopan ponxaein Nacom Tananeitapetsin.

²¹“Pebin ba pon bo pexeinaein pon xua maxu daunwei, bapon nayanaba xua xuan peopi sojeiwan. Daxota pocotsiwan xua xeina pia botha bara xaniwaicha tabobeinchi. ²²Ichitha icha ichun patopa pon beyacaincha maxu daunwei, bapon ba nawita yawa caiba barapo peopi sojeiwan xua xuan bomxu pexeinaein nanta xeina xua barapocotsiwantha bara xaniwaicha nayaewata. Poxonae barapo peopi sojeiwan bapon caiba tatsana ichamonae bichocono pematataeuncuaexae.

²³“Pomonae jopa neyawenaeyo, barapomonae apara inta abe exana. Barapomonae exana xua ichamonae jopa tana nejume cowantsiwa tsane. Barapomonae jopa neyawenaeyo xua ichamonae nenacaetutsina tajiwimonaexae tsane”, jei Jesús.

Meje yabara poxonae Jesús yabara paeba cauri xua caewa nauyata pebintha
(Mt 12.43-45)

²⁴Equeicha Jesús namchi, jeye: “Poxonae pebin wepu poinchi cauri, bapoxonae cauri pona wexotha ichaxota ira tsewa pepoponaenexa tsane baxota. Ichitha poxonae jopa caxinaeyo xua ichaxota pepoponaenexa bapoxonae bapon nabarai: ‘Tha caibeya ponaetsi pebin beya ichaxota bayatha wepu ponan’, jei cauri. ²⁵Poxonae caibeya pona cauri caxina, pebin caxinatsi xua xanepanaya popona. ²⁶Nexata equeicha cauri pona pebin weya. Pirapayo bapon baru patopa siete poyobe cauri pomonae bichocono abe, beyacaincha bapon pon copiya. Daxita barapo caurimonae pebin xeina. Anoxuae bapon nama yatsicaya bichocono abe cana exainchi beyacaincha poxonae copiya abe cana exainchi poxonae saya caein”, jei Jesús.

Meje yabara poxonae Jesús yabara paeba po coyene
pepa pejuntu coyene weiweinaewa

²⁷Poxonae Jesús cataunxuae cueicueije tsuncuae barapo diwesi, baxota pin bicheitha petsiriwa jume daunwei wawai Jesththa, jeye:

—iMaisa ena juntu coyene weiweina powayo xua bayatha caexana yawa xua mito caapatano! jei petsiriwa.

²⁸Ichitha Jesús barai petsiriwa, jeye:

—iBequein barichi, jame yatsicaewa juntu coyene weiweina pomonae jume tane xua Nacom paeba xuano xua exana pocotsiwa Nacom itoroba! jei Jesús.

Meje yabara poxonae pomonae peajuntucoyenebe jiwi Jesús cui itorobatsi xua peexanaewa tsane pexeinya petsita itutsi coyenewa
(Mt 12.38-42; Mr 8.12)

²⁹Jesús imoxoyo matawacaicha umenatsi pin bicheito. Jesús barai barapo pin bicheito, jeye: “Jiwi pomonae anoxuae jinompa barapomonae peajuntucoyenebe jiwi. Barapomonae necui itoroba xua bepa pinae tsita exanaein tatsita itutsi coyenewa xua pexeinya coyenewa. Ichitha jopa exanaein tsane icha tatsita itutsi coyenewa xua pexeinya coyenewa, saya meisa exanaein icha bayatha juta coyene cana ichichi Jonás pon Nacom peitorobi jume pepaebin, pon caena bayatha tupa. ³⁰Caena bayatha Nínive tomarapiwi Jonás yaputainchi pon Nacom peitorobi jume pepaebin xua po coyene bapon Jonás Nacom peitorobinchi, tsipei Nacom bichocono Jonás ainya cui exanatsi. Xan ponxaein Nacom Tananeitapetsin Nacom ainya cui neexana. Daxita jiwi pomonae anoxuae jinompa barapomonae neyaputane po coyene xua xan Nacom neitorobica peitaboco wetsica. ³¹Matacabi patopeicaena po matabitha Nacom yabara paebina jiwi xua penatsicuentsiwa daxita peperaxa exanaenexa xua abe peexanaexae. Barapo mataqueitha tsane petsiriwa powa caena bayatha tupa, bapowa asiya uncuaena Nacom peitabaratha tatsi. Barapowa pia nacua, nacuapiwayo, po nacua pocotsiwa parowa bereca taju bereca eca. Barapowa pia nacuapiwi tatsi itorobiya pia pepa peewatsiwayo. Barapowa yabara cueicueijei tsane pomonae xua anoxuae jinompa poxonae uncuaena Nacom peitabaratha tatsi. Jei tsane bapowa: ‘Maisa pomonae xua jinompa poxonae Mesías popona po irathe deque, barapomonae abe bichocono peexanaewi tsipei ajuntucoyenefaetabiya jume tane pocotsiwa Mesías cuiduba bequein Mesías bichocono peyaputaein’, jei tsane barapowa. Barapowa baxua paebina poxoru bapowa bayatha taju werena pona pesiwa ponaenexatsi Salomón, pon caena bayatha Israel nacuapiwi itorobiya pia pepa peewatsinchi. Bapowa yaputane xua Salomón bichocono peyaputaein xua Nacom peyabara yaputaewatsi. Daxota bapowa ichichipa xua pecuidubinexatsi xua Salomón pecuidubinexa Nacom yabara. Nama xote uncuanje ponxaein taexanaein pocotsiwa pepa peainya cui coyenewa xua tacuidubin daxita jiwitha xua Nacom yabara. Barapocotsi coyenewa toxechiya ainya cui coyenewa beyacaincha po cui coyene Salomón exana poxonae cuiduba xua barapowa cuidubatsi xua

Nacom yabara. ³²Barichi barapo matabitha Nínive tomarapiwi pomonae caena bayatha jinompa barapomonae abeya paca yabara paebina poxonae umenaena Nacom peitabaratha. Barapomonae baxua exanaena tsipei barapo Nínive tomarapiwi icha jüntu coyene xeina Nacomtha peuraxae xua abe exana caena bayatha poxonae Jonás muxuwetsiya tsipaeba barapomonaetha Nacom pia pexeinya jume diwesi tatsi. Ichitha paxam jopa bara paichim, jopa icha jüntu coyene paxeinaem. Nama अपारा xote uncuanje ponxaein taexanaein pocotsiwa pepa peainya cui coyenewa xua tacaponaewa Nacom Pejume Diwesi daxita jiwitha. Barapocotsi coyenewa toxechiya ainya cui coyenewa beyacaincha Jonás po cui coyene exana poxonae Nacom Pejume Diwesi capona Nínive tomarapiwitha”, jei Jesús.

**Meje yabara poxonae Jesús yabara cuiduba jiwi po coyene
xanepanaya peexanaewa pejüntu coyene wetsina
(Mt 5.15; 6.22-23)**

³³Jesús namchi jiwitha jeye: “Jiton dapon aibi pon pecoicha cueicha exana xua quirei pebuxu pana wetsina, yawa xua cueicha matabitha cajatha. Jume, jame, asiya cueicha exanatsi xua pecoicha taenexa pomonae joneibarena. ³⁴Pecoicha ba yonoyonei merawi painya nepaca cayawenaenexa xua beta painya netaewa tsane quireitha. Barichi painya itacuereton painya nepaca cayawenaenexa xua beta painya netaewa tsane. Icha painya itacuereton wuna bara beta pataneme. Ichitha icha painya itacuereton abe jopa beta pataetsipaem. Barichiru painya jüntu coyenewan xua painya nenanta xeinaewan. Icha painya jüntu coyenewan xanepanaetsipa bara beta Nacom payabara najüntu coyene xeinaetsipame. Ichitha icha painya jüntu coyenewan jopa xanepanaetsipae jopa beta Nacom payabara najüntu coyene xeinaetsipaem. ³⁵Painya jüntu coyenewan paca cana exanaetsipa xua bichocono abe paexanaetsipame daxota dota pam. Painya xoba merawi paponame icha jopa paxeinaem xua peyonoyoneiwa poxoru cotacaya panapapeichipame. Barichi pam, painya xoba pajinompame icha jopa paxeinaem xua pocotsiwa beta painya neyabara nanta xeinaewa Nacom poxoru cotacaya abe paexanaetsipame. ³⁶Icha painya jüntu coyene wuna, xuano xua jopa paxeinaem peabe coyenewa painya jüntu coyenewa, bara xaniwaicha Nacom payabara yaputaneme icha poxonae pecoicha paca cana ichi xua beta pataneme”, jei Jesús.

**Meje yabara poxonae Jesús muxuweta jiwi fariseomonae iru pomonae jiwi
peucidubiwi Moisés pia peitorobi coyene tatsi barapomonae pecuiyainwa tatsi
(Mt 23.1-36; Mr 12.38-40; Lc 20.45-47)**

³⁷Poxonae Jesús najume weta, fariseomonae jiwana pin Jesús wabatsi xua petaxaenexa tsainchi pia botha. Jesús joniya yawa ecoundeca

pexaethopaewatha. ³⁸Fariseomonaē najuntũ coyene cabenaecaeya necotecataba xua Jesús jopa matha tsiwanaya penacobe quiatsiyoxae poxonae xane icha judiomonaē ichi, xua saya pia cui coyene tatsi xua barapomonaē nanta xeina icha jopa matha nacobe quiatsiyo Nacomtha natsicuentſipa. ³⁹Nexata Jesús pon Pecanamataxeinaeinxae jiwi, fariseomonaepin baraichi:

—Paxam fariseomonaepiwi pam, paxam jopa ba juniya paexaneibim poxonae meisa panaperũ iquicame. Daichitha bũpana iya painya jũntũ coyenetha pecaibi coyene paxeiname, peuwi coyeneno paxeiname. Be barapocotsi jiwi pam, pocotsimonaē coroton saya matawacaicha iquica yawa paratonno, ichitha atutuxuira bichocono. ⁴⁰Jopa peyaputae jiwi pam. Nacom exana wapepon yawa exana wajũntũ coyenewa. iBaxua payaputanemeba! ⁴¹Xua xoxi paxeineibame matha abũ copiya pajiwana tsabeibare pomonaē peacopeibiwi nexa. Bapoxonaē xua xoxi nacopabeiba baxua panata copabeibare. Icha bara paichim tsane, bara xaniwaicha pajũntũ coyene xanepaname Nacomtha. Yawa jopa panantawenonaem xua pana nacobe iquiqueibame jiwi peitũtha xua be panatsicotaneme pocotsi pebin pejũntũ coyene wũnaein.

⁴²Equeicha Jesús namchi, jeye: “iPaxam fariseomonaepiwi pam tsobenaē, xua peperaxa perũ jubiwa bexa paxeinaename! Daxita xua painya neũbiwa Nacom pacatsibeibame caewaxi poxonae diez xoyobe paxeineibame. Irũ xua tsiwaxino pacatsibeibame. Bequein baxua paexaneibame ichitha Nacom jopa paantobem. Mataũta ichamonaē jopa xapain pata exanaem. Bewa paexanaem xua Nacom pacatsibeibame caewaxi poxonae diez xoyobe paxeiname. Yawano bewa paantobem Nacom. Yawano bewa xainyeya paexanaem jiwitha”, jei Jesús fariseomonaepintha.

⁴³Bapoxonaē Jesús fariseomonaē baraichi, jeye: “iPaxam fariseomonaepiwi pam tsobenaē! Bexa paxeinaename xua peperaxa perũ jubiwa. Paxam paichichipeibame xua painya nenanta caeneibiwa pexeinya peenaewantha judiomonaē pia penacaetutsi botha po peenaewan ichaxota enathopeiba pomonaē ainya cui penaexanaewi. Mataũtano paichichipeibame xua jiwi paca wũnaē jainteiba poxonae paca jacobanaemtotha, xua jiwi painya nepaca barũ itura jinaenexa”, jei Jesús.

⁴⁴Equeicha Jesús namchi, jeye: “iMoisés pia peitorobi coyene tatsi, jiwi pecuidubiwi pam tsobenaē! Irũ fariseomonaē pam tsobenaē! Poxonaē jiton ba pona namtotha jopa tsaqueinaeyo xua jiton piwa baxoyo bocareca mũthũ deca, xua peayeiwa poxoru jopa wũnaeyo. Paxam bara paichim. Jiwi imoxoyo paca caquita pona jopa tsaqueinaeyo xua pocotsiwa painya jũntũ coyenetha pananta xeiname xua abe xua jopa pecui wũnaewiyo”, jei Jesús.

⁴⁵Nexata pomonaē jiwi pecuidubiwi Moisés pia peitorobi coyene tatsi, barapomonaē jiwana caein bapon Jesús baraichi, jeye:

—Jiwi Necuidubin, poxonae baxua paebame, apara iru pana neyabara jam poxonae catsawiya paebame, jei.

⁴⁶Nexata Jesús jume nota, jeye:

—Iru paxam Moisés pia peitorobi coyene tatsi jiwi pecuidubiwi pam tsobenaem! Tsipei paxam ichamonae paitorobame xua capona pocotsiwa arewe pocotsiwa jiwi bapana jopa itacupaetsi xua pecaponaewa, ichitha paxam jopa pata yoichaem, matauta bara cae cobesitiotha jopa pata yoichaem. Jiton ba itoroba ichuntha xua pecaponaenexa pocotsiwa jopa juniya arewiyo, xua pocotsiwa jopa itacupaetsi xua pecaponaewa pon itoroba. Bara paichim paxam ichamonae pacuidubame xua jopa itacupaetsi xua peexanaenexa baxuan xua pocotsiwa iru xua jopa paca itacupaeyo xua painya neexanaewa baxuan.

⁴⁷“iPaxam patsobenaem! Paxam petupaewi pomonae Nacom peitorobi jume pepaebiwi payamuthu acabame boutixi bequein painya amo susato jiwi juteba barapomona. ⁴⁸Poxonae baxua paexaname, ichamonae patsita itapeinya xeiname xua paxam bara iru paichichipameru pocotsiwa xua painya amo susato jiwi juteba xua barapomona pomonae Nacom peitorobi jume pepaebiwi jutebatsi. Daxota barapo petupaewi payamuthu acabame boutixi.

⁴⁹“Daxota Nacom peyaputae jumetha namchi: ‘Itorobicaein barapomonaetha taitorobi jume pepaebiwi iru pomonae taitorobiwi. Ichamonae pomonae taitorobi jume pepaebiwi jutebinchi. Ichamonae pomonae taitorobi jume pepaebiwi abe exanaeinchi. Ichamonae, pomonae taitorobiwi jutebinchi. Ichamonae, pomonae taitorobiwi abe exanaeinchi’, jei Nacom peyaputae jumetha”, jei Jesús. ⁵⁰Equeicha Jesús namchi, jeye: “Pomonae anoxuae jinompa Nacom cana exanaena xua barapomona peraxa jubebinchi petsitaxaetsi xua barapomona penatsicuentisiwa xeina, tsipei jiwi juteba xua Nacom peitorobi jume pepaebiwi jutebatsi caena bayatha xua weya xua poxonae Nacom aena forota barapo cae pin nacue. ⁵¹Painya amo susato jiwi jujutebapona xua pomonae pejuntu coyene xeicae jiwi jutebatsi. Copiya matha Abel bexotsi beya poxonae iruru Zacarías bexotsiru. Barapon Zacarías pabexubame Nacom pin pia botha ichaxota xua barapo bo tututha naitama taeuncuabe xua be pexaethopaewa xua ichaxota duwei tauteiba Nacom nexa iru ichaxota po tutu yatsicaewa Nacom pia tutu. Daxota paca tsipaebatsi Nacom cana exanaena xua daxita paxam pomonae anoxuae pajinompame paca peraxa jubebina tsipei Nacom patsitame xua paxeiname penatsicuentisiwa xua painya amo susato jiwi pejutebixae barapomona”, jei Jesús.

⁵²Equeicha Jesús namchi, jeye: “iPaxam jiwi pecuidubiwi pam tsobenaem xua Moisés pia peitorobi coyene tatsi! Paxam ayapube paexaname xua jiwi peyaputaewa Nacom Pejume Diwesi poxoru icha

caununaya pacuidubame, xua jopa xapain pocotsiwa Nacom paebiyo. Paxam jopa pajume cowuntsim Nacom matauta jopa pacopatsim xua ichamonae iru pejume cowuntsiwa Nacom”, jei Jesús.

⁵³Poxonae Jesús baxua paeba poxonae cataunxuae jopa natsixatabiyo, fariseomonae iru pomonae jiwi pecuidubiwi Moisés pia peitorobi coyene, daxita barapomonae Jesús bichocono casebatsi. Barapomonae Jesús muxu fayacotatsi xua yainyabatsi nawita, peamuxuconae exanaenexa tsainchi. ⁵⁴Barapomonae Jesús piraichi matowa yainyabatsi peyaputaenexa icha Jesús ajumebeya jume bara botsina.

Meje yabara poxonae Jesús yabara cueicueijeji jiwitha xua fariseomonae itara beta paeba ichitha jopa xapain exanaeyo

12 ¹Poxonae cataunxuae Jesús cueicueijeji tsuncuae, bapoxonae ayei jiwi nacaetutapona Jesustha. Jiwi nataxu taxunaunaba. Jesús tamropata pitaba xua cueicueijeji jiwitha. Copiya matha Jesús pijimonae tsipaeba, jeye: “Dota pam jopa pajume naitaewatsinde fariseomonae pia pecuidubi coyenewa tatsi xua painya nejume cowuntsiyainwa. Barapomonae itara beta paeba ichitha jopa xapain exanaeyo. ²Daxita diwesin xua po diwesin bequein anoxuae jiwi jopa yaputaeyo, bexa yaputaena. Pocotsiwa jiwi abe nameicha exana daichitha ichamonae bexa yaputaeponaena baxua. ³Paxam xua po diwesi merawi nameicha pana natsipaebame, barapo diwesi ichamonae mataqueitha jume taena. Matautano pocotsiwa paxam aisawatha pana namuxu paxapaxeya tsipaebame, barapo diwesi ichamonae panatha paca jume canawabiya wawai tsane”, jei Jesús.

Meje yabara poxonae Jesús yabara paeba xua pontha bewa ba jiwi cuitaya cunuwina
(Mt 10.26-31)

⁴Equeicha Jesús pijimonae barai, jeye: “Tamona paxam paca tsipaebatsi jopa pacuitaya cunuwinde pomonae xua itacupatsi xua paca necajutebiwa xua meisa painya pepontha. Ichitha barapomonae jopa itacupaetsi xua equeicha paca jumopein tunaxu jutebina. ⁵Ichitha yabara paca tsipaebatsi pontha jame bewa pacuitaya cunuwim, bapon apara jame Nacom. Tsipei bapon itacupatsi xua painya nepaca bebaiwa pin isototha po pin isototha jopa bapana itacounayiyo xua weraweraca painya nepaca exanaenexa painya pepon. Xaniyan paca tsipaebatsi bewa jame pacunuwim bapon Nacom.

⁶“Jiwi ba caenaeta siri cinco poyobe, saya ainya paratiyobe nantomata. Bequein barapo siri caenaeta jiwi xua jopa matoma nautsiyo, ichitha Nacom jopa yabara junteinaeyo siri, matautano caeyono jopa yabara junteinaeyo. ⁷Iru daxita painya nentanan Nacom daxita matapaeicha

paca matana ununa. Jopa pajunuwinde tsipei paxam Nacom bichocono patsita ainya cuim beyacaincha siri”, jei Jesús pijimonaetha.

**Meje yabara poxonae Jesucristo yabara paeba xua pomonae
peyabara paebiwichi ichamonae peitabaratha tatsi
(Mt 10.32-33; 12.32; 10.19-20)**

⁸Equeicha Jesús namchi pijimonaetha, jeye: “Yabara paca tsipaebatsi pomonae xua nayopita ichamonaetha, pomonae xua najei: ‘Apara paxan Jesús pijimonae tatsi pan’, najei. Barichi xan, ponxaein Nacom Tananeitapetsin xuya jan tsane matatsunpiwitha. Barapomonae apara tana nejume cowuntsiwi, jan tsane xuya barapo Nacom pia matatsunpiwi tatsi peitabaratha tatsi. ⁹Ichitha pomonae xua neyabara jei ichamonaetha: ‘Jopa dapon payaitaeyino’, jei, xan ponxaein Nacom Tananeitapetsin xuya barapomonae yabara jan tsane Nacom pia matatsunpiwi peitabaratha tatsi: ‘Apara barapomonae jopa yaitaeyino’, jan tsane.

¹⁰“Xan ponxaein Nacom Tananeitapetsin pon abe neyabara paeba Nacom itacupatsi xua bapon peyabara jünteminaewatsi pocotsiwa bapon abe neyabara paeba. Ichitha pon nama Nacom pia Pejumoepo tñaxu tatsi bichocono abe yabara paebatsi Nacom jopa bapana yabara jünteminae bapon.

¹¹“Paca caponaena judiomonae pia penacaetutsi bontha ichaxota nacaetuteiba pentacaponawewi. Paca caponaena pomonaetha pomonae peyabara paebi jiwí xua penatsicuentisiwa xua abe peexanaexae yawa tomara pia pentacaponawewi peitabaratha tatsi paca caponaena. Poxonae baxua paca exanaena, jopa payabara najuntu coyene exabinde pocotsiwa xua painya nejume notsiwa xuano xua painya netsipaebiwa tsane barapomonaetha. ¹²Poxonae juntucuru pacaunutsiya paebiname, bapoxonae Nacom pia Pejumoepo tñaxu tatsi paca tsijume dubina pocotsiwa painya netsipaebiwa tsane”, jei Jesús.

Meje yabara poxonae Jesús pijimonae yabara tsipaeba pon copei pexeinaein

¹³Caein pin bicheitoha, bapon Jesús baraichi, jeye:

—Jiwi Necuidubim, taeweicho inta itorobare bu necata xua tawa xua taxa pecopiniwa xua xuan taxa bayatha pana nejuntana jeba, jei.

¹⁴Jesús jume epa pita, jei:

—Maisacai, apara dapon aibi pon necana exana xua xan tapaca yabara paebiwatsi xua painya nenatsicuentisiwa xua abe painya neexanaexae. Matautano apara dapon aibi pon necana exana xua xan be pon tapacata tsabibeiwatsi pocotsiwa painya axa pia pecopiniwan tatsi, xua bayatha paca juntana jebeiba painya axa, jei Jesús.

¹⁵Yawa Jesús namchi, jeye:

—Dota xua asiwiya paantobem xua xoxi paxeiname. Bequein pebin copei nawita xeinaetha, ichitha barapo pebin jopa yawenaetsi xua beta pepoponaewa, jei Jesús.

¹⁶Nexata Jesús tsipaeba jiwitha pecayabara juta pepaebi diwesiyo, xua jeye: “Iru matha pebin popona pon copei pexeinaein. Pia pabi tatsi pexaewa tanawetatsi nawita. ¹⁷Pon copei pexeinaein nexata pia coutha nabarai: ‘¿Eta bichocuaein tsane? ¿Eta xota jebocuaein pocotsiwan pabitha notan?’ jei. ¹⁸Pia coutha najume nota: ‘Bara yaputan tha xubichi pexaewa matabon. Tha equeicha acabichi po bon bichocono pin bon. Barapo pin bontha daxita pexaewa etsin yawa etsinno daxita pocotsiwa xeinan. ¹⁹Nexata najuntu coyene baran tsane: Bara daxita xeiname ainya wei dapaein nexa. Nafinacaecare, xaibare, apeibareno, juntu coyene weiweineibare’, najei xua najuntu coyene barai pon copei pexeinaein. ²⁰Ichitha pon copei pexeinaein Nacom barai bapon, jeye: ‘Pebin pon jopa xapain nenanta xeinaem, methaunxuae anoxuae merawi tupaename. Daxita baxuan xua yabo notame, ¿jintam metha piawa tsane?’ jei Nacom. ²¹Baxua barichi pon xua saya copei yabara nanta xeina nawita pecaetubinexa. Bapon Nacom copei xeina taetha, Nacom tsitatsi xua bapon apara acopeibi, tsipei bapon pejuntu coyene tatsi tsocuae xua Nacom jopa pejume cowuntsixaetsi”, jei Jesús.

**Meje yabara poboxonae Jesús yabara cuiduba po coyene
xua Nacom eena pijimonae
(Mt 6.25-34)**

²²Bapoxonae Jesús pijimonae tsipaeba, jeye: “Paca tsipaebatsi, jopa bichocono payabara najuntu coyene exabinde pexaewa xua painya neuna jinompaewa tsane. Barichi jopa bichocono payabara najuntu coyene exabinde papaburu xua painya pepon nexa. ²³Pocotsi asu pejinompaewa xua Nacom naca cata jame baxua ainya cui, beyacaincha pexaewa xua peuna jinompaewa. Pepon ainya cui iru, beyacaincha papaburu xua pepon nexa. ²⁴Uni payabara yaputaema. Bapomonae jopa ubiyo pabitha. Matautano jopa jotsiyo pocotsiwa penawetsiwa. Jopa xeinaeyo bomuxun xua pejebinexa pexaewa. Ichitha Nacom, uni apatatsi pexaewa. Paxam nama bichocono Nacom patsita ainya cuim jame, beyacaincha peyapupunaewi xua Nacom tsita ainya cuichi. ²⁵Dapon aibi pon paxam jiwana pon itacupatsi xua xeinaena icha matabi xua po matabitha pepoponaewa tsane poboxonae tupaena. Bequein bapon nayabara nantu exaba nawita baxua, ichitha jopa itacupaetsi xua xeinaena caentacabi equeicha. ²⁶Icha jopa paca itacupaeyo xua paexaname xua be conotha xua caentacabi nexa, ¿eta xua metha equeicha yabara panantu exabame ichawan xua daunwei bichocono?

²⁷“Jame pacayabara nanta xeinare pentonon xua xuwa, xua matono itupana. Pentonon jopa nacuichiyo yawa jopa natsiexanaeyo papaburu penamaxatabinexa. Ichitha paca tsipaebatsi xua pentonon matono itupana bichocono beyacaincha pocotsi paparuwa Salomón nama

xatata xua pexeinya paparuwa. Bapon Salomón pon caena bayatha judiomonaē itorobiya pia pepa peewatsinchi pon bayatha tupa. ²⁸Pentonon, po matonon wexotha anoxuae xuwa, Nacom cana exana xua matono itupana. Ichitha pebiwi baya matono tautsina ichaxota pocotsiwatha pan seba, tsipei saya pentono. Nacom cana exana xua pentonon bichocono wanae bara bequein saya pentonon. Barichi Nacom itacupatsi xua beta paca neca-eenaewa xua beta painya nejinompaenexa. Matautano Nacom paca catsina paparuwan. iMaisa pebiwi pam tsobenae be conotha pajume cowuntame Nacom! ²⁹Jopa payabara najuntũ coyene exabinde pexaewa xuano xua painya neapaewan yabara. Jopa panthuthũ deideijeya jinompaēinde xua ichawa pacayabara nanta xeiname. ³⁰Tsipei barapo cae pin nacuathe jiwi, saya i baxua pecayabara najuntũ coyene exabi pocotsiwa nantawenona. Ichitha nama paxam painya Axa Nacom panantautame pon yaputane daxita pocotsiwa xua xoxi panantawenoname. ³¹Meisa saya bichocono pacayabara nanta xeinare xua painya neexanaewa xua Nacom ichichipa waba jiwi xua jiwi wabatsi xua petanaexanaenexatsi pijimonaē pomonaē itorobiya pecanamataxeinaexae. Icha baxua paexanaename nexata Nacom paca catsibina xua daxita pocotsiwa panantawenoname”, jei Jesús.

**Meje yabara poxonae Jesús yabara cuiduba xua pocotsiwa
Nacom jiwi pejuntana jebiwatsi pia nacuatheicha
(Mt 6.19-21)**

³²Equeicha Jesús namchi, jeye: “Tamonae pomonaē be ovejamonaē pam, painya nejunuwi jiwi pamxaem. Jopa pajunuwinde bequein bara tsiquimonaeyo pam. Painya Axa Nacom pia coya peichichipaexae pia coya paca cana exanaena pijimonaē tatsi jiwana pam pomonaē pejume cowuntsiwichi pomonaē itorobiya pecanamataxeinaexae. ³³Pacenaere xua paxeiname. Barapo paratixi pomonaē acopeibiwi pacatsibare. Poxonae baxua paexaname, bapoxonae xuya Nacom athabeicha paca catsibina pocotsiwa xua painya nepaca juntana jebiwa pocotsiwa xua jopa naxubiyo. Athabeicha pecaibin jopa patopaeyo painya nepaca caibinexa pocotsiwa pajebame bara xoteicha. Matautano ofo jopa xaeyo pocotsiwa xua pajebame bara xoteicha. ³⁴Ichaxota ba pajebame xua painya neichichipaewan baxota ba payabara nanta xeiname nawita”, jei Jesús.

Meje yabara poxonae Jesús yabara paeba xua pinae bewa nacui wunaetichi

³⁵⁻³⁶Equeicha Jesús namchi, jeye: “Pana najuntũ coyene cui wunaere xua tapatopaewa tsane. Barapocotsi jũta coyeneya paichinde, icha pomonaē petanacuichiwi ichi xua nacui wunaeta, xua pon bo pexeinaein imoxoyo pepatopaexae. Bapon pon bo pexeinaein nasiwa pona ichaxota

jiwi nacaetuta xua pexaenexa pexaewa poxonae pebin piowa pita. Bapon nawirena bara werena, pomonae pia petanacuichiwichixaetsi nainya tayausaranaxorenatsi pecoiboto poxonae bapon patopa pia botha. Barapocotsi juta coyeneya paichinde. Paxam panacui wunaetsiya jinompare xua tapatopeicaewa tsane. ³⁷Poxonae bo pexeinaein patopa icha bapon tane xua pomonae pia petanacuichiwichixaetsi jopa maichiyo bapoxonae barapomonae juntu coyene weiweina. Bara xaniwaicha paca tsipaebatsi bapon pon bo pexeinaeinxae pia petanacuichiwichi cuareba pexaethopaewatha, bapoxonae apatsina pexaewa. ³⁸Pon bo pexeinaein, bara bequein papaetha patopaetha tsipae, ichacuiha bara bequein metha patopaetha tsipae mataquei wunaeyo, ichitha barapomonae pomonae petanacuichiwi juntu coyene weiweinaetsipa poxonae bo pexeinaein tane xua jopa maichiyo barapomonae. ³⁹Barichi payaputaema, icha bo pexeinaein yaputaetsipa xua poxonae patopaena pon jiwi pecaibin jopa maitecaetsipae. Matauta bapon jopa copatsipae xua pon pecaibin petajondenaewatsi pia botha. ⁴⁰Bara paichinde. Tawanaetha pana nacui wunaere tsipei xan ponxaein Nacom Tananeitapetsin patopeicaein poxonae jopa tsaca payabara jinompaem tsane poxonae jopa payabara nanta xeinaem tsane xua tapatopaewa tsane”, jei Jesús

**Meje yabara poxonae Jesús yabara diwesi paeba
ponbe xua bo peyapucaeaeinbe pon xua beta peexanaein,
iru xua pon jopa beta peexanaein
(Mt 24.45-51)**

⁴¹Nexata Pedro Jesús yainyabatsi:

—Jesús, pata Tanecanamataxeinaem, po diwesi xuaunxuae pana tsipaebame, xua pecayabara juta pepaebi diwesiyo, ¿saya meisa paxan nexa? ¿Iru ichamonae nexano? jei Pedro.

⁴²Jesús pon Pecanamataxeinaeinxae jiwi, Pedro jume notatsi pecayabara juta pepaebi diwesiyotha pepatopaewa tsane yabara, jeye: “Yabara catsipaebatsi pon matacapopona pomonae bo pexeinaein tanacuitatsi. Barapon xanepanaya yaputaeya matacapopona. Poxonae bo pexeinaein wepu warapa barapomonae, pon bo pexeinaein itoroba pontha pon bo petayapucaeaeinchi, jeye: ‘Inta beta matacapoponde, yawa inta beta pexaewa apare daxita matacabi pomonae xua inta nacuita’, jei bo pexeinaein. ⁴³Pon bo petayapucaeaein bara juntu coyene weiweinaena poxonae patopaena pon bo pexeinaein, petaexaetsi xua bara beta tayapucaeaca bo, xuano bara beta peexanaexae xua bo pexeinaein itoroba. ⁴⁴Xaniwaicha paca tsipaebatsi. Bo pexeinaein itorobina, xua pon petayapucaeaeinchi bo, bapon cana exanaeinchi xua equeicha daxita piawa beta petayapu enaewatsi xua xuan xeina pon bo pexeinaein. ⁴⁵⁻⁴⁶Ichitha ichacuiha pon yapucaeaca bo bapon

peantucuiyapubein tsipae. Bapon pia coutha nanta xeinaetsipa, najei tsipae: ‘Metha bo pexeinaein jopa cuinaya patopae tsane’, najei tsipae. Bapoxonae bapon cueinta pomonae pon bo pexeinaein tanacuitatsi, pebiwi yawa petsiriwaxi. Matautano bapon nanabanaetsipa nawita ichamonae yawa cupatsi nanaexanaetsipano. Bapoxonae bo pexeinaein jemeicha patopaena poxonae pon bo petayapucaecaein jopa wunae tsaqueinaeyo. Poxonae barapo hora tsuxubi jopa yaputaeyo yawa poxonae barapo matababi tsuxubi jopa yaputaeyo. Pon bo pexeinaein itorobina ichamonaetha xua pebenexatsi yawa peperaxa exabinexa tsainchi pon bo petayapucaecaein icha cana ichichi pomonae jopa pejume cowuntsiwi.

⁴⁷“Pon bo yapucaeca, bapon bequein yaputane pocotsiwa pon bo pexeinaein itoroba xua ichichipa, ichitha jopa exanaeyo pocotsiwa itorobatsi, xua bo pexeinaein itoroba. Barapon bichocono peraxa jubinchi xua jopa peexanaexae pocotsiwa itorobatsi. ⁴⁸Ichitha ichun pon bo yapucaeca jopa cono yaputaeyo pocotsiwa bo pexeinaein itoroba yawa itatemala abe exana. Bequein jopa cono yaputaeyo yawa itatemala abe exana, ichitha nantawenona xua peperaxa exanaewatsi be conotha, tsipei abe exana be conotha. Pon ba be conotha Nacom yabara yaputaeinchi, Nacom bapontha cana exanaena xua ichawa peyabara yaputaewa tsane beya poxonae bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom peyabara yaputaewatsi Nacom wepichina po coyene bapon yaputane xua beya daxota Nacom jopa pejume cowuntsiwa tsainchi”, jei Jesús.

**Meje yabara poxonae Jesús yabara paeba xua jiwi ainya
bicheiton naexanaena xua Jesús pejume cowuntsixaetsi
xua ichamonae jopa pejume cowuntsixae
(Mt 10.34-36)**

⁴⁹Equeicha Jesús namchi, jeye: “Patopan barapo cae pin nacuathe Nacom tana neitorobixae xua jiwi aperaxatane taexanaenexa abe peexanaexae barapo jiwi. Tapatopaewaxae jiwi atene tsane icha be ichi poxonae barapo jiwi tautatsi isototha. ¡Maisa metha bayatha bena baxua exanocuaein barapo isoto! ⁵⁰Xan barichin tsane daxita matapaecha aperaxatanein tsane poxonae tupaen. Awiya bichocono anthuthurewain xua beya baxua inta exanaena. ⁵¹¿Pananta xeiname xua xan apara patopan xua jiwi juntepa pejinompaewa tsane? Apara aibi, jopa baxua tsipatopaeinyo. Apara jame patopeican taexanaenexa po coyene jiwi naba exanatsi xua daxota ainya bicheiton penaexanaewa tsane. ⁵²Anoxuae, yawa bexa tsane cinco poyobe cae matabuxuyoy xua bomuxutha jinompa barapomonae nawepu tsatajopaenabe. Tres poyobe ita aenae-aenei tsane xua dos poyobe ita aenae-aenei tsainchibe. Nantiya barapo matabuxuyoyobe naita aenae-aenei tsanebe. Baxua exanaena xua ichamonae tana nejume

cowuntsi jiwixae xua iru ichamonae jopa tana nejume cowuntsixae.
⁵³Coxiyan pexanto ita aenae-aenei tsane. Coxiyan xuya pexanto ita aenae-aenei tsainchi. Coxiwa pexantiyo ita aenae-aenei tsane. Coxiwa xuya pexantiyo ita aenae-aenei tsainchi. Iruru pamiyobe naita aenae-aenei tsanebe. Pecopeinyobe naita aenae-aenei tsanebe”, jei Jesús.

**Meje yabara poxonae Jesús diwesi paeba xua jiwi
 itaboco tane peitaboco yaputaenexa
 (Mt 16.1-4; Mr 8.11-13)**

⁵⁴Yawa Jesús barai jiwitha, jeye: “Poxonae tsaquinaebowa pataneme xua pocotsiwe wejopeine: ‘Ema dawa jopeina’, pajam. Jopa jume bara duneica. ⁵⁵Poxonae joibo jopa: ‘Wei imoxoyo’, pajam. Jopa jume bara coicha jopa. ⁵⁶Itara mexeya pexeinya juntu coyene paxeiname ichitha peajuntucoyenebe jiwi pam. Itaboco yawa irano panaita caewatame painya yaputaetsi icha ema yawa xua icha pexeinya matacabi. Ichitha jopa payabara yaputaem xua bequein peitupanaewan exanan, ichitha cataunxuae came awiya jopa payabara yaputaem po coyene xua baxua Nacom taneitorobiwa”, jei Jesús.

**Meje yabara poxonae Jesús paeba xua ichun juntu cui xanepanaya
 juntema popona cana exana xua pon peaitafaetabixaetsi
 (Mt 5.25-26)**

⁵⁷Equeicha Jesús namchi jiwitha, jeye: “¿Eta xua metha painya coutha beta jopa pana nayabara nanta xeinaem xua icha metha wunae painya neexanaewa? ⁵⁸Icha ichun bepaca itoroba paca necaponaenexa pontha pon jiwi peyabara paebin xua penatsicuentiwa xua abe peexanaexae nexata bapon patsipaebare poxonae cataunxuae namtotha paca baru ecapona xua painya nenaita coxone exanaenexa. Xain bapoxonae bapon jopa paca caponae tsane pontha pon jiwi peyabara paebin xua penatsicuentiwa xua abe peexanaexae. Tsipei icha bapon bara beya paca caponaetsipa, bapoxonae pon jiwi peyabara paebin xua penatsicuentiwa xua abe peexanaexae equeicha dabeya policiamonae beya paca itorobichipa. Bapoxonae nama policiamonae jiwi pecubi bo beya paca itorobichipa. ⁵⁹Bara xaniyeya paca tsipaebatsi. Paxam jopa paca pu copabi tsane jiwi pecubi bo weya, beya abu poxonae panatsipu matomacaname daxita paratixi cuntha po paratixi xua paxeiname”, jei Jesús.

**Meje yabara poxonae Jesús yabara paeba xua ainya cui
 xua icha juntu coyene pexeinaewa Nacomtha**

13 ¹Barapoxonae ichamonae pata. Jesús tsipaebatsi, jeye:
 —Galilea nacuapiwi Jerusalén tomaratha capata duweimonae,
 Nacom pin pia botha xua barapo duweimonae pejutebinexa petautsinexa

xua petuxusi exanaenexa Nacom nexa. Ichitha poxonae cataunxuae baxua exanompa Galilea nacuapiwi pon Galilea nacuapiwi peyanacua ewatsinchi, pon pewun Pilato poxonae bapon baxua jume taeba, xua Galilea nacuapiwi exanompa Nacom pin pia botha, bapoxonae bapon pia soldadomonae itoroba Nacom pin pia bo beya xua pejutebinexatsi Galilea nacuapiwi. Daxita duwei jana, yawa Galilea nacuamonae jiwi jana cae jana naexananaya, jei barapomonae.

²Jesús jume nota, jeye: “¿Eta xua metha pananta xeiname? ¿Barapo pebiwi jutebatsi bichocono yatsicaya abe peexanaewixae beyacaincha pomonae abe peexanaewi pomonae jinompa Galilea nacuatha?

³Apara aibi. Icha jopa Nacom patsita xeinaem icha juntu coyene, bara paichipaem, paca weraweraca exanaetsipa. ⁴Ichacuitha metha pacui cananta xeiname pomonae dieciocho poyobe, pomonae bayatha bomuxutha mata perababatsi xua po botha bichocono taicha po bo pewun Siloé. ¿Barapomonae mata tsapababatsi bichocono abe peexanaexae beyacaincha pomonae jinompa Jerusalén tomaratha?

⁵Apara aibi. Icha Nacom jopa patsita xeinaem icha juntu coyene, paxam bara paichipaem paca weraweraca exanaetsipa”, jei Jesús.

Meje yabara poxonae Jesús yabara paeba higuera nae xua po diwesi pecayabara juta pepaebi diwesiyo

⁶Nexata Jesús tsipaeba pecayabara juta pepaebi diwesiyo. Bapon namchi, jeye: “Matha iruru pebin higuera nae xeina po nae ubanota pia pabitha. Barapo pebin pia pabitha pona pia taetsi icha yacuei dubena. Ichitha poxonae tane jopa yacuei dubenaeyo. ⁷Nexata pon pabi pexeinaein tsipaeba pontha pon pabi petayapu eenaeinchi, namchi, jeye: ‘Taema acoibi po weibe pabitha poneiban tha bequein taibichi pethei ichitha jopa yacuei dubeneibiyo. Hncataxore. Jopa ichichipaeinyo xua came barapo nae saya uncua ichaxota ubanotinchi icha nae, po nae penacoichi nae’, jei pon pabi pexeinaein poxonae tsipaeba pon pabi petayapu eenaeinchi. ⁸Ichitha pon pabi petayapu eenaein jume nota: ‘Tanentacoponaem, abu barapo nae uncuaena barapo weithe. Tha yaira tabaca nacuenacuena exanaetsi paraparatotha, bapoxonae duwei petasin jebarecaetsi petabaca deca. ⁹Metha bapoxonae matono dubenaetsipa icha weitha. Icha jopa matono dubenae tsane icha weitha nexata moya beuncataxotsi’, jei pon pabi petayapu eenaein”, jei Jesús.

Meje yabara poxonae Jesús axaibi exana yabuyo pentaquei seicae matabitha powayo naepasi xurutsiya pona

¹⁰Caentacabitha judiomonae barompaya pia pentaquei seicae matabitha tatsi Jesús cuidubauya Nacom Pejume Diwesi judiomonae pia penacaetutsi botha tatsi. ¹¹Barapo botha yabuyo eca, powa caena bayatha atene dieciocho

po weiyobe. Barapowa naepasi xurutsiya pona. Barapowa xua juntucuru epasi boipana ajibi. ¹²Poxonae barapowa Jesús tane, Jesús waba barai, jeye:

—Yabꞑyo anoxuae jopa neraichiwa, bayatha wꞑnaem, jei Jesús.

¹³Nexata barapowa Jesús pecobetha jayaba. Bapoxonae yabꞑyo epasi naroitaba yawa barapowa wꞑnae jainta, Nacom wꞑnae jaintatsi. ¹⁴Ichitha pon pecanamataxeinaein judiomonae pia penacaetutsi bo tatsi, bapon Jesús casebatsi xua axaibi peexanaexae pentaquei seicae matabitha. Bapon barai jiwitha, jeye:

—Bara irꞑ seis po matabibibe xua be cae semanatha tsofoneibi xua barapo matabintha benacuitatsi. Jame barapo seis matabintha moya papare xua axaibi painya nepaca exanaewa tsane. Nama jopa papatsinde pentaquei seicae matabitha, jei bapon pon pecanamataxeinaein judiomonae pia penacaetutsi bo tatsi.

¹⁵Bapoxonae Jesús jume nota, jeye:

—Itara mexeya pexeinya jꞑntꞑ coyene painya nexeiawe ichitha peajꞑntꞑcoyenebe jiwi pam. Ichitha paxam irꞑ panacuitame pentaquei seicae matabitha. Burro ba payama isanaxubame, bueyno ba payama isanaxubame painya apatsinexa mera pepa mene beya barapo pentaquei seicae matabitha. ¹⁶Barapowa powayo Abraham pia pemomoxi susatopiwi jiwawayo tatsi. Barapowa caena bayatha atene exanatsi. Satanás atene exana dieciocho po weyobetha. Daxota irꞑꞑꞑ barapowa xan axaibi exanan pentaquei seicae mataqueitha, jei Jesús.

¹⁷Poxonae Jesús baxua caunuta, bapoxonae pomonae Jesús pia peaitafaetabiwichi aura tsumenae. Ichitha daxita jiwi jꞑntꞑ coyene weiweina petaxae xua Jesús pexeinya pewꞑnaewa exana.

**Meje yabara poxonae Jesús cuiduba pecayabara jꞑta pepaebi
diwesiyo po peꞑbi xutiyo pewꞑn mostaza xutiyo
(Mt 13.31-32; Mr 4.30-32)**

¹⁸Equeicha Jesús namchi, jeye: “Poxonae Nacom waba jiwi petanaexanaenexatsi pijimonae tatsi, pomonae itorobiya peewatsixae, ¿eta po coyene nacoyene jꞑpabe? ¿Eta xua paca cuidubinchi xua baxua yabara? ¹⁹Baraxua apara icha be mostaza xutiyo ichi po mostaza xuto pebin ꞑba pia pabitha. Xuwa beya pin nae tsoponae. Pepinnaexae daxota siri exana coton pemaxꞑranantha. Icha mostaza xutiyo ichi xua beya pin nae tsoponae, bara jꞑta ichi Nacom pejume cowꞑntsiwi. Bequein anoxuae tsica bicheitiyo, bexa tsane beya pin bicheito tsoponae tsane”, jei Jesús.

**Meje yabara poxonae Jesús cuiduba pecayabara jꞑta pepaebi
diwesiyo xua levadura yabara xua pan cotowa exana
(Mt 13.33)**

²⁰Barichi Jesús namchi, jeye: “Poxonae Nacom waba jiwi petanaexanaenexatsi pijimonae tatsi pomonae itorobiya peewatsixae

barapomonae pin bicheitomona naenaexanapona. ¿Eta po coyene nacoyene jupabe? ²¹Barapo coyene bara juta ichi icha levadura matawun ichi, pocotsiwa cotowa exana poxonae pan exana. Petsiriwa tres po tsoropabe trigo xu beno muxuna cauwentaba levadura matawun pocotsiwa xua cotowa exana pan. Bapoxonae pentubu naexananaya, cocotowapona tsipei levadura matawun muxunaxuba”, jei Jesús.

Meje yabara poxonae Jesús yabara cuiduba po boupayo tsica boupayo dena
(Mt 7.13-14, 21-23)

²²Poxonae Jesús Jerusalén namto beya pona, cuiduba tsiniya Nacom Pejume Diwesi po bon epatotha bobena yawa tomaranthano. ²³Pomonae Jesús cuiduba barapomonae caein jiwana Jesús yainyabatsi, jeichichi:

—Patatanecanamataxeinaem, ¿saya tsiquimonaeyo pomonae capanenebiyatsi? jeichichi Jesús.

Nexata Jesús namchi jiwitha, jeye:

²⁴—Bequein bichocono ayapube xua naexana Nacom pijimonae pomonae Nacom itorobiya ewata, ichitha bichocono pajujure xua panaexaname Nacom pijimonae tatsi. Baraxua be poxonae pin bicheitomona ichichipa xua pejojondenaewa tsica boupayo dena. Bichocono ayapube. Bequein barapomonae ichichipaena xua pejojondenaewa tsane ichitha jopa itacupae tsainchi. ²⁵Barapoxonae matabi jopaena po matabitha poxonae pon bo pexeinaein pecoiboto daunwei exanaena. Paxam pomonae aisowatha paumename pecoiboto padacadacatsiname, pajam tsane: ‘Patatanecanamataxeinaem, painta coibo saranaxorena bomuxu’, pajam tsane. Ichitha bapon paca jume notsina. Jei tsane: ‘Bu canta jopa paca yaitaetsi xua jopa paca yaputaetsi xua ichaxota werena painya neponaewi’, jei tsane. ²⁶Paxam pajam tsane: ‘Bara cain bayatha paca baru xainchiba yawa paca baru apatsiba, yawa bayatha jiwi cuidubameba namtotha pata tomaratha’, pajam tsane. ²⁷Ichitha Nacom pon painya Nepacacanamataxeinaein paca jume notsina: ‘Aunxuae bayatha paca baraichiba: Bu canta jopa paca yaitaetsi. Jopa paca yaputaetsi xua ichaxota werena painya neponaewi’, jan. ‘Taxainya weya panatsixibarucupare. Apra paxam peajuntucoyenebe jiwi pam, xua abe painya neexanaewi’, paca jei tsane. ²⁸Barapoxonae pataename xua Abraham, iru Isaac, iru Jacob, iru daxita Nacom peitorobi jume pepaebiwi xua ena Nacom pia peitorobi nacuatheicha. Ichitha paxam baxoteicha jopa pana naenaem tsane poxoru paca bebai tsane Nacom pia peitorobi nacia weya. Daxota pawecoyam tsane anaya nantanuweya pana nawano tsaquibasinaename poxoru paca bebai tsane Nacom pia peitorobi nacia weya. ²⁹Poxoru pinmonae patsina, Nacom pia peitorobi nacuatha penabanaenexa tsane. Ichamonae pomonae ichaxota xometo ecoina, barapomonaepiwi patsinano. Ichamonae pomonae ichaxota

xometo jopeica, barapomonaepiwi patsinano. Ichamonae pomonae ena pocotsiwa bereca, barapomonaepiwi patsinano. Ichamonae pomonae pocotsiwa beweyabeicha ena, barapomonaepiwi patsinano. ³⁰Pomonae xua anoxuae pepawi naexana pomonae jiwi jopa petsita ainya cui jiwichi po cae pin nacuathe barapomona Nacom pia peitorobi nacuatheicha peainya cui jiwi tsane. Pomonae xua anoxuae, pomonae jiwi petsita ainya cui jiwichi po cae pin nacuathe, barapomona bexa Nacom pia peitorobi nacuatheicha jopa peainya cui jiwi tsane, jei Jesús.

Meje yabara poxonae Jesús Jerusalén tomarapiwi siwa wecoyeichi
(Mt 23.37-39)

³¹Barapoxonae fariseo jiwanamonae pata. Jesús tsipaebatsi. Jeichichi: —Bewa warapaetsipame barapo tomara weya. Dota bepa Herodes cabexubei, jei.

³²Ichitha Jesús jume nota, jeye:

—Paponare painya netsipaebinexa pon jiwi pemuxujainyabin, bapon Herodes. Pana nejume yopire pajande: “Taema anoxuae yawa baya tsane itawetsin caurimonae jiwi weya yawa axaibi exanaein peatenewi. Popobaya tsane wetsin’, jei pajande. ³³Ichitha anoxuae yawa baya tsane nantawenonan xua bara beya Jerusalén tomara beya ponaein namtotha. Barapoxonae popobaya patopiyaein Jerusalén tomaratha. Jopa tana neitacupaexae xua tatupaewa tajũ Jerusalén tomara pepuya beya ponxaein Nacom peitorobi jume tapaebin. Bewa tupaein Jerusalén tomaratha, jei Jesús fariseomonaetha.

³⁴Barapoxonae Jesús yabara unthuthũ wecoyei Jerusalén tomarapiwi. Jesús wecoyeya namchi, jeye: “iMaise Jerusalén tomarapiwi pam, pajutebeibame pomonae Nacom pia peitorobi jume pepaebiwi! iMatautano paxam pajutebeibame ibotontha pomonae Nacom pacata itoroba! iMaise bepaca caetucaetuteibinchi, tapaca cayawenaewa tsainchi, icha wacara ichi poxonae nacoxi caetucaetuteta pecuarafetha! iMaise bebarichocuaein tsane daichitha jopa paichichipaem! ³⁵Incane pataema Nacom nacui baraxuba xua jopa painya nepaca caewatsiwa tsane. Daxota Nacom jopa poponaeyo pia pin pia botha tatsi painya tomaratha. Paca tsipaebatsi xua equeicha jopa pana netaem tsane, beya abũ poxonae pana neyabara jam tsane: ‘iMaise bapon jiwi jũntũ coyene weiweina cana exanatsi, pon patopa Nacom peitorobixae, po Nacom jiwi Pecanamataxeinaeinchi!’ pana neyabara jam tsane”, jei Jesús fariseomonaetha.

Meje yabara poxonae Jesús axaibi exana pon peru putsuna

14 ¹Caentacabi pentaquei seicae matabitha Jesús pona fariseomonae pia pentacaponaei tatsi jiwanapin pia botha tatsi penanabanaenexa. Baxota fariseomonae ichamonae Jesús amanayabiya tainchi pecui yaputaenexa tsainchi xua exana. ²Iru baxota pebin

patopa ichaxota Jesús naeca. Barapo pebin pon peru putsuna. ³Nexata Jesús yainyaba pomonae jiwi pecuidubiwi Moisés pia peitorobi coyene, yainyabano fariseomonae, jeye:

—¿Bara Moisés pia peitorobi coyene jumewatha yabara copata jampa xua pon atene bara axaibi peexanaewatsi pentaquei seicae matacabitha jampa? ¿Ichacuitha metha jopa yabara copatsiyo jampa? jei Jesús.

⁴Ichitha barapomonae moya umena. Bara Jesús jayaba pecobetha pontha pon atene, yawa axaibi exana, tsipaebano xua bara peponaenexa.

⁵Jesús tsipaeba, barapo fariseomonaetha, jeye:

—Paxam panantawenoname xua panacuitame pentaquei seicae mataqueitha xua poxonae pajutsiname painya nexanto xua poxonae butecatsi iruba bueyno bara bequein pentaquei seicae matacabi, jei Jesús.

⁶Barapomonae jopa itacupaetsi xua Jesús pejume notsiwatsi.

**Meje yabara poxonae Jesús yabara paeba pomonae pexaewa
petsiwabiwichi penabanaenexa poxonae pebin piowa pita**

⁷Nexata Jesús tsipaeba barapomonae pecayabara juta pepaebi diwesiyo pomonaetha pomonae xua pata penabanaenexa. Baxua tsipaeba poxonae tane xua barapomonae nanta caeniya, copiya penabanaenexa. Jesús namchi barapomonaetha, jeye:

⁸—Poxonae ichun cawaba jinya nenabanaenexa tsane, jopa nantacaecaeinde ichaxota enothopeiba pomonae peainya cui jiwi. Poxoru metha iruru patopaetsipa pon bichocono jiwi tsita ainya cuichi pon beyacaincha xam.

⁹Pon xua cawaba, iru xua wabatsi pon jiwi tsita ainya cui naexanatsi, bapon cabarai tsipae: ‘Incane nontaponde icha muxunenetha ecare. Cotacaya xaema. Ichaxota ecame, baxota ecaena pon jiwi tsita ainya cui naexanatsi’, jei tsipae pon xua paca mata canabane. Nexata icha muxunenetha uranaya ecoundecaetsipame. ¹⁰Daxota poxonae cawaba nenabanaenexa, cotacaya ecareinca necajeinexa poxonae patopa pon paca mata canabane: ‘Tajiton, icha muxunenetha ecare ichaxota xaiba pomonae jiwi tsita ainya cui naexanatsi’, jei. Bapoxonae pomonae pata xua penabanaenexa barapomonae cayaitaena xua xam pon jiwi tsita ainya cui naexaname. ¹¹Pon pia coutha peainya cui jiton naexana pejuntu coyenetha, Nacom exanaena xua bapon pecui pawi jiton naexanaena. Ichitha pon xua pepawi naexana pejuntu coyenetha Nacom exanaena xua bapon peainya cui jiton naexanaena, jei Jesús.

¹²Yawano Jesús barai pontha pon pexaewa petsiwabixaetsi, jeye:

—Poxonae pexaewa tsioxaname yawano ichacuitha xua poxonae pin penabanaewa tsioxaname, jopa wabinde jinya jiwimonae penabanaenexa. Iru jopa wabinde eweichomonae iru jinyamonae iru pomonae copei pexeinaewi. Poxoru barapomonae pentoma exanaetsipa xua xuya catsi wabichipa penabanaewa. ¹³Jame maisa poxonae jiwi pexaewa tsioxaname yawano ichacuitha pin penabanaewa tsioxaname, wabare

pomonae peacopeibi jiwi. Yawa wabare pomonae jopa peainya cui jiwi, iru pejajuyajuyei jiwino, iru pomonae peitata nacutsi jiwino. ¹⁴Bapoxonae juntu coyene weiweinaename. Barapomonae jopa itacupaetsi xua xuya necatsi wabiwa penabanaewa xua pentoma nexa. Ichitha Nacom cata exanaena pentoma poxonae jiwi asu exanaeinchi pomonae pejuntu coyene wunae jiwi, xuano xua exana pocotsiwa Nacom itoroba, jei Jesús.

**Meje yabara poxonae Jesús cuiduba pecayabara juta pepaebi
diwesiyo xua pin penabanaewa peexanaewa tsane
(Mt 22.1-10)**

¹⁵Poxonae baxua jume tane, pomonae xua xayena, barapomonae caein jiwana Jesús baraichichi, jeichichi:

—iPon xua nanabane Nacom pia peitorobi nacuatheicha tatsi, bapon bichocono juntu coyene weiweina! jeichichi Jesús bapon.

¹⁶Nexata Jesús jume nota, jeye:

—Pebin pin penabanaewa tsiexana jiwi. Barapo pebin itoroba ichun, xua pewabinexa ayei bicheito. ¹⁷Poxonae barapo hora tsuxubi poxonae pexaewa naci wunaeta, bapon itoroba pia petanacuichinchi xua pewabinexatsi pomonae bayatha wabatsi. Barapon namchi: ‘Pajande jiwi: Antha pajojondena jei. Pexaewa weta jei, pajande’, jei pon mata canabane. ¹⁸Ichitha daxita barapomonae paeba xua pinae enatsi xua peexanaewa. Ichun namchi: ‘Bayatha pabi comotan, tha canta matha taetsi. Nexata nejume yopire pinae jopa casebinde yaitama pinae jopa patopae tsane, jande’, jei. ¹⁹Ichun namchi: ‘Canta diez poyobe comotan buey. Tha canta matha taetsi. Nexata nejume yopire pinae jopa casebinde yaitama pinae jopa patopae tsane, jande’, jei. ²⁰Ichun namchi: ‘Canta anoxuaetha taseuri pitan. Nexata nejume yopire pinae jopa itacupaetsi xua pepatopaewa tsane, jande’, jei. ²¹Poxonae caibe nawiya pon penajume caitorobinchi bapon daxita baxua tsipaeba pia pecanamataxeinaeinchitha. Nexata pon pecanamataxeinaein caseba pomonaetha pomonae bequein pewabixae, xua jopa pepatsixae. Bapon barai pia petanacuichinchi, jeye: ‘Nainya ponde tomara namtontha, yawa tsiqui namtoxitha tomara cuariya. Berene peacopeibiwi caponde, penabanaewi caponde, pejajuyajuyejimonae caponde, pomonae peitata nacutsi jiwi berene caponde’, jei pon pecanamataxeinaein. ²²Pon petanacuichin pia pecanamataxeinaeinxaetsi, bapon pia pecanamataxeinaeinxaetsi barai: ‘Tanecanamataxeinaem, xua neitorobame bayatha exanan, ichitha bomuxu jopa tutu canaupaxubiyo, jiwi yayatha’, jei.

²³Nexata bapon jume notatsi pia pecanamataxeinaeinchi: ‘Equeicha nainya ponde tomara cuariya beya po namton pin namtontha, yawa tsiqui namtoxithano tomara cuariya. Baxota jume daunweya

itorobare pomonae xua taneme xua pepatsinexa tabotha petutu canaꝑaxubinexa tsane. ²⁴Catsipaebatsi, pomonae bequein waban ichitha jopa patsiyo, barapomonae jopa nabanae tsane tabotha', jei pon pecanamataxeinaein, jei Jesús.

Meje yabara poxonae Jesús paeba xua pinae bewa matha nacui barapentsi pia peexanaewan poxonae Jesús pepuna jinompaewa tsainchi
(Mt 10.37-38)

²⁵Pin bicheitomonae Jesús puna poinchi. Jesús napatomeicha necota, namchi barapomonaetha, jeye: ²⁶"Icha pebin ichichipa xua tajiwiwimonae jiwanapin penaexanaewa tsane, bapon bewa yabara naitematsi pia peexanaewa. Bapon jame bewa neantobe tsane beyacaincha xua paxatha, beyacaincha xua penatha, beyacaincha xua piowatha, beyacaincha xua pia pexuitha, beyacaincha xua peweichowitha, beyacaincha xua pamchoxitha, yawano xua beyacaincha naantobe pia coutha, nexata bapon bara tajiwiwimonaepin. Ichitha icha jopa baxua exanaeyo xua bichocono nama tana neantobewa, bapon jopa tajiwiwimonaeyo.

²⁷Matautano pon jopa awiya exana ducuaenaebiyaeyo pocotsiwa itoroban, tsipei jopa beperaxa exanaetsi icha be xua poxonae neichi nexata bapon jopa tajiwiwimonaepinyo. ²⁸Poxonae pebin imoxoyo bo exana, po bo, pin bo, copiya matha nanta xeina xua bo yabara, copiya coichaxu ununa, icha jupa xua pecubaponaenexa pomonae nacuita bo. ²⁹Ichacuitharu saya naewa wetanota, poxoru coichaxu axu weraweraca. Daxota jopa yaputaeyo xua pewetsiwa. Ichamonae pata, barapomonae bo taenota. Poxonae tane barapomonae cui capona, bapon cui caponatsi.

³⁰Barapomonae namchi tsane, jei tsane: 'Barapon tamropata pitaba bo xua acaba, ichitha jopa itacꝑaetsi xua pewetsiwa', jei tsane", jei Jesús.

³¹Equeicha Jesús namchi: "Iruꝑu pon jiwi itorobiya pia pepa peewatsinchi ichichipa xua jiwi naba exana ichun beya pontha pon iru jiwi itorobiya pepa peewatsin. Poxonae bapon baxua exana, copiya nanta xeina, najei tsane: 'Jamaisa, saya beisa diez mil po soldadomonae bicheitobe neyaewatacua, bapon netsi veinte mil po soldadomonae bicheitobe yaewatatsi. Metha tamonae jopa inta itacꝑaetsi xua peamanayabiwa barapo veinte mil bicheitho xua taxainya berena ponaena', najei tsane.

³²Icha barapon jopa itacꝑaetsi xua peamanayabiwa, bapon najume caitorobina ichuntha, poxonae cataunxuae taju eca, ichun pon icha nacuapiwi itorobiya pia pepa peewatsinchi xua petapaebinexa tsainchi xua jopa penabiwa tsane yabara, xua equeicha juntea pejinompaenexa.

³³Icha bapon ichi pon jiwi itorobiya pia pepa peewatsinchi xua baraxuba xua nanta xeina, xua penabiwa tsane, barichi icha paxam jopa pabarapentsim daxita pocotsiwa paxeiname, jopa paca itacꝑaeyo xua tajiwiwimonae painya nenaexanaewam", jei Jesús.

**Meje yabara poxonae Jesús diwesi yabara paeba xua
bequein sare xoya pexaewatha ichitha awiya axaibi
(Mt 5.13; Mr 9.50)**

³⁴Equeicha Jesús jeye: “Sare beno, bara beno wūnae. Ichitha icha barapo sare beno jopa abenataeyo, bapoxonae jopa peitacūpaewatsi xua equeicha peabenataewa. ³⁵Barapo sare jopa ira nexiyo tsipei naein jopa beta xuwa exanaetsi. Daxota barapo sare jiwi bewa xubi. Icha pamuxu dubename moya pana nejume naitaeware pocotsiwa tapaca tsipaebiwatsi”, jei Jesús.

**Meje yabara poxonae Jesús paeba pecayabara jūta pepaebi
diwesiyo xua oveja pe-eenaen yabara xua poxonae pia oveja taeba
(Mt 18.10-14)**

15 ¹Pomonae paratixi pentoma noteibiwi, po paratixi jiwi bewa catsibina pon romanomonae itorobiya pia pepa peewatsinchi nexa, irū pomonae abe peexanae cuiuru coyene peexaneibiwi daxita barapomonae Jesús imoxoyo caquita umenarūcūpatsi xua Jesús pejume taenexatsi. ²Daxota fariseomonae irūru pomonae jiwi pecuidubiwi Moisés pia peitorobi coyene tatsi daxita barapomonae Jesús abe yabara paebatsi. Barapomonae namchi, jeye:

—Barapo pebin naponā pomonaetha pomonae abe peexanae cuiuru coyene peexanaewi, yawa barapomonaetha nanabane, jei.

³Tsipei Jesús yabara paebatsi barapomonae, daxota nexata Jesús tsipaeba pecayabara jūta pepaebi diwesiyo jeye: ⁴“Jiton ba xeina oveja cien poyobe, caein tanapuxanatsi. Jiton wexotha cuenta pona noventa y nueve poyobe oveja pewenaweneinexa oveja pon beya matapainya taeba. ⁵Poxonae jiton oveja taeba pon aichurucuae, jūntū coyene weiweinaya bota peutucuratha. ⁶Poxonae jiton oveja capatopa botha bapoxonae piamonae waba pomonae petaenaewichi pia botha, pia jiwi wabano, wabano pomonae petsicuarabū enaewichi. Jiton daxita barapomonaetha barai, jeye: ‘Panebaru jūntū coyene weiweinare tsipei oveja bayatha taeban pon bayatha inta aichurucuae’, jei bapon piamonaetha. ⁷Xaniyan paca tsipaebatsi. Icha jiton ichi poxonae jūntū coyene weiweina petaebixae oveja, barichi pomonae peitaboco beicha ena. Bapomonae bichocono jūntū coyene weiweina poxonae ichūn Nacom tsita xeinatsi icha jūntū coyene pon copiya penacui matacaetsin xua abe peexanae cuiuru coyene exana. Barapomonae bapon yabara toxeinchiya jūntū coyene weiweinatsi beyacaincha poxonae yabara jūntū coyene weiweinatsi pomonae xua noventa y nueve poyobe jiwi pomonae xanepanaya peexanaewi, pomonae jopa Nacom pentichi”, jei Jesús.

**Meje yabara poxonae Jesús paeba pecayabara jūta pepaebi
diwesiyo xua yabūyo yabara xua poxonae taeba paratiyo**

⁸Equeicha Jesús paeba pecayabara jūta pepaebi diwesiyo, jeye: “Petsiriwa diez po paratiyobe xeina xua pecacomocae paratixi. Cae paratiyo

taaichurucuaetsi, daxota pecoicha coicha exana. Bo tutu camona bewayo, beya matapainya taeba. ⁹Poxonae barapowa paratiyo taeba bapoxonae pia jitowaxi waba, wabano powaxi petsicuarabũ enaewaxichi. Barapowa namchi barapowaxitha: ‘Pana nebarũ jũntũ coyene weiweinare poxoru bayatha taeban paratiyo, po paratiyo bayatha inta aichurucuae’, jei. ¹⁰Paca tsipaebatsi barichi peitabocothaicha Nacom pia matatsunpiwimonae tatsi bichocono jũntũ coyene weiweina poxonae ichũn Nacom tsita xeinatsi icha jũntũ coyene pon copiya penacui matacaetsin xua abe peexanae cuiru coyene peexanaein”, jei Jesús.

Meje yabara poxonae Jesús paeba pecayabara jũta pepaebi diwesiyo xua pebin yabara pon pexanto cayabara cui jũntemaina xua abe exana

¹¹Barichi equeicha Jesús paeba icha pecayabara jũta pepaebi diwesiyo, jeye: “Jiton xeina pexantobe. ¹²Pon xuyapin paxa barai: ‘Axa, necare xua necopiniwa tsane pocotsiwa xua pana nejũntana jebame bequein cataunxuae poponame’, jei xuyapin. Nexata barapo jumetha coxiyan pexantobe tsata catabe. ¹³Pirapaeyo xuyapin piawa caenaeta xua paxa catatsi. Barapo paratixi cuntha tajũ beya pona icha nacua beya. Icha nacua abe exana. Barapo paratixi cobe caewitatsi xua nasi cui matacaeta yabũxitha. ¹⁴Poxonae bapon daxita paratixi wetaxuba, irũrũ mayayo tsuxubirũ barapo nacua abe, barapon muxu piyain petũpae. ¹⁵Nexata bapon jeita penacuichiwa ichũnthã xua barapo nacua abe. Bara barapon itorobatsi xua petayapu eenaenexa marranomona. ¹⁶Bapon piyain ichichipa xane marranomona pexunenowa xua petsebocoton, tsipei bapon jopa catichi pexaewa. ¹⁷Nexata bapon pia coutha nanta xeinanaya najei: ‘iMaise taxa pia petanacuichiwichi tatsi pexaewa ajainbe, tonsana nawita! Nama xota ecanje tain muxu tatũpae. ¹⁸Tha tacoyo beya nawiyaetsi ichaxota taxa popona. Metha jan tsane: Axa, Nacom tsita abe exanan, yawa catsita abe exanatsino. ¹⁹Daxota equeicha jopa be taxanto, nejam. Nenatsicotaema be jinya necata nacuichiwi jiwanan, jan tsane’, najei barapo xuyapin. ²⁰Nexata bapon paxa beya caibe nawiya.

“Poxonae cataunxuae tajũ jiniya, paxa taebiyatsi, coxiyan pexanto yabara nantanuweya cui nanta xeina. Coxiyan pexanto matenta cuinaepoinya. Nexata pexanto cobe jayaba. Jũntũ coyene weiweinaya pexanto naisa cateita waetaba peantobexae. ²¹Nexata barapo xuyapinxae paxa barai: ‘Axa, Nacom abe tsita exanan, yawa abe catsita exanatsino. Daxota equeicha jopa be taxanto nejam. Nenatsicotaema be jinya necata nacuichiwi jiwanan’, jei barapo xuyapin. ²²Ichithã coxiyan barapo jumetha barai pia petanacuichiwichi: ‘Nainya papire pexeinya paparuwa pamaxatare taxanto. Yawa anillo pacobesi xatare. Yawa pataxu xatare xua penataxu xatatsiwa. ²³Vacayo pebtiyo poyo nasiteca pacarenande. Pabexore. iBũ xainchi! ²⁴Poxoru barapo taxanto mexeya nacata

tupawejan, ichitha anoxuae asu. Bayatha nacata aichawiya, anoxuae matapainya netsita patopa', jei coxiyan. Nexata bapoxonae tamropata notarucupa xua weiweina poxonae xane", jei Jesús.

²⁵Equeicha Jesús namchi, jeye: "Iruru pin penabanaewa exanempa, iruru matapin pabitha popona. Poxonae bo benawirena busi taeba xua busi tanbaba yawa jume tane xua juinya nawiraba. ²⁶Nexata barapon pon matapinxae waba caein pomonae penacuichiwi. Yainyaba, jeye: '¿Eta xua juinya busi exanempa?' jei. ²⁷Nexata barapon pon penacuichiwi jiwana jume nota. Jeye: 'Apara poxoru neyapin patopa. Axa pana itoroba bepa pinae pabexubin vaca pebtiyo poyo nasiteca, poxoru pinae neyapin xanepanaya asuya pepatopaexae', jei. ²⁸Ichitha barapon pon matapinxae barapo jumetha anaepana. Jopa bejoniyaeyo botha. Coxiiyan pesato bejoniya, pexanto jume daunweya waba: 'Owae, antha, antha jonarena', jei coxiyan. ²⁹Nexata barapo coxiyan pexanto jume notatsi: 'Bara xam caena bayatha yaputaneme xua ainya wei cata nacuitatsi yawa jopa cajumefebichi. Ichitha bapana jopa necatsim peweinyo cabritiyo, tajiwimonae tabaru nabanaenexa. ³⁰Ichitha barapo nexanto anoxuae cata patopa, xua jinya paratixi caewitaxuba xua penasi cui matacaetsiwa yabuxitha. Xam penacuichiwi itorobame xua vacayo pebtiyo bexubina poyo nasiteca tayapin nexa', jei barapon pon matapinxae.

³¹"Nexata coxiyan jume nota pexanto: 'Owae, apara xam cabaru poponeibatsi. Daxita pocotsiwan xeinan, apara bara jinyawa. ³²Ichitha anoxuae wuna nawita xua pin penabanaewa, yawa juntu coyene weiweinaeinchi poxoru barapo neyapin, pon xua mexeya nacata tupawejan, anoxuae asu popona. Caena bayatha nacata aichurucuae, yawa anoxuae matapainya naca tsita patopa', jei coxiyan poxonae pexanto tsipaeba", jei Jesús.

Meje yabara poxonae Jesús paeba pecayabara juta pepaebi diwesiyo xua pebin yabara pon jopa xanepanaya peyapucaecaein bo

16 ¹Equeicha Jesús tsipaeba pijimonae pecayabara juta pepaebi diwesiyo. Jesús jeye: "Matha iru pebin popona pon copei pexeinaein. Bapon xeina pon bo petayapucaecaeinchi. Bapon pon copei pexeinaein tsipaebatsi ichamonae xua pinae pon bo petayapucaecaeinxatsi jopa pinae xapain exanaeyo, saya pinae abe exana, jei ichamonae. ²Nexata bo pexeinaein pon copei pexeinaeinxae, bapon waba pia petayapucaecaeinchi bo. Bapon barai pontha pon bo petayapucaecaeinchi, jeye: '¿Jame ichamonae jume tan xua pinae inta abe exaname xua tawan? Incane tha taetsi xua po paperantha tinadubame pocotsiwa inta caenaetame, xuano xua inta comocame. Tsipei jopa becaexanaetsi equeicha xua inta yapucaecame daxita tawan', jei. ³Nexata pon bo peyapucaecaeinxae nacui yabara nanta

xeina pia coutha, nabarai: ‘¿Eta pocotsiwa exanocuaein anoxuae tsipei nama pon tanecanamataxeinaein imoxoyo necopata xua bapoxonae jopa taxeinaewa tsane pocotsiwa taexanaewa? Jopa nebusi coxonaeyo xua naein tauncatsiwa pabitha. Auran tsipae xua saya amanaya i tawuqueibiwa paratixi. ⁴Jaina, bara yaputan xua po coyeneya exanaein poxonae tanecanamataxeinaein necopatsina, xua poxonae jopa xeinaein tsane tanacuichiwa xua ichamonae tanententa wabeibinexa pia botha’, jei. ⁵Nexata bapon pon bo petayapucaeaein daxita tamropatsiya wawabapona pomonae pia pecanamataxeinaeinchi petantoma amanayabixaetsi. Bapon matha yainyaba pontha pon copiya patopa jeye: ‘¿Eta xoyobe matoma amanayabame xua jopa cataunxuae catsim pontha pon tanecanamataxeinaein?’ jei. ⁶Bapon jume nota, pon bo peyapucaeaein, jume notatsi, jeye: ‘Cien po penasi mera bosibube xua pin bosixibun tha baxua catichi, ichitha cataunxuae jopa baxota matomatsinyo barapo penasi mera bosibun’, jei. Pon bo petayapucaeaein xuya jume nota: ‘Taema xote xeinanje jinya papera xua tinadutame, cien po nasi bosixibun, jam, xua bexa matomatsiname. Xote nainya ecoundeinqe barapo netinadutsiwa, iquinaxore. Icha itaneto dure xua saya cincuenta po penasi mera bosixibube, jande’, jei pon bo petayapucaeaein. ⁷Bapoxonae equeicha ichuntha yainyaba: ‘Incane iru xamdu, ¿eta xoyobe tanecanamataxeinaein taacoibichi xua catsiname bapon?’ jei. Bapon jume nota, pon bo petayapucaeaein jume notatsi, jeye: ‘Tha catichi cien po sacube aro sacun’, jei bapon. Nexata pon bo petayapucaeaein xuya jume nota: ‘Taema xote xeinanje jinya papera xua bayatha tinadutame xua cien po sacube, jam, xua bexa matomatsiname pontha pon tanecanamataxeinaeintha. Xote nainya ecoundeinqe barapo itaneto tsitsinaxore, icha pena netinadutsiwa tinadure xua saya ochenta po sacube, jande’, jei pon bo petayapucaeaein. ⁸Ichitha bo pexeinaein yabara paeba pon bo petayapucaeaeinchi xua pinae bequein bara bapon abe taexana ichitha yaputane xua pocotsiwa pia coutha nayawena xua poxonae pia jiwimonae peexanaewa. Daxota paca tsipaebatsi pomonae anoxuae jinompa barapo cae pin nacuathe, pomonae jopa penejume cowuntsiwi nama barichi. Barapomonae yabara najuntu coyene wunaeta xua po coyene cae jiwimonae penaexanaewa xua daxota cae jiwimonae nantiya penayaweneibinexa. Baxua barapomonae exana beyacaincha pomonae Nacom pejume cowuntsiwi.

⁹“Paca tsipaebatsi ichamonae pacatsibeibare paratixi xua painya jiwi painya neexaneibinexa po paratixi xeina pomonae barapo cae pin nacuathepiwi pomonae abe peexanaewi. Bapoxonae poxonae jopa paxeinaem tsane paratixi pomonae bayatha payawename barapomonae paca matenta weiweinaya wabina po bontha xua ataya tsitecaeya pajinompaename.

¹⁰“Pon xua xanepanaya yapucaeca xua poxonae peya penacuichiwiyo, barichi beta yapucaeca xua poxonae pin penacuichiwa. Pon naerabiya exana poxonae peya penacuichiwiyo, barichi naerabiya exanaena xua poxonae pin penacuichiwa. ¹¹Icha paxam jopa xanepanaya patayapuentaem xua paratixi xua barapo cae pin nacuathe nexa, Nacom jopa paca itorobiyo xua patayapuentaename xua bapon pia pexeinya pexeinaewa tatsi. ¹²Icha jopa xanepanaya payapucaecaem ichun piawa, metha nexata jopa paca catsipae xua painyawa nexa tsane painya neyapucaenaewamxae.

¹³“Jiton dapon aibi pon xeina ainya pia pecanamataxeinaeinchibe tatsi xua pon beta tanacuita barapo pia ainya pecanamataxeinaeinchibe tatsi. Tsipei barapo petanacuichin meisa antobeya taexana caeintha pon pia pecanamataxeinaeinchi poxonae itorobatsi. Icha pia pecanamataxeinaeinchi jopa taraichiyo. Cae pia pecanamataxeinaeinchi xanepanaya taexana. Icha pia pecanamataxeinaeinchi abeya taexana. Barichi jiton pon bichocono antobe Nacom, jopa itacupaetsi xua bichocono peantobewa paratixi poxonae yawa bichocono antobetsi Nacom”, jei Jesús.

¹⁴Ichitha fariseomonae pomonae xua bichocono antobe nawita paratixi, barapomonae baraxua Jesús jume tayenatsi, yawa Jesús cui caponatsi. ¹⁵Nexata Jesús fariseomonae baraichi, jeye: “Paxam barapomonae pam, xua ichamonae paca yabara nanta xeina xua pejuntu coyene xanepanae jiwi pam. Ichitha Nacom paca juntu coyene yaputane xua peajuntucoyenebe jiwi pam. Xua pocotsiwan jiwi bichocono tsita ainya cuichi, baxuan Nacom bichocono tsita abetsi”, jei Jesús.

**Meje yabara poxonae Jesús diwesi yabara paeba Moisés pia peitorobi
coyene tatsi, yawa po coyene Nacom waba jiwi petanaexanaenexatsi
pijimonae pomonae itorobiya pecanamataxeinaexae**

¹⁶Equeicha Jesús namchi, jeye: “Caena bayatha jiwi xeina Moisés pia peitorobi coyenewa tatsi, yawano xua pomonae Nacom peitorobi jume pepaebiwi pia pecuidubiwa tatsi, beya Juan patopa. Barapoxonae caena poxonae Juan popona pon jiwi Pebautisabin, jiwi paebinouta po coyene Nacom xua waba jiwi petanaexanaenexatsi pijimonae tatsi pomonae itorobiya peewatsixae. Jiwi bewa yabara najuntu coyene subi awiya xua pepatsinexa Nacom pia peitorobi nacua beicha tatsi.

¹⁷“Yapu xanepana xua itaboco yawa ira peweraweracaewa. Nama Nacom peitorobi jume ajumeyapusu bapana jopa peweraweracaewa bequein bara cae peitorobi coyene”, jei Jesús.

**Meje yabara poxonae Jesús cuiduba xua
jiwi piseurixi pepuna penteibiyainwa
(Mt 19.1-12; Mr 10.1-12)**

¹⁸Equeicha Jesús namchi, jeye: “Pon punaxuba piowa yawa ichowa pichapa, bapon abe exana piseuritha yawa Nacom peitutha tatsi, tsipei

Nacom tsitatsi xua powa copiya baru popona apara bara piowa tatsi. Barichi pon pita petsiriwa powa pepunaxubixae piseuri, bapon barichi pia coutha abe natsiexana, tsipei Nacom ichowa yabara nanta xaina xua bapowa cataunxuae pia pebin xaina bequein bara punaxuba”, jei Jesús.

**Meje yabara poxonae Jesús diwesi yabara paeba xua
pon copei pexeinaein iru ichun pon Lázaro**

¹⁹Equeicha Jesús tsipaeba icha diwesi, jeye: “Matha iruru barichi pebin pon copei pexeinaein. Pexeinya paparuwan xua pena paparuwa nama xatabapona. Matauta daxita matabi peitupanae nabanaewa exaneiba. ²⁰Iruru ichun pebin popona, pon pewun Lázaro pon peacopeibin. Bapon Lázaro wan nawita xaina peparutotha. Bapon iratha eca pon copei pexeinaein pia bo bopatha weya tatsi. ²¹Xua pon copei pexeinaein pia pexaethopaewatha taothopeicatsi pexaewa perurwan, baraxua Lázaro ichichipa xaiba. Yawa aurimonae pata xua Lázaro pewan daebinxatsi. ²²Icha matabitha Lázaro tupa. Matatsunpiwi Lázaro jumope pitatsi. Jumope capoinchi ichaxota Abraham popona athabeicha. Iruru pon copei pexeinaein tupa, yawa muthutha xotsi.

²³“Pon copei pexeinaein patopa ichaxota pateiba pomonae pewerapeibiwi barapo petupa cuiuru coyene nacuatha. Bapon bichocono atene. Bapon athabeicha necoicha. Bapoxonae Abraham taju taebiyatsi asiyeicha, yawa xua Lázaro baru equiyatsi. ²⁴Pon copei pexeinaein wawai: ‘Tamo susato jiwana, Abraham, necui yabara nanta xinare. Inta Lázaro itorobinca taneebato memeinyatsinexa meratha poxoru bichocono netaxua po isotothe uncuan’, jei. ²⁵Ichitha Abraham jume nota: ‘Tamonae susato jiwana, nanta xeinatabare xua caena bayatha poxonae cataunxuae asu poponame, xiname xua acabem xua pocotsiwan ichichipame xua nexinaewa. Xanepanaya poponame. Ichitha nama Lázaro jopa daichiyo poxonae cataunxuae asu popona. Jopa xanepanaya poponaeyo. Xote bapon wunae yabara nantanuweya cananta xeinatsi xua peyawenaenexatsi. Ichitha nama xam jopa caraichiyo. Bichocono caperu weyawa. ²⁶Yawa pin pitapatororo naca yacaincha ducua. Daxota pomonae ichichipa bara bedunareca taxainya werca jopa itacupaetsi xua bara beparecaena nexainya bereca. Iru pomonae nexainya weruneina jopa itacupaetsi xua taxainya betsina pepatsinaenexa’, jei.

²⁷“Nexata pon copei pexeinaein jume nota: ‘Nexata tamo susatopim cawucatsi inta Lázaro itorobare taxa pia bo beya. ²⁸Baxota xeinan cinco poyobe tayapin jiwi. Abraham Lázarotha najume carure xua bu tayapin jiwi jopa pepatsinexaru tsane ichaxota uncuan xua bichocono atenein’, jei. ²⁹Ichitha Abraham jume nota: ‘Apara neyapin jiwi xaina Moisés pia peitorobi coyene tatsi, yawa Nacom peitorobi jume pepaebiwi pia penacuidubiwan tatsi. Bu barapomonae exana pocotsiwa baraxua pejume coya’, jei Abraham. ³⁰Pon copei pexeinaein jume nota: ‘Aa, tamo susato jitom, Abraham, ichitha icha petupaewi jiwana caein siwa ponaena barapomonae beya, barapomonae jume cowuntsina yawa icha juntu coyene pexeinaenexa tsane Nacomtha’, jei. ³¹Ichitha Abraham jume nota: ‘Icha barapomonae jopa exanaeyo

xua peexanaewa pocotsiwa Moisés pia peitorobi coyene tatsi itoroba, xuano xua Nacom peitorobi jume pepaebiwi pia pecuidubiwan tatsi, barapomonaе jopa jume cowuntsipae bara bequein Nacom taitorobichipa xua jiwana caein pomonaе petupaewi, jei Abraham”, jei Jesús.

**Meje yabara poxonaе Jesús paeba xua jiton jopa bewa
cana exanae ichuntha xua iru abe peexanaewa tsane**
(Mt 18.6-7, 21-22; Mr 9.42)

17 ¹Jesús namchi pijimonaetha, jeye: “Barapo nacuathepiwi ataya xeineiba po jiwi pecana exanaexaetsi xua ichamonae cana exana xua barapo jiwi abe peexanae cuiru coyene peexaneibinexa xua daxota jopa nejume cowunteibiyo. Ichitha pebin tsocuae xua bapon cana exana, xua ichun cana exanatsi, xua ichun abe peexanaewa tsane. ²Metha jame wunae tsipae xua barapo pebin pin iboto wisi cutsipatsi pin mar mentha barapo iboto cayawa cabutabachipatsino. Tsipei jopa wunae tsipae xua bapon cana exana xua ichamonae abe peexanae xuiru coyene exana pomonaе cataunxuae aena nejume cowunta. ³iDota pam, xua jopa bara paichim tsane!

“Icha ichun pon iru pejume cowuntsindu, icha bapon pacata abe exana, bapon baxua yabara patsipaebare. Icha icha juntu coyene paca tsita xeinaena peuraxae xua pacata exana, bapoxonaе pacui yabara juntemainare pocotsiwa bapon pacata exana. ⁴Bequein bara bapon abe pacata exana, siete po cuiyobe xua cae matabitha, yawa paca tsipaeba siete po jumeyobe, bapon jeye: ‘Maisa auran tsocuae xua abe pacata exanatsi, equeicha jopa pacata abe exanae tsainchi’, jei pon abe exana. Daxota paca jeichi xua nantawenona peyabara juntemainaeewa baxua xua po coyene bapon pacata abe exana”, jei Jesús.

Meje yabara poxonaе Jesús yabara paeba xua pin pejume cowuntsi coyenewa

⁵Jesús pon Pecanamataxeinaein jiwi, equeicha pia peitorobiwi baraichi, jeye: —Pana cana exande xua bichocono pata jume cowuntsiwa beyacaincha xua anoxuae, jei barapomonaе.

⁶Nexata Jesús pia peitorobiwi jume nota, jeye: —Icha paxeinaetsipame xua be peya pejume cowuntsi coyenewiyo xua bequein icha mostaza xutiyo juta ichi xua tsica xutiyo ichitha bara paca itacupa xua naewatha painya nejeiwa: ‘Ee, naewa jinya coutha natabu jonde yawa pin mar mene beya equeicha uncuare’, painya nejeiwa. Bapoxonaе barapo nae jopa bayatha tsipae poxonaе pajam tsipae baxua, jei Jesús.

**Meje yabara poxonaе Jesús paeba xua pocotsiwa jiwi
bewa exanae pocotsiwa pentacaponaein itoroba**

⁷Equeicha Jesús namchi, jeye: “Metha ba paxam jiwana caein xeina pia petanacuichinchi pon penacuichin bapon ira cacobauya, matauta vaca

yapu capopona. Bapoxonae bapon pon penacuichin wexua wenawirena, bo benawirena. Pon paxam jiwana caein metha bapon jopa jei tsipae: ‘Anetha, jondena matha xaema’, jopa jei tsipae bapon. ⁸Jame bapon jei tsipae: ‘Pexaewa netsiupain exanare. Inta carena tsaibinde pexaewa pexaethopaewatha poxonae xunaecan. Bapoxonae cotacaya bexa nabanare’, jei tsipae pon paxam jiwana. ⁹Pon penacuichin jopa jei tsipaetsi: ‘Jaco xua taneyawenaewam’, jopa jei tsipae pon paxam jiwana. Tsipei saya taexanatsi xua bapon peitorobixae. ¹⁰Icha pon petanacuichin ichi xua taexana peitorobixaetsi pia pentacaponaein, paxam bara juta paichinde. Poxonae pawetame pocotsiwa Nacom paca itoroba, pajande: ‘Paxan pata nebusi cui tataewimonae pan xuano pata pecui pawi pan, tsipei saya paexanan xua pocotsiwa bewa paexanaein’, pajande’, jei Jesús.

**Meje yabara poxonae Jesús axaibi exana diez poyobe
pebiwi, pomonae peperu sawichimonae**

¹¹Poxonae Jesús cataunxuae ecapona Jerusalén tomara beya nexa, Samaria nacua iya pona yawa Galilea nacua iya pona. ¹²Poxonae Jesús tsica tomariyotha patopa, diez poyobe pebiwi pata Jesús pia xantha tatsi. Barapo diez poyobe peperu sawichimonae, ichitha barapomonae Jesús taju wetaeumendenatsi. ¹³Barapomonae wawai, jeje:

—Jesús, pon Patatanecuidubim, pana neyabara najuntu coyene xeinare jinya pata tana neyawenaenexam, jei barapo peperu sawichimonae.

¹⁴Poxonae Jesús tane barapomonae, Jesús barai, jeje:

—Paponare sacerdotemonaetha painya nepaca cataenexa, jei Jesús.

Poxonae cataunxuae namtotha enapona, bapoxonae barapomonae peru jume tsurucupa xua peperu sawiwatsi barapomonae. ¹⁵Barapo diez poyobe jiwana caein, poxonae bapon taeba xua axaibi tsurucupa, bapoxonae Jesús beya pona, xua caibeya pona, yawa jume daunweya Nacom wuna jaintatsi. ¹⁶Barapon pentabocototha uncua Jesús peitabaratha tatsi. Yawa irabe taeuncuareca xua Jesús pejacobinexatsi. Barapo pebin apara pon seicaya Samaria nacupain.

¹⁷Nexata Jesús namchi, jeje:

—¿Diez poyobe itara axaibi exanan? ¿Incane dapo nueve poyobe jane?

¹⁸Bapon apara penanapaincha jinompaewi jiwapanin. Yawa cou compa caiberena pia wuna jainchichi Nacom, jei Jesús.

¹⁹Nexata Jesús equeicha pebin baraichi, jeje:

—Nontaponde pondeno, bayatha axaibim tana neyabara jume cowuntsixaemxae xua bara tana neitacupaewa xua axaibi tacaexanaewatsi, jei Jesús.

**Meje yabara poxonae Jesús yabara paeba po coyene
xua poxonae Nacom itorobiya ewatsina jwi
(Mt 24.23-28, 36-41)**

²⁰Fariseomonae Jesús yainyabatsi namchi, jeje:

—¿Eta poxonae Nacom itorobina pon peitapetsinxae pata tanecapanenebiwa exanaenexa, xuano xua itorobiya pata taneewatsiwa? jeichichi barapomonae Jesús.

Jesús jume nota, jeye:

—Poxonae Nacom itorobiya ewatsina jiwi, barapo coyene jiwi jopa itacupaetsi xua petaewa baxua. ²¹Daxota jiwi jopa jei tsane: ‘Baraxote bayatha patope’, jopa jei tsane. Matautano jopa jei tsane ‘Xoteiche bayatha patope’, jopa jei tsane. Tsipei apara po coyene xua Nacom itorobiya ewatsina jiwi barapo coyene patopa jiwitha. Daxota Nacom jüntu coyene itorobiya ewatsina jiwi pomonae pejume cowuntsiwixaetsi Nacom, jei Jesús.

²²Nexata Jesús barai pijimonae, jeye:

—Matacabin othopaena po matacabintha poxonae paichichipame xua painya tana netaewam xua ponxaein Nacom Tananeitapetsin xuano xua muxuna bepataebenaename caentacabi xua barapo matacabin jiwana. Dapo jumetha jopa painya nepaca itacupaewa tsane xua painya tana netaewam tsane xuano xua caentacabi xua barapo matacabin jiwana. ²³Ichamonae paca jei tsane: ‘Baraxote bayatha patopa bapon’, paca jei tsane. Ichacuitha paca jei tsane: ‘Baraxoteicha bayatha patopa bapon’, paca jei tsane, ichitha jopa paponaeinde bara beya yawa jopa pajume cowuntsinde. ²⁴Ichamuxu ichi xua jemeicha yacoicha uncueica, xua coicha nayotaxuba itabocototha, barichi tsane po matacabitha poxonae patopeicaein ponxaein Nacom Tananeitapetsin. ²⁵Ichitha copiya nantawenona xua neperaxa jubina ichamonae. Yawa neitawetsinano pomonae xua anoxuae jinompa. ²⁶Ichamatha ichi poxonae Noé caena bayatha popona jiwi jopa tsaqueinaeyo xua Nacom pin awubo exanaena methaunxuae. Saya barompaya icha jüntu cuitha jinompa daxota jiwi werapa. Barichi jüta ichi tsane poxonae patopeicaein barapo cae pin nacuathe xua ponxaein Nacom Tananeitapetsin. Poxonae patopeicaein jiwi jopa tsaqueinae tsane xua Nacom werapa exanaena barapo jiwi pomonae jopa pejume cowuntsiyoxaetsi. ²⁷Pomonae jinompa poxonae Noé popona, barapomonae jüntema nabaneiba, yawa apeiba, yawa apeiba yawa jiwitha jjinapona yawa pexantixi jitha dodoubapona, beya yantacabi othopa poxonae po matacabitha Noé pin jera naetha joniya. Bapoxonae pin ema mu jopa. Daxita Noé wepu bunothopatsi pomonae jinompa poxonae Noé popona. ²⁸Barichiru jiwi pocotsiwa ichamonae exana poxonae ichun pebin popona pon pewun Lot. Barapomonae nabaneiba, yawa apeiba, yawa comaqueiba, yawa caenaeteiba, yawa pexaewa ubeiba, yawa bomuxun acabeiba. ²⁹Poxonae bapon Lot Sodoma tomara wenaetabiya, barapoxonae iso itere mu, mu othopeica tomaratha, yawa pocotsiwa be ibo puru baxua itaboco weothopeicano xua bichocono atou. Daxita Sodoma tomarapiwi werapa. ³⁰Ichamatha Sodoma tomaratha

ichi xua jemeicha iso itere m̄, m̄ othopeica yawa xua jemeicha ibo p̄r̄r̄ itaboco weothopeica, bara j̄ta ichin tsane jemeicha patopeicaein ponxaein Nacom Tananeitapetsin poxonae jiwi tsita naitutsin.

³¹“Barapo matacabitha icha ich̄n bo matatupatha uncua, barapon jopa bewa botha joniya tsane xua penotsiwa tsane pocotsiwa tabobeinchi bom̄x̄ tututha. Ir̄ pon pabitha popona jopa bewa caibeya ponae tsane botha, saya jame nainya benaetsiricuaena. ³²Pacui yabara nanta xeinare Lot piseuri tatsi xua t̄pa poxonae jopa nainya naetsiricuaeyo piawan caibe pesiwa necoyaexae. ³³Pon naantobeya nata exana pocotsiwa bapon ichichipa, bapon jopa xeinaeyo peaj̄nt̄yapus̄wa po peaj̄nt̄yapus̄wa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan bapon xeinaena peaj̄nt̄yapus̄wa, po peaj̄nt̄yapus̄wa ataya tsiteca xua Nacom pia nacua beicha.

³⁴“Paca tsipaebatsi po mataqueitha patopaein, ainya pebinbe ponbe xua nanta j̄paya maitecabe, caein matatsunpin pichina, pon pejume cow̄ntsixae Nacom. Ich̄n saya cuenta ponaeinchi jopa pejume cow̄ntsiyoxae Nacom. ³⁵Ir̄r̄ ainya yab̄yobe nacuara yacatoyorobauyaenabe, ichowa matatsunpin pichina pejume cow̄ntsixae Nacom. Ichowa saya cuenta ponaeinchi jopa pejume cow̄ntsixae Nacom. ³⁶Ir̄r̄ ainya pebinbe nacuara nacuitauyaenabe pabitha, ich̄n matatsunpin pichina, ich̄n saya cuenta ponaeinchi”, jei Jesús.

³⁷Poxonae baxua Jesús pijimonae jume tainchi, Jesús yainyabatsi jeichichi, jeye:

—Pata Tanecanamataxeinaem, ¿exota metha baxua exanaena? jeichichi pijimonae.

Jesús pijimonae jume nota pecayabara j̄ta pepaebi diwesiyotha, jeye:

—Quequeremonae ba nacaetuta ichaxota baurin boca. Bara j̄ta paichim tsane paxam pomonae tana nejume cow̄ntsi jiwi pam pana new̄nae ewatsiname po mataqueitha patopeicaein, barapo mataqueitha panacaetutsiname, jei Jesús.

Meje yabara poxonae Jesús paeba pecayabara j̄ta pepaebi diwesiyo xua yab̄yo yabara powa pecuenta t̄paewayotsi piseuri xua ir̄ pon jiwi peyabara paebin xua penatsicuentisiwa xua abe peexanaexae

18 ¹Jesús pijimonae tsipaeba pecayabara j̄ta pepaebi diwesiyo xua pecuidubinexa, jeye: “Paxam daxita matacabi bewa paw̄queibim Nacom. Painya xoba paaj̄nt̄coyenefaetabim tsaibim poxonae paw̄queibame”, jei Jesús. ²Equeicha Jesús pijimonae barai, jeye: “Matha ir̄r̄ tomaratha popona pon jiwi peyabara paebin xua penatsicuentisiwa xua abe peexanaexae. Bapon jopa Nacom cunuwichi. Yawa bapon jopa beta yabara nanta xeinaeyo jiwitha xua peyawenaenexa. ³Barapo tomaratha ir̄r̄ popona petsiriwa, powa pecuenta t̄paewayotsi

piseuri. Barapowa siwa poneiba pontha pon jiwi peyabara paebin xua penatsicuentisiwa xua abe peexanaexae. Barapowa jei tsaibi bapontha: ‘Neyawende, ichun inta abe exana’, jei tsaibi. ⁴Pon jiwi peyabara paebin xua penatsicuentisiwa xua abe peexanaexae bapon ainya matakabin juntucuru jopa beexaneibiyo pocotsiwa barapowa wuqueiba. Ichitha bapon matapainya nanta xeina. Najei: ‘Xan apra jopa Nacom cunuwinyo. Matauta jopa beta tayabara nanta xeineibin jiwi xua tayawenaenexa. ⁵Ichitha barapo pecuenta tupaewayotsi piseuri matowa nefayacota daxota neamuxufaetabi exana. Metha moya barapowa yawenaenin, xua equeicha barapowa jopa penesiwa ponaenexa, tsipei bichocono amuxufaetabin’, najei pon jiwi peyabara paebin xua penatsicuentisiwa xua abe peexanaexae”, jei Jesús.

⁶Jesús pon Pecanamataxeinaein jiwi equeicha namchi, jeye: “Baxua apra pocotsiwa paeba pon jiwi peyabara paebin xua penatsicuentisiwa xua abe peexanaexae xuano pon jopa beta yabara nanta xeinaeyo jiwitha xua peyawenaenexa. Pajume naitaeware pocotsiwa bapon paeba. ⁷¿Eta xua metha pananta xeiname? ¿Metha bara Nacom came bayatha tsaibi poxonae jiwi yaweneibatsi pomonae xua pewuqueibixaetsi? ¡Jume, apra! Nacom nainya jiwi yaweneiba poxonae barapo jiwi abe exaneibatsi ichamonae, beyacaincha xua barapowa yawenatsi. Jame yatsicaewa Nacom yaweneiba pomonaetha pomonae peitapetsixae pewuqueibixaetsi merawitha yawa mataqueithano. ⁸Paca tsipaebatsi xua Nacom jopa bayatha tsaibiyo xua peyaweneibinexa pomonae nejume cowunta. Xan ponxaein Nacom Tananeitapetsin poxonae patopeicaein, ¿metha bara pin bicheito taeyopeicaein jampa, pomonae xua xanepanaya beta tana nejume cowuntsiya jinompaewi pomonae Nacom pewuqueibiwichi?” jei Jesús pijimonaetha.

Meje yabara poxonae Jesús paeba pecayabara juta pepaebi diwesiyo yabara xua fariseomonaen iru pon paratixi matoma penoteibin

⁹Jesús icha pecayabara juta pepaebi diwesiyo tsipaeba pomonaetha pomonae jiwi peaebiwi pomonae xua nayabara nanta xeina xua pinae beta jume cowunta xua pinae ichamonae jopa daichiyo. ¹⁰Jesús namchi, jeye: “Irun ainya pebinbe Nacom pin pia bo beya ponabe, xua baxotiya pewucaenexabe Nacom. Ichun fariseomonaepin, ichun bapon jiwana pomonae paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchi nexa. ¹¹Fariseomonaepin nantacotuncua yawa penthutotha wuca Nacomtha. Poxonae tsipaeba Nacom, jeye: ‘Nacom meisa xam nejuntu coyene xanepanaein. Juntu coyene weiweinan xua tana neyawenaewam tsipei xan jopa be ichamonaeyo pomonae xua jiwi pecaibiwi, yawa xua peabewi, xuano xua penasi cui matakaetsiwi yabuxitha. Matautano xan

jopa dapomonae jiwananyo pomonae xua paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchi nexa. ¹²Xan cayabara nainbotatsi ainya cuiyobe xua cae semanatha, beta tacawuqueibinexatsi. Matautano cae paratixi jiwana wetsabeiban xam nexa poxonae diez po paratiximonaebe xeineiban. Yawano daxita xua xeinan baxuano jiwana tsaban xam nexa', jei fariseomonaepin. ¹³Ichitha pon paratixi pentoma noteibin auranaya taju beuncuiya. Saya irabe necoreca yawa jopa athabe necoichaeyo. Saya u penantanuweya penanthuthu jayabi abe peexanaeinxae. Bapon Nacom wuca, jeye: 'Jaibo, Nacom neyabara najuntu coyene cui xeinare xua tana neyawenaewam tsane bequein bara taajuntucoyenyapubein', jei pon paratixi matoma penoteibin. ¹⁴Barapon pon paratixi penoteibin poxonae najume weta xua wuca Nacom, nawiya pia bo beya. Paca tsipaebatsi xua barapon Nacom tsitatsi xua jopa xeinaeyo xua penatsicuentisiwa xua abe peexanaexae. Ichitha fariseomonaepin jopa daichichi tsipei bapon awiya peajuntucoyenebein. Pon xua pia coutha peainya cui jiton naexana pejuntu coyenetha, Nacom exanaena xua bapon pecui pawi jiton naexanaena. Ichitha pon xua pepawi naexana pejuntu coyenetha, Nacom exanaena xua bapon peainya cui jiton naexanaena", jei Jesús.

Meje yabara poxonae Jesús jeye pexuitha:

"Barabu Nacom beta paca yawenaena", jei

(Mt 19.13-15; Mr 10.13-16)

¹⁵Nexata jiwi Jesús tacaponatsi pexui, xua Jesús pejayabinexa pecobetha yawa xua Nacomtha petawucaenexa barapo pexui xua pejeinexa: "Barabu Nacom beta paca yawenaena", pejeinexa. Ichitha Jesús pijimonae tatsi poxonae baxua tane, tamropata notarucpa xua barapomonae cui matawentatsi pomonae pexui carendena tsaibi.

¹⁶Ichitha Jesús waba pexui. Jesús pijimonae barai:

—Bara pacopabare pexui xua tana itata patsinexa. Jopa pexui paitawetsinde, tsipei Nacom pia peitorobi nacua tatsi saya meisa barapomonae nexa pomonae pejuntu coyene xanepanaewi icha pexui ichi. Pexui pia cui xua tayapu xanepanatsi xua pia juntu coyeneintha jume cowunta Nacom. ¹⁷Xaniyan paca tsipaebatsi. Pon jopa yabara jume cowuntsiyo xua icha be jopa pexui ichiyo xua ba pexui tayapu xanepanatsi xua jume cowunta, bapon bapana jopa naexanae tsane Nacom pijimonae tatsi pomonae Nacom itorobiya ewata, jei Jesús.

Meje yabara poxonae pewowin pon copei pexeinaein Jesús tsipaebatsi

(Mt 19.16-30; Mr 10.17-31)

¹⁸Caenin pon pentacaponaejiwanapin bapon Jesús yainyabatsi, jeichichi:

—Ja Tanecuudubim, maisa nejtntu coyene wunaem. ¿Eta xua copiya matha exanocuaein xua ajntuyarusuya tapoponaewa tsane xua ataya tsane? jei.

¹⁹Jesús jume epa pita, jeye:

—¿Eta xua nebaram: ‘Nejtntu coyene xanepanaem’, jam? Apra ichun dapon aibi pon pejtntu coyene xanepanaein. Jame meisa apra bapon Nacom compa pejtntu coyene xanepanaein. ²⁰Xam yaputaneme po coyene Moisés pia peitorobi coyenewatha itoroba xua jeye: ‘Jopa ichowa pichinde ichun piowa tatsi, jopa ichun bexubinde, jopa caibinde ichun piawan tatsi, jopa naerabiya cayabara pæbinde pocotsiwa ichamonae exana. Axatha jume baru cui itura jinare. Matautano enatha jume baru cui itura jinare’, jei Moisés, jei Jesús.

²¹Pon pentacaponaein jume epa pita, jeye:

—Daxita caena bayatha barapo coyenein exaneiban, poxonae pexuyothan tamropata pitaban, beya anoxuae yacuiya pinyon, jei.

²²Poxonae Jesús baxua jume tane, Jesús barai, jeye:

—Cataunxae icha cui coyene cata seica xua pocotsiwa neexanaewam tsane. Icha ichichipame xua jopa necata acoibiyonexa tsane xua pocotsiwa xanepanaeya neexanaewa, matha daxita caenaere pocotsiwa xeiname, yawa catsibare pomonaetha pomonae peacopeibi jiji. Bapoxonae jame moya anetha, nepuna ponde. Bequein bara bapoxonae acopeibim tsane, daichitha Nacom cacatsina peitaboco beicha, pocotsiwa Nacom necajuntana botsiwa pocotsiwa bichocono wunaem, jei Jesús.

²³Poxonae barapo pebin jume taeba, bichocono jntu wecoyeyi, tsipei bichocono copei pexeinaein. ²⁴Poxonae Jesús tane xua barapon jntu coyene wecoyeyi, Jesús barai, jeye:

—iMaisa bichocono ayapubecai xua copei pexeinaewi naexana Nacom pijimonae tatsi jiwana pomonae itorobiya canamataxeina! Tsipei barapomonae bichocono antasiwayatane barapo pia copei, beyacaincha xua Nacom antobetsi. ²⁵Nama bichocono acuiruyapube xua duwein pon pewun camello xua bapon pejoniyaewa acuicheto peetabu wan iya. Ichitha nama yatsicaewa pon bichocono copei pexeinaein taacuiruyapubetsi xua naexana Nacom pijimonae tatsi jiwana pomonae itorobiya canamataxeina beyacaincha xua poxonae acuiruyapube xua poxonae camello acuicheto peetabu wan iya pejoniyaewa, jei Jesús.

²⁶Pomonae xua baxua jume taerucpa, barapomonae Jesús yainyabatsi, jeye:

—Bapoxonae jintam metha nexata itacupatsi xua penacapanepaewa pia coutha? jei barapomonae.

²⁷Jesús jume nota, jeye:

—Pebiwu ba jopa itacupaetsi xua baxua exana, saya jame meisa Nacom compa itacupatsi xua jiji napaeba cana exanatsi. Tsipei daxua ajibi pocotsiwa Nacom taacuiruyapubetsi, jei Jesús.

²⁸Pedro barai, Jesús baraichi:

—Tapata Tanecanamataxeinaem, paxan daxita pacuenta ponan pocotsiwa paxeinan pata paca puna ponaewa tsainchi, jei Pedro.

²⁹Jesús jume nota, jeye:

—Bara xainyeya paca tsipaebatsi. Nacom beta cana exanaena daxita pomonae peyabara cueicueijeixae po diwesi xua Nacom waba jiwi petanaexanaenexatsi pijimonae tatsi pomonae itorobiya peewatsixae. Nacom beta cana exanaena barapomonae pia bon pecuenta ponaexae, yawa piseuri pecuenta ponaexae. Matautano beta cana exanaena pomonae peweichowi pecuenta ponaexae. Matautano beta cana exanaena pomonae pamchowi pecuenta ponaexae. Matautano beta cana exanaena pomonae paxei jiwi pecuenta ponaexae, matautano peniwi pecuenta ponaexae. Matautano beta cana exanaena pomonae pia pexui pecuenta ponaexae. ³⁰Barapomonae barapo coyenein exana taneantobe jiwixae, daxota daxita barapomonaetha Nacom jopa juniya catsi tsane barapo cae pin nacuathe. Matautano barapomonaetha Nacom catsina pia peitorobi nacuatheicha peajuntucoyeneyapusuwa po peajuntucoyeneyapusuwa ataya tsiteca, jei Jesús.

**Meje yabara poxonae Jesús nayabara paeba
acoibi po coyenebetha xua poxonae tupaena
(Mt 20.17-19; Mr 10.32-34)**

³¹Bapoxonae Jesús pijimonae compa waba aisowa beya xua pomonae doce poyobe tatsi. Jesús barai barapomonae, jeye: “Anoxuae ponaeinchi Jerusalén tomara beya. Baraxotiya tana nayabara jume cui wetsinexa bara nama, po coyene Nacom pia peitorobi jume pepaebiwu newuna tsiwanaya yabara tina xua xan ponxaein Nacom Tananeitapetsin. ³²Yawa necaenaetsina pomonaetha pomonae penanapaincha jinompaewi, xua icha nacua werena peponaewi xua barapomonae tanecui caponaenexa. Matautano abe neyabara paebina. Yawa neyabara naone subabina. ³³Yawa necuainchina, barapomonae nebexubina. Daichitha poxonae acoibi po matabibeyu yapu caewina equeicha asu neexanaena petupae cuiru coyene weya”, jei Jesús.

³⁴Ichitha Jesús pijimonae tatsi jopa yaputaeyo baxua xua pocotsiwa Jesús pijimonae tsipaeba. Barapomonae jopa jume ita cui cupaetsi poxoru Jesús barompaya nabaru jume yabara canamchi, baxua barapomonae taayapubetsi bichocono.

**Meje yabara poxonae Jesús Jericó tomaratha
axaibi exana pon peitata nacutsin
(Mt 20.29-34; Mr 10.46-52)**

³⁵Poxonae Jesús itiya pona Jericó tomara, pon peitata nacutsin namtotha eca, yawa jiwi wuqueibeca paratixi. ³⁶Poxonae bapon ponxae peitata

nacutsin jume tane xua juinya pin bicheito pona, bapoxonae bapon yainyaba, ichamonae yainyabatsi, jeye: “¿Eta xua metha juinya pin bicheito pona?” jei pon peitata nacutsin. ³⁷Bapon ponxae peitata nacutsin jume notatsi, jeye: “Apara Jesús, Nazaret tomarapin xote imoxoyo patope”, jei.

³⁸Nexata bapon pon peitata nacutsin jume daunweya wawai, jeye:

—Jesús, David pia pemomoxi susato jiwanapim, ponxae Nacom necaitapetsim neyabara najuntũ coyene xeinare jinya tana neyawenaenexam, jei pon peita nacutsin.

³⁹Pomonae xua pin bicheito matacaenapoinchi, barapomonae pon peitata nacutsin jume matawentatsi xua moya peecaenexa. Ichitha bapon equeicha jume daunweya wawai, jeye:

—Jesús, David pia pemomoxi susato jiwanapim ponxae Nacom Necaitapetsim neyabara najuntũ coyene xeinare jinya tana neyawenaenexam, jei pon peitata nacutsin.

⁴⁰Nexata Jesús naruntaba. Jesús namchi, jeye:

—Painta maxũ xawena, jei.

Poxonae pon peitata nacutsin imoxoyo patopa Jesustha, Jesús yainyaba, barai, jeye:

⁴¹—¿Eta xua jinya tacata exanaetsi? jei.

Pon peitata nacutsin jume nota, jeye:

—Jesús Tananecanamataxeinaem, benecotsin cuinaya, jei.

⁴²Jesús jume nota, barai, jeye:

—Moya necore antha. Axaibi caexanatsi tana neyabara jume cowũntsixaemxae xua bara tana neitacupaewa xua tacayawenaewatsi, jei.

⁴³Caena nainya bapon necotaxuba. Yawa Jesús puna poinchi.

Matautano Nacom wũnae jaintatsi. Poxonae pin bicheito baxua cui tane, irũrũ daxita barapo bicheito Nacom wũnae jaintatsi.

Meje yabara poxonae pebin pon pewũn Zaqueo Jesús jume cowũntatsi

19 ¹Jesús Jericó tomaratha patopa. Bapoxonae bapon barapo tomara xenta iya. ²Baxota Jericó tomaratha pebin popona, pon copei bichocono pexeinaein. Bapon pewũn Zaqueo. Bapon pon pecanamataxeinaein pomonae paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchi nexa. ³Barapon Zaqueo bequein ichichipa xua Jesús peyaitaewatsi, ichitha Jesús jopa taetsi tsipei pin bicheito, matautano poxoru Zaqueo xataxatequeca. ⁴Nexata Zaqueo nanta cacuinaepoinya, peitiya ecoinyaenexa tsane naetha, po nae imoxoyo namtotha uncua ichaxota Jesús ponaena, xua Jesús barapo naetheicha xaniwaicha peyaitaenexatsi. ⁵Jesús barapo nae cacuita ecapona, bara asiya necoicha. Poxonae Zaqueo naetha tayeichatsi, Jesús namchi, jeye:

—Zaqueo, nainya ecoinca tha jinya botha ecaetsi anoxuae, jei Jesús.

⁶Bapoxonae Zaqueo nainya dunatabica. Matautano Jesús matenta weiweinaya wabatsi pia botha. ⁷Poxonae pin bicheito baxua tane, Jesús abe yabara paebatsi, jeye:

—Maisa Jesús bewa jopa ponae barapo botha, tsipei bapon abe peexanae cuiru coyene peexanaein, jei barapo bicheito.

⁸Nexata Zaqueo nantacotuncua pia botha, yawa jeye Jesustha:

—Taema Jesús Tanecanamataxeinaem, tha daxita jiwana wetsabichi pocotsiwa xeinan, tacatsibinexa tsane pomonaetha pomonae peacopebiwi. Matautano pomonae xua naerabiya wɔcɔn cae paratixi equeicha caewa tha catsibichi cuatro po paratixibe, jei Zaqueo.

⁹Jesús jume nota, jeye:

—Anoxuae Nacom cana exana xua barapomonae pecapanenebiyae jiwichi, pomonae barapo botha peenaewi. Zaqueo, xam Abraham pia pemomoxi susatopiwi jiwanam. ¹⁰Daxota xan ponxaein Nacom Tananeitapetsin patopan tawenaweneinexa tsane pomonae abe peexanae cuiru coyene peexanaewi pomonae icha xam ichim, xua tacapanenebiyaenexa tsane barapomonae, jei Jesús.

**Meje yabara poxonae Jesús paeba pecayabara juta
pepaebi diwesiyo xua diez po paratixibe yabara
(Mt 25.14-30)**

¹¹Barapomonae jume tayena xua Jesús paeba barapo jiwitha poxonae Zaqueo yabara paebatsi. Daxota Jesús cuiduba barapo jiwi pecayabara juta pepaebi diwesiyotha, tsipei barapomonae nanta xeina xua Jesús pona Jerusalén tomara beya xua itara mexeya barapomonae itorobiya pia pepa peewatsinchi tatsi naexanaenawejei.

¹²Bapoxonae Jesús jeye: “Matha irurɔ pebin popona. Barapo pebin jiwapanin pomonae peainya cui jiwi pomonae barompaya piamonae matabɔxɔmonae. Barapo pebin taju pona icha nacuatha xua barapon icha nacuatha peexanaenexa tsainchi pocotsin be jiwi itorobiya pia pepa peewatsinchi, xua itorobiya peewatsinexa piamonae. Barapoxonae caibe nawiyaena pia nacuatha. ¹³Poxonae cataunxuae jopa taju ponaeyo matha waba diez poyobe pebiwi, xua petanacuichinexatsi. Daxita barapomonaetha barompaya catsina be cae paratixi xua pocotsiwa ainya matoma. Barapo pebin namchi pomonaetha pomonae pia petanacuichiwichi, jeye: ‘Barapo paratixitha pacomocare, equeicha pacaenaere xuya, painya xuya nawita nexeinaponaenexa paratixi. Payacobe cui othopare poxonae beya patopaein’, jei barapo pebin. ¹⁴Ichitha bapon casebatsi piamonae, pomonae jinompa pia nacuatha tatsi. Pomonae bapon casebatsi, barapomonae itoroba ichamonae xua pecoyo wepetayiyaenexatsi poxonae bapon penta caponaein naexanopiya ichaxota pon jiwi itorobiya pia pepa peewatsinchi. Xua barapo penacajume caitorobiwichi pejeinexa:

‘Ponxaem jiwi itorobiya pia pepa neewatsin, taema, apara bapon piamonae aichaxaibichi xua peexanaewatsi pon jiwi itorobiya pia pepa peewatsinchi’, jei penacajume caitorobiwichi, xua saya tapaeba.

¹⁵“Daichitha barapon cana exanatsi, pon jiwi itorobiya pia pepa peewatsinchi, xua ichun cana exana pon iru jiwi itorobiya pia pepa peewatsinchi, bapoxonae equeicha bapon caibe nawiya pia nacua beya. Poxonae bapon pia nacuatha patopa bapon waba pia petanacuichiwichi pomonaetha pomonae catsiba paratixi. Waba peyaputaenexa icha barapomonae metha comoca yawa caenaeta icha be pocotsi coyeneya bayatha bapon itoroba. ¹⁶Pon copiya patopa bapon namchi: ‘Tanecanamataxeinaem, po paratixi necatame, barapo paratixitha comocan, xuya equeicha caenaetan, equeicha diez po paratixibe matoma xeineiban’, jei pon copiya patopa. ¹⁷Pon pecanamataxeinaein jume nota, jeye: ‘Maisa xam beta exaname pon inta nenacuichim. Yaitama beta eexanaponame xua peyauyo caitorobatsi daxota pentacaponaein caexanatsi xua necanamataxeinaewa tsane diez po tomariyobepiwi’, jei. ¹⁸Iru icha petanacuichinchi patopa. Bapon jeye: ‘Tanecanamataxeinaem, po paratixi necatame, barapo paratixitha comocan, equeicha caenaetan, equeicha matoma xeineiban cinco po paratixibe’, jei. ¹⁹Pon pecanamataxeinaein jume nota. Bapontha jeye: ‘Xam pentacaponaein caexanaeinchi xua necanamataxeinaenexa cinco po tomariyobepiwi’, jei.

²⁰“Iru icha pia petanacuichinchi patopa, bapon jeye: ‘Tanecanamataxeinaem, taema xote xeinanje jinya paratiyo, cata mata quiyontabatsi painyaweratha. ²¹Yaitama cacui cunuwatsi, tsipei be barapocotsim pon jopa jiwi juniya itorobeibim. Matautano jiwi cobe itorobeibame xua noteibina pocotsiwa jopa jinyawiyo. Matautano pexaewa xua naweta noteibame ichaxota jopa ubim’, jei. ²²Nexata pon jiwi itorobiya pia pepa peewatsinchi namchi: ‘Bepa maisa dapon abem. Apara xam jinya coutha nanatsicuentisi exaname abe nepaebixae. Xam yaputaneme xua xan pon jopa jiwi juniya taitorobeibin, xuano xua pexaewa naweta tanoteibiwa xua ichaxota jopa tacoya ubeibinyo, matautano xua ichamonae cobe itorobeiban xua noteiba pocotsiwa jopa tawiyo. ²³Tsipei catsawiya neyabara nanta xeiname xua bichocono daunweya itoroban daxota bayatha inta bewa barapo paratiyo banco botha botsipame xua equeicha poxonae patopan, icha paratiyo equeicha matoma xeinaetsipan xua equeicha inta pemataropeichabotsixae tsipae poxonae ichamonae nacowaeta barapo paratiyo’, jei. ²⁴Pon jiwi itorobiya pia pepa peewatsinchi barai, pomonae xua ena baxota baraichi: ‘Barapon pacobe wepire barapo paratiyo, nexata barapo paratiyo pacare pon xua equeicha diez po paratixibe matoma exanaeya xeina’, jei pon jiwi itorobiya pia pepa peewatsinchi. ²⁵Pomonae ena, barapomonae jume epa nota, jeye: ‘Pon jiwi itorobiya pepa neewatsin, equeicha icha

paratiyo jopa catsinde bapontha. Bayatha apara diez po paratixibe xeina', jei barapomonaē. ²⁶Pon jiwi itorobiya pia pepa peewatsinchi barapomonaē jume notatsi, jeye: 'Paca tsipaebatsi, pon ba be conotha Nacom yabara yaputainchi Nacom bapontha cana exanaena xua ichawa peyabara yaputaewa tsane beya poxonaē bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom peyabara yaputaewatsi, Nacom wepichina po coyene bapon yaputane xua beya daxota Nacom jopa pejume cowuntsiwa tsainchi. ²⁷Yabara paca tsipaebatsi pomonaē taneaitafaetabi jiwi. Barapomonaē neaichaxaibi xua jiwi itorobiya pepa taewatsin tanecana exanaewa. Barapomonaē pacarenenande ichaxota ecan. Barapomonaē pajutebare ichaxota ecan', jei pon jiwi itorobiya pia pepa peewatsinchi", jei Jesús.

Meje yabara poxonaē Jesús Jerusalén tomaratha patopa
(*Mt 21.1-11; Mr 11.1-11; Jn 12.12-19*)

²⁸Poxonaē Jesús baxua najume weta, bapoxonaē pona Jerusalén tomara beya. ²⁹Jesús itiya patopa Betfagé tomara, Betania tomarano xua saya patopa demxuwatha po demxuwa pewun Olivowa tsipei baxota umena olivo naein. Bapoxonaē nacueyatabe poyobe itoroba poyobe xua pijimonaexae tatsi jiwanaē pomonaē xua doce poyobe. ³⁰Jesús barai baponbe, jeye:

—Paponarebe po tomara painya itabaraya equiya. Poxonaē papatopaenamebe barapo tomaratha, pacaxinaenamebe burro pon penun pon pequetanotsin, pon jopa ichamonaē tsijuma enaeyo. Payama isanaxorebe bepayama carenandebe. ³¹Icha ichun paca barai: '¿Eta pocotsiwa payama isanaxubamebe burro?' icha paca jei bapon, nexata pajandebe: 'Pon Wanacanamataxeinaein bepa pata yama cayiyaeinjei, tsipei pinae nantawenona', pajandebe, jei Jesús.

³²Poxonaē baponbe tomaratha patopabe, tanebe be pocotsi coyeneya bayatha Jesús namchi. ³³Poxonaē baponbe burro yama isacauyabe, baponbe yainyabatsibe pomonaē barapo burro pexeinaexae. Baponbe baraichibe:

—¿Eta pocotsiwa burro payama isacauyamebe? jeichichibe baponbe.

³⁴Baraponbe jume notabe barapomonaētha, jeye:

—Pon Pecanamataxeinaein jiwi bepa pinae patayama cayiyaein, tsipei pinae nantawenona, jeibe baponbe.

³⁵Baraponbe burro tayama cayabe, Jesús tayama cayatsi. Baraponbe burro paparuwa tsijuma jebicabe po paparuwan aitiyū xua baponbe pia paparuwan tatsi, bapoxonaē Jesús cuaretsicatsi. ³⁶Jesús burrotha ecapona. Jiwi paparuwan namtotha yerababa jejebabapoinya. Barapo paparuwan Jesús matatsun ecapona burrotha. Barapomonaē baxua exana tsipei Jesús matenta weyatainchi xua patopa. ³⁷Poxonaē Jesús

muxu perunadecae demxuwa wereca, po demxuwa pewɛn Olivowa, tsipei baxota umena olivo naein barapoxonae pomonae Jesús pejume cowantsiwichi, barapomonae jɛntɛ coyene weiweinaya jume daunweya wawai. Yawano Nacom wɛnae jaintatsi xua bayatha pexeinya petsita itutsi coyenewan petaexae xua Nacom exana. ³⁸Barapomonae jeye:

—iPai jayana! iMaisa Jesús pon jiwi itorobiya pia pepa peewatsinchi, maisa wɛnae, bapon patopa Nacom peitorobixae! iPomonae xua peitabocotha jinompa jɛntɛ coyene weiweina bichocono! iMaisa Nacom bichocono wɛnae jaintatsi pon athabeicha eca! jei Jesús pijimonae tatsi.

³⁹Nexata fariseo jiwanamonae, pomonae naenapona pin bicheitha, barapomonae Jesús baraichi:

—Pon jiwi Necuidubim, jinya jiwimonae baxua jume matawende: iMoya pande! jande, jei fariseo jiwanamonae.

⁴⁰Ichitha Jesús jume epa pita, jeye:

—Paca tsipaebatsi, icha barapomonae metha moya tsipae bara nexata iboton jume daunweya wawai tsipae, jei Jesús.

⁴¹Poxonae Jesús imoxoyo Jerusalén tomaratha patopa, poxonae tomara tane, Jesús jɛntɛ coyene wecoyei tsanareca, poxoru Jerusalén tomaramonae yabara wecoyeichi. ⁴²Jesús namchi, jeye: “iPai maisa bepayaputaename xua pocotsi jɛntɛ coyene jɛntema jinompa paca cana exana! Nama anoxuae baxua nantsiyata. Jopa paca itacɛpaeyo xua painya nexeiawa painya jɛntɛ coyenetha. ⁴³Meisa matabi pacata jopaena po matabi abe. Barapo matabitha painya nepaca caaitafaetabi jiwi paca yatomara yatoxoroto exanaxubina. Tsorobo paca yacaincha acabina. Yawa paca yacaincha umenaena daxita muxuneneintha. ⁴⁴Paxam Jerusalén tomarapiwi pam, yawano painya pexuino, ichamonae paca jutebina. Painya bon iratha paca yawa bebai tsane. Jopa cae iboto asiya uncuiyae tsane, omeicha othopeicaena. Tsipei paxam jopa Nacom payaitaem xua poxonae paca necasiwa ponaewa”, jei Jesús Jerusalén tomarapiwimonae yabara.

**Meje yabara poxonae Jesús aisowa benapuna torobabiya
pomona Nacom pin pia botha pecaenaetsiwi
(Mt 21.12-17; Mr 11.15-19; Jn 2.13-22)**

⁴⁵Jesús Nacom pin pia botha joniya. Baxota Jesús aisowa benapuna torobabiya pomonae caenaeta baxota. ⁴⁶Jesús barai barapomonae, jeye:

—Nacom Pejume Diwesitha jeye: ‘Tabo apara po botha xua jiwi tanetsipaebinxeta tsaihi tsane barapo botha’, jei Nacom Pejume Diwesitha. Ichitha paxam barapo bo be pecaibiwi pia muthɛ tutu pacana exaname, ichaxota pijunuwi nantsiyabeibathopa, tsipei baxota panacaetutame saya ɛ xua painya necaibinexam tsane paratixi pomonaetha pomonae xua pateiba xua Nacom petsipaebebinexatsi, jei Jesús.

⁴⁷Nacom pin pia botha daxita matacabi Jesús cuidubeiba. Ichitha sacerdotemonae pia pentacaponae, iru pomonae jiwi pecuidubiwi Moisés pia peitorobi coyene tatsi, iruru tomara pia pentacaponae daxita barapomonae Jesús yabara nanta xeinatsi nawita xua pebexubinexa tsainchi. ⁴⁸Ichitha jopa itacupaetsi barapomonae xua Jesús pebexubiwa tsainchi tsipei pin bicheito beta xanepanaya Jesús jume tayenatsi.

Meje yabara xua Jesús pia peitorobi coyenewa xaina

(Mt 21.23-27; Mr 11.27-33)

20 ¹Caentacabi Jesús Nacom pin pia botha joniya. Barapo botha Jesús cuiduba jiwi. Yawa Nacom pia pecapanenebiyae diwesi yabara cueicueijei. Bapoxonae iru sacerdotemonae pia pentacaponae tatsi pata. Iru pata pomonae jiwi pecuidubiwi xua Moisés pia peitorobi coyenewa tatsi. Iru pata pomonae penapatae jiwi. ²Daxita barapomonae Jesús baraichi, jeye:

—Incane pana tsipaebare, zeta po peitorobi coyenewatha cuidubame baxuan? zJintam cacata barapo peitorobi coyene? jei.

³Nexata Jesús jume nota, jeye:

—Xan iruru tha barichichi paca yainyabinchi pana nejume nore.

⁴zJintam Juan cui itorobatsi jane xua jiwi pebautisabinexa tsainchi? zMetha bara Nacom cui itoroba jampa? zMetha bara jiwi cui itoroba jampa? jei Jesús.

⁵Barapomonae caemonae yabara natsipaeba pocotsiwa Jesús pepaebiwa. Barapomonae jeye: “zEta xua metha jei tsainchi? Icha jei tsipaetsi xua Juan cui itorobatsi Nacom xua pebautisabiwa jiwi, metha naca jei tsipae: ‘zEta xua metha nexata jopa pajume cowantsim Juan?’ metha naca jei tsipae Jesús. ⁶Icha jei tsipaetsi Juan cui itorobatsi jiwi, metha apara jiwi naca jutebina ibotoxitha, tsipei daxita barapo jiwi nanta xaina xua Juan pon Nacom peitorobi jume pepaebin”, najei barapomonae. ⁷Barapomonae Jesús jume notatsi, jeye:

—Canta jopa payaputaeyino xua pon Juan cui itorobatsi xua jiwi pebautisabiwatsi, jei barapomonae.

⁸Nexata Jesús barai barapomonae, jeye:

—Nexata barichin tsane. Jopa yabara paca tsipaebi tsainchi, po peitorobi coyeneyatha exanan xua daxita taexanaewan, jei Jesús.

Meje yabara poxonae Jesús paeba pecayabara jata pepaebi diwesiyo pomonae xua abe exana, pomonae petayapucaenaewi uva pabi

(Mt 21.33-44; Mr 12.1-11)

⁹Nexata Jesús diwesi tsipaeba jiwitha po diwesi pecayabara jata pepaebi diwesiyo. Jesús jeye: “Matha iru pebin pin uva pabi xaina. Bapon

ũa po ũabo pewun uva cuei ũabo. Bapoxonae bapon itoroba pomonae pia uva pabi petayapucaenaewichi tsainchi, xua bapoxonae barapomonae pejiwanaxaenexa pocotsiwa penawetsiwa. Bapoxonae bapon icha nacua beya pona ainya wei nexa. ¹⁰Matacabi tsuxubi xua uva cuei naweta. Bapoxonae barapo mataqueitha pomonae pabi petayapucaenaewi jiwana itapeta nota xua penawetsiwa. Bapoxonae pon uva pabi pexeinaein, caein jiwana itoroba pomonae pia petanacuichiwichi jiwana, xua petawucaenexa tsainchi uva cuei pomonae beya pomonae pabi petayapucaenaewichi. Ichitha barapon pon najume caitorobatsi, bapon bũtsi. Bapon caibe cobesa iya. ¹¹Pon uva pabi pexeinaein bapon equeicha caein jiwana itoroba pomonae pia petanacuichiwichi jiwana. Bapon barichi bichocono bũtsi, caibe cobesa nawiya yawa jopa catichi. ¹²Pon uva pabi pexeinaein equeicha caein jiwana itoroba pomonae pia petanacuichiwichi jiwana. Barichi pomonae pabi petayapucaenaewi barapon bũtsi yawa wan exanatsi yawa pabi weya xotsi.

¹³“Pon uva pabi pexeinaein matapainya nanta xeina najei: ‘¿Eta xua metha exanaein? Metha taxanto itorobin pon bichocono antobein. Metha poxonae taxanto taeinchi, metha inta yabara barũ cui itura jinaeinchi’, najei. ¹⁴Dapo jumetha pomonae uva pabi petayapucaenaewi poxonae bapon taeinchi, barapo petayapucaenaewi uva pabi najei tsane: ‘Apara bapon paxa copiniwa pichina. Daxota bapon bũ bexotsi xua xainya xeinatsi barapo uva pabi’, najei barapomonae. ¹⁵Barapo pexanto tatsi uva pabi juma bemaxũ cayiyatsi. Baxotiya bexotsi”, jei Jesús.

Nexata Jesús barai barapomonae, pomonae jume tayenatsi Jesús, jeye: “Pon uva pabi pexeinaein, ¿eta be cana ichi tsane pomonaetha pomonae barapo uva pabi pia petayapucaenaewichi? ¹⁶Pon uva pabi pexeinaein patopaena pia uva pabitha, pomonae uva pabi peyapucaenaewi daxita barapomonae jutebinchi. Barapoxonae barapo uva pabi ichamonae xuya catinchi xua petayapucaenaenexa tsainchi barapo uva pabi”, jei Jesús.

Pomonae Jesús jume tayenatsi poxonae baxua jume tane xua Jesús paeba, barapomonae Jesús jume itawetatsi, jeye:

—iBara, jopa bepajume taeinyo baxua, tsipei xua paebame Nacom jopa copatsiyo pata xantha xua pata tanejutebinexa ichamonae! jei barapomonae.

¹⁷Ichitha Jesús tane, barapomonae tainchi. Jesús jeye:

—Incane pajume taema pocotsiwa Nacom Pejume Diwesitha neyabara caunuta poxonae iboto yabara paeba, jeye:

‘Pebiwi pomonae ibo bon peacabiwi,
barapo pebiwi xuba po iboto tabũ
caboca, po iboto peainya cui iboto.
Ichitha Nacom itapeta barapo iboto xua
petabũ cabocaenexa peainya cui ibotoxae’,

jei Nacom Pejume Diwesitha.

¹⁸Incane iboto yabara paca tsipaebinchi. Barapo ibototha poxonae ichauyo jopeica pepurwixi tsanaya. Matautano poxonae barapo iboto ichauyo matatsun jopeicatsi pebeno tsanaya. Icha barapo iboto ichi poxonae cana exana ichauxitha peainya cui ibotoxae, xan barapocotsi juta coyeneya barichin pomonaetha pomonae jopa tana nejume cowantsiwi. Pia jopa tana neyaputaexae barapomonae daxota peraxa exanaeinchi, jei Jesús.

¹⁹Sacerdotemonae pia pentacaponaeawi tatsi, iru pomonae jiwi pecuidubiwi xua Moisés pia peitorobi coyenewa tatsi, daxita barapomonae juntucuru Jesús teicatsi poxoru barapomonae yaputane xua yabara paebatsi xua Jesús paeba. Nexata Jesús jopa teicaetsi poxoru jiwi cunuwatsi.

**Meje yabara poxonae Jesús yabara cuiduba paratixi
matoma po paratixi jiwi bewa catsibina pontha
pon romanomonae itorobiya pia pepa peewatsinchi**
(Mt 22.15-22; Mr 12.13-17)

²⁰Barapomonae itoroba, ichamonae itorobatsi xua petataenexa tsainchi. Pomonae xua itorobatsi, barapomonae naexana itara mexeya pentu cui xanepanaewi. Barapomonae pona Jesús beya, xua Jesús naerabiya pecui jume yopichinexa tsainchi xua exana yawa xua paeba. Pia bapoxonae Jesús waetabichi yawa pia caponaetsi pontha pon Judea nacuapiwi peyanacua ewatsinchi. Bapon peajumeyapusu itorobiwa xeina, xua po peajumeyapusu itorobiwa cata pon romanomonae itorobiya pia pepa peewatsinchi. ²¹Daxota barapomonae Jesús yainyabatsi jeye:

—Pon jiwi Necuidubim. Bara payaputan xua bara jume xainyeya tsipaebame jiwi, matautano xua jiwi bara beta cuidubame xua pocotsiwa jiwi bewa exanaena pexeinaenexa tsane Nacomtha po juntu coyene pexanepanae juntu coyene. Matautano jopa jiwi cunuwim poxonae cuidubame poxonae bequein jiwi jopa ichichipaeyo baxua, tsipei xam daxita jiwi catsita najupa. ²²Incane yabara pana netsipaebare xuaje: ¿Metha bara Nacom pia peitorobi coyene naca itoroba xua waxainchi paratixi catsibinchi pon romanomonae itorobiya pia pepa peewatsinchi xua wanaca itorobixae bapon bequein bara pon penanapainchi poponaein? Icha jopa tsipae, ¿metha daxua abe tsipae? jeichichi Jesús barapomonae pomonae fariseomonae itoroba.

²³Ichitha Jesús yaputane xua piraichi baxua yainyabatsi.

²⁴Daxota jeye:

—Incane moya painta xawena paratiyo, tha taetsi. ¿Jintam pejumopere? ¿Yawano jintam wun ducua? jei Jesús.

Barapomonae jume nota, jeye:

—Apara romanomonaē itorobiya pia pepa peewatsinchi, jei barapomonaē.

²⁵Nexata Jesús barai barapomonaē, jeye:

—Bara nexata romanomonaē itorobiya pia pepa peewatsinchi pacare pocotsiwa xua bapon piawaxae. Matautano Nacom pacare xua baxua iru piawaxae tatsi, jei Jesús.

²⁶Barapomonaē jopa itacupaetsi xua Jesús pewaetabiwatsi daxita jiwi peitatha, tsipei Jesús beta jume nota barapomonaē. Barapomonaē yabara najuntu cui coyene cabenaeca pocotsiwa xua Jesús xanepanaya beta jume nota, daxota barapomonaē saya moya umena.

**Meje yabara poxonaē Jesús yabara yainyabatsi po coyene
xua equeicha asu pomonaē pewerapeibiwi
(Mt 22.23-33; Mr 12.18-27)**

²⁷Bapoxonaē saduceomonaē jiwana pata Jesús pia xantha tatsi xua Jesús piraichi petsipaebinxatsi. Saduceomonaē barompaya pia pecuidubi coyenewa xeina xua pinae pomonaē pewerapeibiwi equeicha jopa asu tsai biyo. Barapo pecuidubiwa jopa jupaeyo po pecuidubiwa Jesús pia pecuidubiwa tatsi xua pinae jiwi equeicha asu jinompaena poxonaē werapa. Daxota saduceomonaē Jesús siwa poinchi. Saduceomonaē Jesús baraichi:

²⁸—Pon jiwi Necuidubim. Moisés nacata tina, namchi: ‘Icha pebin piowa cuenta tupa, yawa jopa xeinaeyo pexui, xuyapin bewa pentapin pecoutha coseuri pichina xua bapoxonaē pentapin pecoutha pexeinaenexa tsane pexui’, jei Moisés. ²⁹Barichi, matha iru cae peweicho jiwi xua caepiwi nabaru jinompa siete poyobe. Matapin jitha eca. Bapon piowa cuenta naxuba. Pexui jopa xeinaeyo. ³⁰Pon cotacaya naexana xuya pentapin coseuri pita xua bapoxonaē pentapin pecoutha pexeinaenexa pexui. Bapon iru cuenta tupa, iru jopa xeinaeyo pexui. ³¹Bapoxonaē ichun xuyapin xuya barapowa pita xua pentapin coseuri pita. Bapon barichi iru cuenta tupa, iru pexui jopa xeinaeyo. Daxita barapo siete poyobe cuenta nanapentapona barapowa poxonaē bequein xuya pecoutha nonotaponeiba. Barapo siete poyobe, caein jiwana jopa pecoutha tapoponaetsi pexuyo. ³²Bapoxonaē matapainya iru barapowa tupa.

³³Xam, Jesús, ba paebame, ba jam: ‘Matacabi jopaena po matacabitha Nacom asu exanaena xua jiwi asu exanaeinchi muthu wetsina’, ba jam. Poxonaē barapo matacabi jopaena xua daxita jiwi asu jujuinaena, barapo matacabitha, ¿jintam metha barapowa xuya pichinchi, xua ichun pichina, xua barapo siete poyobe caein jiwana? Tsipei caena bayatha barapo siete poyobe caepiwi cuenta nanapentapona barapowa, jei saduceomonaē.

³⁴Nexata saduceomonaē, Jesús jume nota. Jesús jeye:

—Barapo nacuathe pebiwi yawa yabuxi, barapomonaē jitha eenapona. ³⁵Pomonaē xua Nacom itapeta waba, poxonaē barapomonaē

patsina Nacom pia nacuatha, barapomonae jopa equeicha jitha eenaponae tsane, yawa jopa pexantixi jitha cuarebaponae tsane. ³⁶Tsipei barapo nacuatheicha, barapomonae bexa jopa werapae tsane icha matatsunpiwi ichi xua jopa werapaeayo. Matauta barapomonae Nacom pia pexui, tsipei barapomonae equeicha asu barapo petupa coyene weya. ³⁷Caena bayatha Moisés yabara naca cuiduba xua pomonae pewerapeibiwi xua equeicha asu tsaibi tsane, po diwesitha naewa yabara tina po naewa taxuncua. Barapo diwesitha Nacom pon Pecanamataxeinaein jiwi, namchi: ‘Xan Abraham pia Nacomun tatsin, iru Isaac pia Nacomun tatsin, iru Jacob pia Nacomun tatsin’, jei Nacom. ³⁸Baxua Nacom paeba tsipei Abraham iru Isaac, iru Jacob pomonae bayatha pewerapaewi anoxuae equeicha caewa asu jinompa Nacom pia nacuatheicha tatsi. Pomonae pewerapaewi pomonae jopa caewa equeicha asu pejinompaewi, barapomonae jopa pia Nacom tatsi, pon itabocotha eca. Saya jame meisa pomonae bayatha pewerapaewi caewa equeicha asu pejinompaewi pomonae pejume cowuntsiwixaetsi Nacom, barapomonae jame pia Nacom tatsi, pon itabocotha eca, jei Jesús. ³⁹Nexata pomonae jiwi pecuidubiwi Moisés pia peitorobi coyene tatsi, barapomonae jiwanamonaes Jesús baraichi, jeye:

—Pon jiwi Necuidubim, maisa bara beta xanepanaya paebame, jei barapomonae.

⁴⁰Saduceomonae equeicha jopa Jesús yainyabichi xua equeicha beta pejume notsiwatsiyainwa.

**Meje yabara poxonae Jesús nayabara jei: “Mesías,
 ¿jintam pia pemomoxi susato jiwana-pin tatsira?” jei**
(Mt 22.41-46; Mr 12.35-37)

⁴¹Equeicha Jesús nayabara paeba pomonaetha pomonae jiwi pecuidubiwi Moisés pia peitorobi coyene tatsi. Jesús jeye:

—¿Eta pocotsiwa metha jiwi paeba xua pinae Mesías bapon David pia pemomoxi susato jiwana-pin tatsi? ⁴²⁻⁴³Tsipei David jei salmos penaxunaes weixi diwesintha:

‘Nacom pon Pecanamataxeinaein jiwi
 Tanecanamataxeinaein baraichi pon
 Mesías jeichichi:
 Tacoxa werena ecare, beya abu tsane poxonae
 necaaitafaetabi jiwi pia Pecanamataxeinaeinchi
 tatsi caexanaeinchi, jei Nacom’,
 jei David salmos penaxunaes weixi diwesintha.

⁴⁴Icha David yabara jei xua Mesías yabara jeichi: Bapon Mesías Tanecanamataxeinaein, jei, ¿eta xua metha tsipae xua Mesías apara David pia pemomoxi susato jiwana-pin tatsi? jei Jesús.

**Meje yabara poxonae Jesús muxuweta jiwi xua pomonae jiwi pecuidubiwi
Moisés pia peitorobi coyene tatsi barapomonae pecuiyainwa tatsi
(Mt 23.1-36; Mr 12.38-40; Lc 11.37-54)**

⁴⁵Pomonae xua umena daxita barapomonae Jesús jume taeumeinchi poxonae Jesús pijimonae tsipaeba. Jesús namchi, jeye: ⁴⁶“Dota pam, dota pomonae jiwi pecuidubiwi Moisés pia peitorobi coyene tatsi. Barapomonae pia pecuidubi coyenewan tatsi pecuiyainwa pande. Jopa paexanaeinde icha barapomonae ichi xua barapomonae bichocono ichichipa xua penama xatabiwa po paparuwan apipiya deca xua be pomonae peainya cui jiwi penaexanaewi naexana. Barapomonae bichocono ichichipa xua jiwi namtotha jacobebina xua barapomonae pejacobinexatsi xua jiwi pebarũ cui itura jineibinexa barapomonae xua barapomonae pebarũ cui itura jineibinexatsi. Barapomonae bichocono ichichipa xua nanta caeneiba judiomonae pia penacatutsi bontha tatsi ichaxota ba enathopeiba pomonae peainya cui jiwi penaexanaewi. Mataũta barapomonae bichocono ichichipa xua eneiba ichaxota ba eneiba pomonae peainya cui jiwimonae poxonae pexaewan tsinacatuteiba xua poxonae penabaneibinexa tsane. ⁴⁷Mataũtano barapomonae powaxi pecuenta werapaewaxichi piseurixi, barapowaxi cueranta enatsi pia bon. Barapomonae naemata jopa cuinaya najume copababeibiyo poxonae tsipaebai Nacom. Barapomonae bichocono peraxa jãbebinchi poxonae po mataqueitha Nacom yabara paebina jiwi xua pia penatsicuentisiwa xua abe petsita exanaexaetsi. Barapomonae bichocono atene tsane xua poxonae beyacaincha ichamonae atene exanaeinchi xua jopa pejume cowũntsixaetsi Nacom”, jei Jesús.

**Meje yabara poxonae Jesús yabara paeba xua petsiriwa
paratiyobe cata Nacomtha, powa pecuenta tũpaewatsi piseuri
(Mr 12.41-44)**

21 ¹Nacom pin pia botha Jesús tane xua baxota pomonae copei xeinaewi paratixi jeya Nacom nexa ichaxota jiwi jebeiba paratixi. ²Barichi Jesús tane xua irũ ainya tsica paratiyobe jeca baxota powa pecuenta tũpaewatsi piseuri, yawa bapowa peacopeibiwayo. ³Jesús jeye: —Bara xaniyeya paca tsipaebatsi. Barapo yabũyo powa pecuenta tũpaewatsi piseuri, barapowa peacopeibiwayo. Daichitha barapowa jeca ainya paratiyobe Nacom nexa. Bapowa cata beyacaincha ichamonae daxita pomonae nawita jeya xua Nacom nexa. ⁴Daxita barapomonae jeya pocotsiwa tanacopabeibatsi. Ichitha nama bapowa bichocono peantobexae Nacom daxota omeicha jeca po paratiyobe bequein canantawenona xua pexaewa tsane, bequein bichocono peacopeibiwayo, jei Jesús pijimonaetha.

**Meje yabara poxonae Jesús yabara paeba xua ichamonae
abe exanaena Nacom pin pia bo tatsi**

(Mt 24.1-2; Mr 13.1-2)

⁵Ichamonae yabara natsipaeba nawita Nacom pin pia bo tatsi. Barapomonae najei: “iMaise Nacom pin pia bo tatsi bepa wūnae! iMaise bepa wūnae xua jiwi tutu pepena peitūpanaewan barapo Nacom pin pia botha xua Nacom nexa!” jei barapomonae. Nexata Jesús jeye:

⁶—Matacabi jopaena po mataqueitha tsane ichamonae pomonae penanapaincha jinompaewi pomonae xua icha nacua werena peponaewi abe exanaena Nacom pin pia bo tatsi, xuaunxuae pataneme po bo. Jopa cae ibotiyo nacopatuncuae tsane icha iboto peumatha, daxita abe tsane, jei Jesús.

**Meje yabara poxonae Jesús yabara paeba xua copiya matha pewūnaeya
exanaena petsita itūtsi coyenewa poxonae daxita weraweracaenaba**

(Mt 24.3-28; Mr 13.3-23)

⁷Nexata jiwi Jesús yainyabatsi, jeye:

—Pon jiwi pata Pecuidubim, ¿eta poxonae metha ichamonae baxua exanaena poxonae abe cana exanaena Nacom pin pia bo tatsi? ¿Eta pocotsiwa tsane xua pewūnaeya tsita itapeinya xeinaena po coyene xua poxonae imoxoyo daxita weraweracaenaba? jei Jesús pijimonae tatsi.

⁸Jesús jume barai: “Dota pam bū ichamonae naerabiya paca muxu tsipaeba xua daxota abe paexanaetsipame. Tsipei tsane patsina ayei bicheito jiwi pomonae natsicotaena icha be xan ichin. Barapomonae jei tsane: ‘Apara xan, Mesías’, jei tsane. Ichun jei tsane: ‘Anoxuae Mesías patopaena’, jei tsane. Ichitha paxam jopa payabara jume cowūntsinde pocotsiwa xua barapomonae paeba. ⁹Pajume taename xua jiwi juinya nabenoutsina xote, yawa xua juinya irurū nabenoutsina icha ira beya. Daichitha jopa pajunuwinde, tsipei baxua pewūnaeya matha copiya tsane. Daichitha cataunxuae dapo matacabi aichica tsane xua poxonae daxita weraweracaenaba yatsicaewa”, jei Jesús.

¹⁰Queicha Jesús namchi: “Cae nacuapiwi irū icha nacuapiwino barapo ainya nacuapiwibe nabenoutsina. Matautano irū pon nacua peewatsin irū ichundū pon icha nacua peewatsin baponbe irū nantiya nabenabe. ¹¹Matautano ainya nacuantha ira jijiyatsina. Matautano ainya nacuantha jainbo nacua tsane, tsipei pin mayayo tsane. Matautano domae tsurucuae tsane ainya nacuantha. Matautano Nacom peitabocotha peitūpanaewan itūtsina, xua jiwi bichocono cunuwa.

¹²“Poxonae baxua pewūnaeya tsane jiwi paca teiquebina, paca atene exanaena. Judiomonae pia penacaetutsi botha paca caponaena painya paca yabara paebinexa painya nenatsicuentisiwa xua abe

painya neexanaexae. Yawa paca caponaena jiwi pecubi botha. Paca caponaenano nacua peewatsiwi peitabaratha tatsi, painya tana nejume cowuntsixaemxae. Yawano paca caponaena pentacaponae wi peitabaratha tatsi, pomonae iru itoroba jiwitha xua pon nacua peewatsin nexa painya tana nejume cowuntsixaemxae. ¹³Barapoxonae paca cui itacupaena xua barapomonaetha tapana neyabara paebiwam pocotsiwa bayatha paca tsita exanatsi. ¹⁴Pananta xeinare painya juntu coyenetha, pana najande: ‘Jopa tsiwanaya yabara nacui wunaetsi tsainchi xua ichamonae watsipaebiwatsi xua abe wanaca yabara paebiwa’, pana najande. ¹⁵Tsipei xan paca tsimuxu dutinchi po jume xua pacaunutsiname, xua po jumetha beta paca yaputane exanaena. Barapo jume pacata exanatsi xua painya paca necaitafaetabi jiwi jopa paca jume matanonopentsi tsane, xuano xua jopa peitacupaenexa tsainchi xua abe painya nepaca yabara paebiwa. ¹⁶Paca caenaetsina ichamonae icha jiwitha pomonaetha pomonae jiwi pecanamataxeinaewi. Iru painya axeiwi yawa painya ena jiwi paca caenaetsina ichamonaetha. Iru painya eweicho jiwi paca caenaetsina ichamonaetha. Iru painya amoyo jiwi paca caenaetsina ichamonaetha. Iru painya jiwimonae paca caenaetsina ichamonaetha. Barichi ichamonae pomonae paxam jiwana pam jutebinchi. ¹⁷Daxita nacuanpiwi paca casebina, painya tana nejume cowuntsixaemxae. ¹⁸Ichitha Nacom paca capanenebiyaena painya nejuntu coyenein panenebiyaenexa. ¹⁹Awiya paantuyapusuya nejume cowuntsiya jinompare poxonae bequein ichamonae abe pacata exana xua beya payacuiya werapaeya othopaename xua painya xeinaewa tsane peajuntuyapusuwa po peajuntuyapusuwa ataya tsiteca.

²⁰“Poxonae pataename xua soldadomonaetha xua icha nacuanpiwi yacaincha matawacaicha yatoxoroto naexanaxubina Jerusalén tomara bapoxonae payaputaename xua barapo tomara bara imoxoyo abe exanaeinchi. ²¹Barapo mataqueitha, daxita pomonae Judea nacuaetha jinompa barapomonaetha bewa demxuwan berucupiyaena. Iru pomonae Jerusalén tomarapiwi, barapomonaetha bewa bara berucupiyaena. Iru pomonae pabitha jinompa, barapomonaetha jopa bewa ducupaetsipae tomara beya. ²²Tsipei barapo matakabintha Nacom cui itorobina, ichamonae cui itorobinchi, xua jiwi peraxa exanaeinchi, icha be po coyeneya Nacom Pejume Diwesitha yabara paeba baxua. ²³iPai yabuxi tsobenae powaxi pexui bupana taenatsi barapo matakabitha! iPai powaxi iru pexui isaina, barapowaxi tsobenaeru! Tsipei acabe tsobenae tsane pexui. Matautano Nacom cui itorobina barapo nacuathe, ichamonae cui itorobinchi xua barapo nacuathepiwi pin peperaxa jubiwatsi tsainchi. ²⁴Ichamonae cusitha jutebinchi. Ichamonae yamaxu cubiya caponaeinchi icha nacuan beya. Barapo Jerusalén tomaratha pomonae penanapaincha jinompaewi xua icha nacua werena peponaewi dubenanaebiyaena beya

barapo matabi yacobe cui othopaena, po matabitha xua Nacom cobe matawentsina xua equeicha jopa enae tsane barapo tomaratha barapomona”, jei Jesús.

**Meje yabara poxonae Jesús nayabara paeba xua poxonae
equeicha patopaetsica ponxae Nacom pia Peitapetsin
(Mt 24.29-35, 42-44; Mr 13.24-37)**

²⁵Equeicha Jesús jeye: “Bapoxonae xometotha naitatsina peitapanaewa, yawa jomocoichatotha, yawa opiteitontha. Barapo irathe daxita nacuanpiwi yabara najuntũ coyene cabenaoutsina. Matautano busi taena pin maratsacan busi xua busi jopa xainya mene ducuaeyo. Bichocono jiwi najuinyacaena. ²⁶Jiwi pijunuwi muxu pewerapae tsane poxonae nanta xeinaena po coyene Nacom exanaena barapo cae pin nacuathe. Matauta junuwina xua exanaena itabocotha poxonae Nacom napuna torobabiyaena xua xuan itabocotha dubena. Bapoxonae jopa xapaïn dubenayaeyo tsane. ²⁷Bapoxonae jiwi netaena ponxaein Nacom Tananeitapetsin xua tsaquinaebowatha patopeicaein. Nacom pia peayapusawa itorobi coyenewatha, matautano bichocono pexeinya itupanae coichatha yawa patopeicaein. ²⁸Poxonae baxuan juntucuru exanaenaba, panantusubarucupare, athabe panecotumeinyama, tsipei bara imoxoyo paca necapanenebiwa tsane”, jei Jesús.

²⁹⁻³⁰Nexata Jesús pijimona tsipaeba pecayabara juta pepaebi diwesiyo xua higuera nae, jeye: “Pataema nae po nae pewun higuera nae, xuano ichacuiha icha naeinno xua pataneme xua pena noxu xuxuwa pona. Nexata bapoxonae payaputaema xua imoxoyo wei tsurucuae tsoponae. ³¹Nexata barapocotsi juta coyeneya icha tsane xuaunxuae paca tsipaebatsi xua poxonae jiwi muxu pijunuwi pewerapae tsane. Bapoxonae payaputaename xua bara imoxoyo tsane poxonae xua tapatopae wuna tsane poxonae jiwi itorobiya ewatsin.

³²“Bara xaniyeya paca tsipaebatsi daxita judiomona naitapataya naexanaponaena beya yacui othopaena poxonae Nacom exanaena daxita baxuan pocotsiwa xuaunxuae paca tsipaebatsi. Bapoxonae barapo judiomona weraweracaena. ³³Peitaboco aichurucuae tsane, matauta ira aichurucuae tsane. Meisa nama tajumein ataya tsitecaena xua daxota daxita nayabara jume wetsina be pocotsi coyeneya bayatha paeban.

³⁴“Dota pam, pana neyabara cananta xeinaeya jinompare. Painya xoba pana najuntũ coyene ararana exaname xua pana nasi cui matacaetame yabuxitha xuano xua pana nacupa exaname peatsaxae meratha, yawano xua saya i pananta xeiname xua panantawenoname xua saya paxam nexa. Bapoxonae barapo matabi xain jopa paca benaecae tsane poxonae jopaena. ³⁵Tsipei barapo matabi jemeicha jopaena, icha be pocotsi juta coyeneya ichi poxonae duwein jemeicha autabatsi mayatha. Barapo matabi jopaena daxita barapo

cae pin nacuathe yajiji canaꝑaxuinchí. ³⁶Tsaca pajinompeibare xua tapatopae wꝓnae tsane. Matowa patsipaeba dubenanaebiyama Nacom. Patsipaebelibare xua Nacom paca capanenebiya exanaena baxua weya xua poxonae Nacom cana exanaena ichamonaetha xuaunxuae paca tsipaebatsi. Barichi patsipaebelibareno xua painya nepaca itacꝑaewa tsane xua painya neumenaewa taitabaratha ponxaein Nacom Tananeitapetsin”, jei Jesús pijimonaetha.

³⁷Daxita matabi Jesús cuidubeiba jiji Nacom pin pia botha Jerusalén tomaratha. Merawitha tsaibi demxuwa beya poneiba xua baxotiya peecaenexa tsaibi tsane, po demxuwa pewꝓn Olivos. ³⁸Daxita matabi jiji caemꝓbotha tsaibi pateiba Nacom pin pia botha xua Jesús pejume taenexa tsaibi tsainchi.

**Meje yabara poxonae fariseomonae irꝓ sacerdotemonae
pia pentacaponae tati daxita barapomonae Jesús yabara nanta
xeinatsi po coyeneya xua Jesús pewaetabiwa tsainchi
(Mt 26.1-5, 14-16; Mr 14.1-2, 10-11; Jn 11.45-53)**

22 ¹Bara nama imoxoyo matabi jopi po matabitha xua jiji nacaetuta pexaenexa pan xua jopi cotowiyo. Barapo matabi pewꝓn Pascua matabi wꝓn. Barapo Pascua matabi wꝓntha jiji yabara nanta xeina po matabi poxonae caena bayatha matha judiomonaegipto nacua weya panenebiya. ²Sacerdotemonae pia pentacaponae tati, irꝓ pomonaegiji pecuidubiwi Moisés pia peitorobi coyene tati, daxita barapomonae nabarꝓ muxu jei xua bepa pinae eta bichi tsane poxonae Jesús waetabinchi pebexubinexatsi. Cataunxuae jopi exanaeyo, canta jiji cunuwatsi.

³Bapon Judas caein jiwana pomonaegode poyobe pomonaeg Jesús pijimonaeg tati. Judas icha wꝓn xeina, po wꝓn “Iscariote”, baraichi. Nexata bapoxonae Satanás caurimonae pia pentacoponaeg tati, Judas imoxoyo peinya caquita uncuatabatsi peitorobinexatsi xua abe peexanaewa tsane. ⁴Judas siwa pona sacerdotemonae pia pentacoponaeg tati, irꝓ policiamonaeg xua pebarꝓ cueicueijeinexa tsane. Barapomonae policiamonaeg pentacoponaeg, xua pomonaeg peyabara umenaeg Nacom pin pia bo tati. Daxita barapomonaetha Judas tsipaeba xua pocotsi coyeneya poxonae Jesús caenaetinchi barapomonaetha. ⁵Barapomonae bichocono ichichiparꝓꝑa baxua. Yawa barapomonae Judas muxu tsipaebatsi xua paratixi catsibapaebatsi. ⁶Judas bara yabara jejei xua barapomonae paeba. Bapoxonae Judas tamropata pitaba xua jeita xua po coyenetha Jesús pecaenaetaxubiwa tsainchi barapomonaetha poxonae peyapu xanepanaewatha poxonae jiwaibi tsꝓꝓꝑaeg.

**Meje yabara poxonae Jesús pijimonaeg barꝓ nabane Pascua wꝓn
matabitha
(Mt 26.17-29; Mr 14.12-25; Jn 13.21-30; 1 Co 11.23-26)**

⁷Nama matabi jopaba po matabitha poxonae jiji tsinacaetutsina xua penabanaenexa pan po pan jopi muxuna pentsiyo lewadura matawꝓn

pocotsiwa xua cotowa exana pan. Barapo penantacarucuae maticabitha ba corderoxi pebtoxi xua oveja coxi jutebatsi xua jiwi pexaenexa. ⁸Pedro iru Juan itorobatsibe, Jesús itoroba. Jesús barai, jeye:

—Paponarebe panacui wunaerebe pexaewa Pascua wun maticabi nexa waxaenexa tsainchi, jei Jesús.

⁹Baponbe, Pedro iru Juan, Jesús yainyabatsibe. Jeibe:

—¿Exota ichichipame xua xota pexaewa paca tsiwunaetsinchi wanabanaenexa tsane xua Pascua wun maticabi nexa? jei barapomonae.

¹⁰Jesús jume nota. Jeye:

—Poxonae tomaratha papatopaenamebe, pataenamebe pebin. Barapo pebin juruwatotha yantana ponaena mera. Bapon papuna ponarebe bo beya ichaxota bapon joniyaena. ¹¹Pon bo pexeinaein pabarande: ‘Pon jiwi Pecuidubin cabarai: ¿Incane tutura, po tututha tajiwiwimonae baru xaein Pascua wun maticabi nexa? jeye Pecuidubin’, pajandebe, jei Jesús.

¹²Equeicha Jesús jeye:

—Bapoxonae pon bo pexeinaein paca tsita ita cayopichinabe po tutu pin tutu. Barapo tutu, po tutu xua asiyeicha, barapo tutu bayatha xaneba. Barapo tututha pexaewa panacui wunaetajebare xua wanabanaenexa pexaewa barapo Pascua wun maticabi nexa, jei Jesús.

¹³Barapoyobe ponabe, penamchixae daxita tanebe be pocotsi coyeneya Jesús bayatha paeba. Bapoxonae pexaewa nacui wunaetajebabe Pascua wun maticabi nexa xua penabanaenexa.

¹⁴Poxonae barapo hora tsuxubi poxonae quirei tsanaicha, Jesús baru ecoundeca pexaethopaewatha pijimonae pomonae doce poyobe pomonae pia peitorobiwixae tatsi Jesús. ¹⁵Nexata Jesús barai, jeye:

—Maisa bichocono juntu coyene weiweinan xua tapaca cabaru nacaetutswatsi, yawa tapaca cabaru nabanaewatsi barapo Pascua wun nabanae maticabithe, xua baxua matha pewunaeye tsane xua poxonae tatupaewa tsane. ¹⁶Daxota paca tsipaebatsi xua equeicha jopa tapaca baru nacaetutswatsi tsainchi xua wanabanaewa tsane Pascua wun maticabitha. Equeicha exanaeinchi barapo penabanaewa po mataqueitha poxonae Nacom neexanaena xua jiwi itorobiya ewatsin, jei Jesús.

¹⁷Nexata Jesús pecobetha pita corotiyo, Nacomtha tsipaeba, jeye:

—Axa, maisa juntu coyene weiweinan xua corotiyotha ecareca pepa uva mera xua pata tanecatsiwam, jei.

Yawa barai pijimonae, jeye:

—Barapo corotiye pana nacobe wenonotaponde tamropata tsiwixi pa-aapaponde. ¹⁸Daxota paca tsipaebatsi barapo uva mera jopa equeicha paca baru apae tsainchi anoxuae. Meisa abu bexa tsane pena coyenewatha paca baru apaeinchi barapo uva mera poxonae Nacom neexanaena xua jiwi itorobiya ewatsin, jei Jesús.

¹⁹Jesús pecobetha pita pan, Nacomtha tsipaeba, jeye:

—Axa, maisa jũntũ coyene weiweinan xua pan pata tanecatsiwam, jei. Bapoxonae Jesús pecobetha epa janaca pan, yawa catsiba pijimonae. Pijimonae barai, jeye:

—Paxaema po pan epa janacan. Barapo pan apara neyabara caunuta tapepon xua poxonae tapaca tsitũpaewatsi tsainchi. Baxua paexaneibare bapocotsiwa xuaunxuae pan paca barũ xainchi. Barapo coyene paexaneibare painya tana neyabara jũntanaineibinexa tsaibi tsane, jei Jesús.

²⁰Poxonae Jesusbarũ najain weta, barapoxonae Jesús yabara paeba corotiyo, icha ichi xua yabara paeba pan. Jesús jeye:

—Nacom exana pena pecapanenebiyae coyene jiwi nexa. Barapo pecaapaewiyotha uva mera paapame, xuaunxuae paapame, apara natsicotane be tajana xua tatũpaein jana jopeicaein. Barapo pejanatha paca jũntũ coyene cui capanepaeinchi abe painya neexanae cuiuru coyenein weya. ²¹Pebin taxantha necacuita namaxũ yũtabota pexaethopaewatha, barapo pebin necaenaetsina ichamonaetha xua tanebexubinexa tsane ichamonae. ²²Xan ponxaein Nacom Tananeitapetsin bewa tũpaein, tsipei Nacom Pejume Diwesitha baxua neyabara paeba caena bayatha. Ichitha pebin tsocuae pon necaenaetaxubina ichamonaetha, jei Jesús.

²³Nexata barapomonae caemonae nantiya nayainyaba, jeye: “¿Jintam metha caenaetatsi Jesús?” najei barapomonae.

Meje yabara poxonae Jesús pijimonae tatsi, yabara najume matsontsonoba xua barapoyobe caein ainya cui jiwana exanaeinchi pon xua barapo doce poyobe jiwana

²⁴Pirapaeyo Jesús pijimonae tatsi najume matsontsonoba xua barapoyobe caein ainya cui jiwana exanaeinchi pon xua barapo doce poyobe jiwana.

²⁵Nexata Jesús jume barai: “Pomonae jopa judiomonae naexanaeyo, barapomonae ba nantauta piamonae pomonae nacia peewatsiwi. Barapomonae pomonae jiwi itorobiya pia pepa peewatsiwichi barompaya piamonaexae jopa juniya itorobeibiyo. Barapomonae pomonae jiwi itorobiya pia pepa peewatsiwichi baxua exana, xua daxita jiwi pia jeichi: ‘Maisa barapomonae pomonae jiwi itorobiya pia pepa peewatsiwichi wũnae nacata exana xua naca itoroba’, pia jeichi jiwi. ²⁶Ichitha paxam jopa bewa paraichim tsane xua aebiya painya neitorobiwa tsane. Jame, icha cui bewa paxeinare. Pon ainya cui peexanaeinchi paxamtha xua beyacaincha ichamonae bapon bewa naexanaena be pon pecui pawĩ. Pon xua jiwi itorobeiba, bapon bewa naexanaena be pon amanaya tanacuita ichũn nexa. ²⁷Iruũ ainya pebinbe. Ichũn pexaethopaewatha ecoundeca. Ichũn pexaewa apata. Pon ecoundeca apatatsi. ¿Jintamda pon ainya cui peexanaeinchira xua beyacaincha ichũn? Pon xua jiwi apata pexaewa

bapon jopa ainya cui peexanaeinchi. Jame pon pententa apatinchi bapon jame pon peainya cui peexanaeinchi, xua beyacaincha ichun. Nama painya xantha ecan, xua tacoya nacana exanan be pon xua pexaewa jiji taapatsin, pocotsin jopa ainya cuiyiyo.

²⁸“Paxam barapomonaē pam, pomonaē meisa pana nebaru jinompeibame poxonaē bequein ichamonaē inta abe exana. ²⁹Daxota paca catatsi taitorobi coyenewan icha Taxa Nacom neichi xua necata barapo peitorobi coyenewan. ³⁰Barapo peitorobi coyenewan paca catatsi, painya nenabarū nabanaenexa taitorobeibi nacuatheica. Paenaename pexeinya peitapanāe enaewantha, painya neyabara paebinexa tsane pomonaē doce po bicheito cuntiyobe, pomonaē Israel pia pemomoxi susato jiwimonaē tatsi xua penatsicuentsiwa abe pia peexanaexae”, jei Jesús.

Meje yabara poxonaē Jesús namchi xua pinaē Pedro Jesús yabara jei tsainchi: “Jopa dapon yaitaeinyo”, pinaē yabara jei tsainchi Jesús (Mt 26.31-35; Mr 14.27-31; Jn 13.36-38)

³¹Equeicha Jesús jeye:

—Simón jan, caurimonaē pia pentacaponaein tatsi, bapon Satanás newuca: ‘Jinyamonaepin necare’, nejei. Bapon ichichipa xua abe cata exanaena xua taneitawetsinexam tsane. Icha jiji ichi xua pebena daunweya yasisita pexubinexa pesiberapewa. Barichi caurimonaē pia pentacaponaein tatsi ichichipa cajuntū coyene itorobina xua taneitawetsinexam tsane. ³²Ichitha xan Taxa beicha cata tsipaebatsi xua jopa tana neyabara junteinaenexam tsane xua tana nejume cowuntsiwam. Ichitha Satanás cacana exanaena xua tana nejumefebiwam saya bara caeto tsane. Bapoxonaē equeicha caewa nejume cowuntsiname. Poxonaē equeicha caewa nejume cowuntsiname, nexata ichamonaē pomonaē tana nejume cowuntsiwi barapomonaē yawenaename xua ajuntuyapusuya tana nejume cowuntsiwa tsane, jei Jesús.

³³Simón Jesús jume notatsi, jeye:

—Tanecanamataxeinaem, maisa be cabaru poponaeinchi. Bara bequein ichamonaē cacaponaena jiji pecubi botha ichitha awiya capuna tūpaeinchi. Matauta bequein tūpaename ichitha awiya capuna tūpaeinchi, jei Simón Pedro.

³⁴Jesús jume nota, jeye:

—Pedro, catsipaebatsi bexa necaunutsiname acoibi po jume cuiyobe neyabara jam tsane: ‘Dapon jopa yaitaeinyo’, neyabara jam tsane. Barapoxonaē irū tsane wacara pebto fibina, jei Jesús.

Meje yabara poxonaē bara nama barapo matacabi tsane po matacabitha Jesús waetabatsi

³⁵Nexata Jesús pijimonaē yainyaba, jeye:

—Poxonae bayatha paca itorobatsi paca jeichi: ‘Jopa paratixi doro pacaponaeinde, jopa cote pacaponaeinde, jopa panataxu xatabinde xua penataxu xatabiwa’, jan. ¿Eta xoyo pacata seica xua xoyo pacobena poname? jei Jesús.

Barapomonae Jesús jume notatsi, jeye:

—Ajibi, bara paxeinan pocotsiwa panantawenonan, jei.

³⁶Nexata Jesús jume nota. Barapomonae jume notatsi. Namchi:

—Anoxuae paca tsipaebatsi xua icha cui coyeneya. Pon cote xeina, moya bewa caponae. Pon xeina paratixi doro, moya bewa caponae. Pon peaitiyu camisa xeina, bapon bewa caenaetsina barapo camisa, barapo paratixitha bewa comotsina cusi. ³⁷Poxoru paca tsipaebatsi caena bayatha Nacom Pejume Diwesitha neyabara paeba, jeye: ‘Bapon cayabara cananta xeinaeinchi jei tsane bapon jiwana caein pomonae peabewi’, jei Nacom Pejume Diwesitha xua pinae jiwi jei tsane. Jiwi nantawenona xua baxua neyabara caunutsina xua Nacom peneyabara jumichixae baxuan pejume diwesitha, jei Jesús.

³⁸Barapomonae Jesús jume notatsi. Jeye:

—Patatanecanamataxeinaem, xote bayatha paxeinan ainya watobe cusi, jei.

Jesús jume nota, jeye:

—Bara, bare, jei Jesús.

Meje yabara poxonae Jesús Paxa tsipaeba ichaxota

tsica iriyo po iriyo pewun Getsemani

(Mt 26.36-46; Mr 14.32-42)

³⁹Nexata Jesús tomara weya pona. Bapon pona demxuwa beya po demxuwa pewun demxu Olivowa, olivo naein peumenaexae baxota poxoru pia cui xua poneiba baxota petsipaebebinexa Paxa. Jesús pijimonae puna poinchi. ⁴⁰Poxonae barapo demxuwatha patopa, Jesús pijimonae barai:

—Nacom patsipaebare xua jopa abe painya neexanaewa tsane xua caurimonae paca itoroba.

⁴¹Nexata Jesús pijimonae tsiwiyo wepu natsixitaba. Saya jopa tajuyo. Be poxonae pebin ibotiyo xoya xua be pocotsiwatha naruntabiya jopeica. Jesús pentabocototha ecoundeca. Paxa tsipaeba. ⁴²Jesús namchi: “Axa, icha ichichipame xua tana neyawenaewam, inta pire xua ajuntucoyenerewe neexana. Ichitha jopa neexanaeinde be pocotsi coyeneya ichichipan. Saya jame necana exande be pocotsi coyeneya ichichipame”, jei Jesús.

⁴³Bapoxonae Jesús tsita naitutatsi matatsunpin pon itaboco wetsica pona. Barapo matatsunpin Jesús antusuya cana exanatsi poxonae yawenatsi. ⁴⁴Bichocono Jesús ajuntutane tsipei Paxa copatatsi xua jiwi

petsitupaewa tsainchi. Paxa beya bichocono matowa jume daunweya tsipaeba. Yawano bichocono najaneta. Barapo penajanetsiwa poxonae iratha othopeica be pejana othothepeica.

⁴⁵Poxonae najume wetaba xuano xua asiya uncuano bapoxonae pijimonaе beya pona. Jesús tane pijimonaе xua tamaitumeinchi. Barapomonaе maita tsipei juntu cuerona xua wecoyei, xua Jesús yaitama petupapaebixae. ⁴⁶Nexata Jesús pijimonaе barai, jeye:

—¿Eta xua metha pamaitame? Panonobaponde Nacom patsipaebare xua jopa abe painya neexanaenexa tsane pocotsiwa caurimonaе paca itoroba, jei Jesús.

Meje yabara poxonaе Jesús waetabatsi
(Mt 26.47-56; Mr 14.43-50; Jn 18.2-11)

⁴⁷Cataunxuae abu Jesús pijimonaе tsipaebuncua poxonaeru jiwi pin bicheito pata. Caein Jesús pijimonaе tatsi jiwana, pon pewun Judas, pomonaе xua doce poyobexae, bapon pin bicheito matabapona. Judas Jesús imoxoyo caquita uncuatabatsi xua Jesús petsutsubinexa tsainchi.

⁴⁸Nexata Judas baraichi, Jesús barai, jeye:

—Xan ponxaein Nacom Tananeitapetsin, iJudas, jamaisa netsutsubame, apara metha jinya necaenaetichi ichamonaetha! jei Jesús.

⁴⁹Pomonaе Jesús pijimonaе tatsi caquita umeinchi, poxonaе barapomonaе baxua tane xua Judas Jesús tsutsubatsi xua pecaenaetsinexatsi ichamonaetha, bapoxonaе barapomonaе Jesús baraichi:

—Pata Tanecanamataxeinaem, ¿barapomonaе cusitha paucuboban? jei Jesús pijimonaе tatsi.

⁵⁰Jesús pijimonaе tatsi jiwana caein, bapon muxuyoro catsoniba, pon sacerdotemonaе pia pepa pentacaponaein tatsi tanacuitatsi bapon muxuyoro catsonibatsi po muxuyoroto pecoxa werucuiya. ⁵¹Ichitha Jesús barai bapon jeye:

—Bara, bara, jei Jesús.

Pon muxuyoro catsonibatsi Jesús muxuyoro jayaba pecobetha. Bapoxonaе bapon equeicha muxuyoro ducuanaya. ⁵²Jesús tsipaeba, sacerdotemonaе pia pentacaponaewi tatsi tsipaebatsi. Yawano tsipaebano pomonaetha pomonaе penapataewi. Barichi tsipaebano pomonaetha pomonaе Nacom pin pia bo peyapu enaewi. Daxita barapomonaetha Jesús cueicueije, pomonaе ichichipa xua Jesús pewaetabiwatsi. Jesús jeye:

—iPacapatame cusin yawa iwabi, icha paichim poxonaе pacana exaname pontha pon jiwi pecaibin! ⁵³Poxonaе daxita matabi Nacom pin pia botha paca baru poponeibatsi, jopa pana newaetabim. Ichitha anoxuae barapo matabi tsuxubi nama po matabitha Nacom paca

yabara cui copata xua painya neexanaewa tsane pocotsiwa paca necaitorobixae cauri, bapon Satanás pon peyaitaquireya jinaein.

Meje yabara poxonae Pedro Jesús yabara paebatsi xua jeye:

“Jopa dapon yaitaeinyo”, yabara jeichichi Jesús

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴Nexata daxita barapomonae Jesús teicatsi. Yawano capoinchino sacerdotemonae pia pepa pentacaponaein tatsi pia bo beya tatsi. Pedro, Jesús tsiwiyo tajũ pu taetae tsiniyatsi. ⁵⁵Baraxotiya sacerdotemonae pia pentacaponaein tatsi pia botha tatsi bara po botha aisowa beya panatha tututha isoto itutaeta. Soldadomonae barapomonae nayatoxoroto exanaxubiya ena isototha. Baraxota irũ Pedro naeca. ⁵⁶Yabũyo powa sacerdotemonae pia pepa pentacaponaein tatsi tanacuitatsi, poxonae Pedro tainchi barapowa, xua irũ naeca baxota isototha barapowa Pedro caununaya baraichichi, jeichichi:

—Bapon irũ apara bayatha Jesús puna poponeibatsi, jei.

⁵⁷Ichitha Pedro jume matawenta, jei:

—iPetsiriwa, barapo pebin jopa yaitaeinyo! jei Pedro.

⁵⁸Bapoxonae pirapaeyo irũ ichũndũ pebin patopa. Bapon Pedro irũ tainchi xua irũ naeca baxota. Pedro baraichi bapon, jeye:

—Xam apara irũ Jesús pijimonae tatsi jiwanam, jei.

Ichitha Pedro jume barai, jeye:

—iPebin, jopa dapomonae jiwanyo apara! jei Pedro.

⁵⁹Poxonae cae hora yapucaewa, irũrũ ichũn Pedro matowa baraichichi:

—Bapon apara napuna poneiba Jesús, tsipei bapon Galilea nacuapindũ, jei.

⁶⁰Ichitha Pedro jume barai, jeye:

—iPebin, daumetha jopa taeinyo xua paebame! jei Pedro.

Poxonae Pedro cataunxuae baxua cueicueijeji, bapoxonae caena nainya wacara pebto caein fiba. ⁶¹Nexata Jesús napatomeicha necota, Pedro necoyatsi. Nexata Pedro nanta xeinataba xua bayatha Jesús Pedro tsipaebatsi, poxonae jeye: “Xam barapo merawithe, pewũnaeya poxonae wacara pebto fibina xam copiya acoibi po jume cuiyobetha neyabara jam tsane: ‘Jopa dapon yaitaeinyo’, neyabara jam tsane. Barapoxonae irũ nainya wacara pebto fibina”, jeichi Pedro xua Jesús paeba. ⁶²Nexata Pedro pesato bejoniya. Bichocono wecoyei, peajũntũtanexae xua Jesús yabara paebatsi.

Meje yabara poxonae Jesús cui caponatsi

(Mt 26.67-68; Mr 14.65)

⁶³Pomonae Jesús yapucaumeinchi, daxita barapomonae Jesús cui caponatsi, yawa butsinõ. ⁶⁴Jesús itacuere cutatsi, paparuwatha yawa itabara cuaintatsino. Barapomonae Jesús baraichi:

—Incane pana netsipaebare, ¿jintam caitabara tsaquibobara xua bequein paca itabara cutatsi? jei.

⁶⁵Daxita barapomonae Jesús tsumu jume baru paebatsi ainya jumeintha.

Meje yabara poxonae Jesús capoinchi judiomonae pia pecanamata caitorobi jiwi bicheito tatsi pia peitabaratha tatsi
(Mt 26.59-66; Mr 14.55-64; Jn 18.19-24)

⁶⁶Poxonae pentha tsina nabaru nacaetuta penapataewi judiomonae, iru sacerdotemonae pia pentacaponae tatsi, iruru pomonae jiwi pecuidubiwi Moisés pia peitorobi coyene tatsi. Daxita barapomonae Jesús capoinchi pecanamata caitorobi bicheito itabaratha tatsi xua peyainyabinexatsi, jeichi:

⁶⁷—Incane pana netsipaebare, ¿Xam Mesías, pon Nacom necaitorobin? jei.

Jesús jume epa pita jeye:

—Icha: ‘Aa’, paca jei tsipaetsi, apara jopa pana nejume cowuntsitsipaem.

⁶⁸Icha paca yainyabichipatsi tayainyabiwan apara jopa pana nejume notsipaem. ⁶⁹Ichitha ponxaein Nacom Tananeitapetsin ecaein Nacom pia pecoxa weya tatsi, po Nacom peyapusu itorobi coyenewa pexeinaein, jei Jesús.

⁷⁰Bapoxonae daxita barapomonae Jesús baraichi:

—¿Nexata metha xam Nacom Pexanto tatsim? jei.

Jesús jume epa pita jeye:

—Aa, barichi xuaunxuae papaebame painya coutha, jei.

⁷¹Nexata barapomonae caemonae natsipaeba najei:

—Anoxuae jopa nantawenonaetsi xua ichamonae Jesús peyabara pebiwatsi. Tsipei anoxuae nama yatsicaewa jume tainchi, xua bapon pia coutha nayabara paeba, jei barapomonae.

Meje yabara poxonae Jesús uncuca Pilato peitabaratha tatsi
(Mt 27.1-2, 11-14; Mr 15.1-5; Jn 18.28-38)

23 ¹Nexata daxita penayatoxoroto exanaxubiya enae jiwi barapomonae asiya umenarucupa, Jesús teicatsi yawa capoinchi Pilato peitabaratha tatsi. Pilato bapon pon Judea nacuapiwi peyanacua ewatsinchi. ²Baxota daxita barapomonae Jesús cui yopitatsi xua abe exana, jeye:

—Barapo pebin patan xua wajiwimonae jume cui tsacabatsi xua anaepana cana exanatsi. Yawano pajume tanno pocotsiwa jopa bewa pinae paratixi matoma catsi pontha pon romanomonae itorobiya pia pepa peewatsinchi. Matauta bapon nayabara paeba: ‘Xan apara Mesías pon jiwi itorobiya pepa Taewatsin’, jei, jei barapomonae.

³Nexata Pilato Jesús yainyabatsi, jeye:

—¿Xam judiomonae itorobiya pia pepa Neewatsin? jei.

Jesús jume nota namchi, jeye:

—Xuaunxuae paebame bara baxua apara, jei Jesús.

⁴Nexata Pilato barai sacerdotemonae pia pentacaponae tatsi yawa baraino jiwi, jeye:

—Jopa jume itaraerowinyo bapon xua po jumetha penayaita anae exanaewa, xua pebexubinexatsi barapo pebin, jei.

⁵Ichitha barapomonae jume daunweya cueicueijei, jeye:

—Jiwi jopa juniya jume cui tsacabichi xua anaepana exanatsi pia pecuidubiwantha, daxita Judea nacuatha. Baxua Galilea nacuatha tamropata pitaba, equeicha aunxuae waxainya becu joparene, jei.

Meje yabara poxonae Jesús uncua Herodes peitabaratha tatsi

⁶Poxonae Pilato baxua jume taeba barapo bicheito baraichi, jeye:

—¿Jesús bara Galilea nacuapin? jei Pilato barapo bicheitho.

⁷Barapo bicheito namchi, jeye:

—Aa, bapon Galilea nacuapin, jei barapomonae.

Bapoxonae Pilato itoroba, Jesús itorobatsi, Herodes peitabaratha beya.

Bapon Herodes pon Galilea nacuapiwi peyanacua ewatsinchi. Herodes siwa poneiba Jerusalén tomara. ⁸Poxonae Jesús taebatsi Herodes,

bapon bichocono jantũ coyene weiweinanareca, tsipei bayatha Herodes cuinaya betaena. Herodes saya jume taiba xua Jesús yopiteibatsi.

Herodes ichichipa tane xua Jesús petsita itatsi coyenewa exanaena.

⁹Herodes Jesús matowa yainyabatsi. Ichitha Jesús jopa jume notsiyo.

¹⁰Baraxota irũ ena sacerdotemonae pia pentacaponae tatsi. Irũ

baxota ena pomonae jiwi pecuidubiwi Moisés pia peitorobi coyenewa

tatsi. Daxita barapomonae Jesús bichocono abe yabara paebatsi

Herodes pia xantha tatsi. ¹¹Nexata Herodes yawano pia soldadomonae

tatsino daxita barapomonae Jesús tsumũ jume barũ paebatsi. Jesús cui

caponatsi, pexeinya paparuwa juma xatatatsi pocotsi paparuwan nama

xataba pomonae peyanacua ewatsi jiwi. Equeicha Jesús itorobatsi Pilato

peitabaratha beya, Herodes bara beitorobiya. ¹²Barapo matabitha

Herodes irũno Pilato naitacoxonabe. Baponbe caena bayatha saya penaita

aenae-aenei jitonbe.

Meje yabara poxonae Pilato jume barũ jejei xua

Jesús bara pebexubiwa tsainchi ichamonae

(Mt 27.15-26; Mr 15.6-15; Jn 18.39-19.16)

¹³Sacerdotemonae pia pentacaponae tatsi irũ judiomonae pia pentacaponae, irũ daxita jiwi, daxita barapo bicheito Pilato waba xua barapo bicheito penacuetutsinexa. ¹⁴Pilato barai barapo bicheito, jeye:

—Paxam barapo pebin pacaponame taxantha. Pajam: ‘Barapo pebin daxita jiwi jume cui tsacabatsi xua anaepana exanatsi’, pajam. Bayatha bequein baxua barapo pebin yabara yainyaban painya itabaratha pocotsiwa bayatha payabara paebame taxantha, ichitha jopa jume itaraerowinyo bapon, xua po jumetha penayaita anae exanaewa xua yabara pana netsipaebame. ¹⁵Icha ichin xua jopa jume itaraerowinyo Herodes barichi. Daxota equeicha Jesús caibe itorobarenatsi waxainya berena. Yaitama Jesús jopa abe exanaeyo, daxota jopa bewa bexubi. ¹⁶Tha cueintichi bapon. Tha bapoxonae pu copatichi, jei Pilato.

¹⁷Poxonae Pascua matakabintha ichun ba bewa isanaxubichi. Pilato barapo Pascua matakabintha nantawenona xua isanaxubina caein pon jiwi pecubi botha pecaein, pon xua jiwi ichichipa, xua bapon peisanaxubinexa tsainchi.

¹⁸Bapoxonae daxita jiwi jume daunweya wawai, jeye:

—iSoldadomonae itorobare xua bapon pebexubinexatsi! iBarrabás painta pu sotabare! jei.

¹⁹Barrabás jiwi pecubi botha etatsi, tsipei caena bayatha matacapona ichamonae xua barapo tomarapiwi najume tsacaba cana exanatsi xuano xua jiwi jutebatsi. ²⁰Pilato ichichipa xua Jesús pu copatatsi. Daxota equeicha barapo bicheito tsipaebatsi xua Jesús yabara paebatsi. ²¹Ichitha equeicha barapo bicheito jume daunweya wawai Pilatotha, jeye:

—iBewa maisa naetotha tɔparucua exanaem! iBewa maisa naetotha tɔparucua exanaem! jei.

²²Equeicha Pilato tsipaeba barapo bicheito, jeye:

—¿Eta pocotsiwa xua metha jane xua abe exana? Xan jopa jume itaraerowinyo bapon xua po jumetha penayaita anae exanaewa xua pebexubinexatsi bapon. Tha cueintichi, tha bapoxonae pu copatabichi, jei.

²³Barapo bicheito jopa juniya wawayo xua naetotha tɔparucua peexanaenexatsi Jesús. Iruru sacerdotemonae pia pentacaponae wi tatsi jume daunweya wawairu, beya capanepa po coyene ichichipa pecana exanaewa. ²⁴Daxota Pilato namchi: “Moya paexande be pocotsi coyeneya paichichipame”, jei Pilato. ²⁵Nexata Pilato nama pu sotaba pon jiwi pecubi botha pecaein, pon jiwi ichichipa xua bapon peisanaxubiwa tsainchi. Bapon pewun Barrabás, pon waetabatsi poxonae jiwi najume tsacaba xuano poxonae jiwi jutebatsi. Bapoxonae Jesús copatatsi, Pilato copata, xua Jesús bara pebexubinexatsi judiomonae pejumeyainwa tatsi.

Meje yabara poxonae Jesús tɔparucua exanatsi naetotha

(Mt 27.32-44; Mr 15.21-32; Jn 19.17-27)

²⁶Poxonae Jesús cataunxuae caenapoinchi tɔpa peexanadutsinexatsi naetotha, pebin waetabatsi, soldadomonae waetaba. Bapon pewun Simón,

Cirene tomarapin. Bapon wexua werena pona. Bapon peutucuratha tabotsicatsi naeto, xua pecaponaenexa Jesús peputha tatsi.

²⁷Jesús peputha tapoinchi pin bicheito, iru ainya yabuxino Jesús peputha tapoinchi. Daxita barapowaxi nantanuweya siwa namtsebiya wecoyeichi Jesús. ²⁸Ichitha Jesús necotabiya barai barapowaxi, jeye:

—Yabuxi Jerusalén tomarapiwaxi pam, jopa pana nesiwa namtsebiya wecoyande. Jame maisa painya coutha pana nasiwa wecoyande, painya pexuino pasiwa wecoyande. ²⁹Tsipei matabin othopaena po matabintha jiwi atene tsane. Barapo matabintha, jiwi jei tsane: ‘Juntú coyene weiweina po yabuxi jopa pexui xeinaeyo. Juntú coyene weiweina po yabuxi jopa bapana butixitha taenaetsi pexui. Juntú coyene weiweina po yabuxi bapana pexui jopa isainae’, jei tsane jiwi barapo matabintha. ³⁰Yawano jiwi namchi tsane: ‘Maisa xanepana xua wawerapaewa xua wanaca canbabiwa demxuwán, yawano tsorobon naca matatsun wetoxebabina xua jopa wanaca itutsiwa tsane’, jei tsane jiwi barapo matabintha. ³¹Xan wunae exanan dacotsiwa jiwi jopa juniya neperaxa exanaeyo. Ichitha pomonae abe peexanaewi nama jopa juniya bichocono peraxa exanaetsi beyacaincha xua neperaxa exana, jei Jesús.

³²Cataunxuae Jesús ecapona. Iruru ponbe abe matowa peexanaeinbe, baponbe Jesús peputha tacapoinchibe, xua baponbe iru pebexubinexa tsainchibe poxonae Jesús bexotsi. ³³Daxita jiwi Jesús baru patatsi ichaxota po uruto be jiton matasipa piwa. Po uruto wun caunuteiba xua jei tsaibi: “La Calavera”, jei. Barapo uruto matasoitha Jesús teparucua exanatsi naetha. Iruru ponbe jiwi pecaibinbe teparucua exanatsibe naetha ichaxota imoxoyo Jesús ducua. Ichun Jesús petsocona wetauncuiyatsi, iru ichun pecoxa wetauncuarenatsi. ³⁴Poxonae Jesús naetha ducua, Jesús jeye:

—Axa yabara cui juntemainare po coyene barapomonae necana exana, tsipei barapomonae jopa yaputaeyo xua necana exana, jei Jesús.

Soldadomonae nata tsaba Jesús pia paparuwan tatsi. Bapomonae ibotixi bebeya penacueranta notsinexa Jesús pia paparuwan tatsi. Pon beta xoya ibotiyo bapon copiya pita Jesús pia paparuwan tatsi. ³⁵Baraxota Jesús taumeinchi jiwi. Ichitha nama pentacaponae Jesús cui caponatsi, barapomonae jeye:

—Bapon cain capanepeibabei ichamonae, came jopa nacapanepaeyo. Icha bara bapon Mesías, pon Nacom pia peitapetsin, bu bara bapon pia coutha nacapanepa naeto wetsica, jei barapomonae.

³⁶Soldadomonae iru Jesús cui capoinchi, imoxoyo caquita umenapoinchino. Barapo soldadomonae Jesús apatatsi po mera pewun vino, po mera mene atsu. ³⁷Barapo soldadomonae Jesús baraichi, jeye:

—Icha xaniwaicha judiomonae itorobiya pia pepa Neewatsim, moya jinya coutha nacapanepare! iNaeto wetsica ecoinca! jei soldadomonae.

³⁸Jesús pentutu wetsica tadutatsi napaewa xua barapo napaewatha tina. Barapo petinadutsiwa jeye: “Baponje apara judiomonae itorobiya pia pepa peewatsinchi”, jei barapo petinadutsiwa.

³⁹Ponbe Jesús pecuariya tacobe matatabarutatsibe, ponbe matowa abe peexanaeinbe, baponbe caein ichun, bapon Jesús biatainchi petupaeyainwa naetotha. Bapon namchi:

—Icha xaniwaicha xam Mesías, ponxaem Nacom caitapeta, moya jinya coutha nacapanepare! iYawano pana necapaneparebe! jei bapon.

⁴⁰Pon icha naetotha ducua, bapon jume matawenta, pon Jesús casebatsi, bapon jume matawentatsi. Pon icha naetotha ducua namchi, jeye:

—¿Xam jopa cuitaya junuwim Nacom? Aparauxuae tupaechibe ichaunxae Jesús ichi tsane. ⁴¹Waxainchibe jopa juniya naca peraxa jubiyobe abe waexanaexaebe, apara bara xainwaicha xua nacata exana tsipei bayatha apara abe exanatsibe. Ichitha nama ponje jopa apara abe exanaeyo, jei.

⁴²Nexata pon baxua penamchixae, bapon Jesús baraichi, jei:

—Jesús, neyabara cananta xeinare xua tana neyawenaenexam po matabitha poxonae patopeicaename xua jiwi neitorobinexam tsane, jei bapon.

⁴³Jesús jume nota, jeye:

—Xaniwaicha bara catsipaebatsi, anoxuae tsane cabarun ecaeinchi ichaxota jiwi juntu coyene weiweinathopeiba, peitupanae nacuatheicha, jei Jesús.

Meje yabara poxonae Jesús tupa

(Mt 27.45-56; Mr 15.33-41; Jn 19.28-30)

⁴⁴Poxonae Jesús cataunxae ducua naetotha, bapoxonae daxita nacuantha bichocono aitaquiri xua poxonae mateinyaxae weya, beya yatabopiya. Tres po horabe quirei tsuncuae. ⁴⁵Poxonae cataunxae xometo jopa penthiyo, bapoxonae paparuwa, po paparuwa Nacom pin pia botha ducua, barapo paparuwa nainya bopiya matonta tsitsiqueica.

⁴⁶Nexata Jesús jume daunweya wawai, jeye:

—Axa, nejumope pire, po jumope tana necatsixaemxae, jei Jesús.

Poxonae Jesús baxua caunuta, bapoxonae Jesús tupaicha.

⁴⁷Soldadomonae pia pentacaponaein tatsi Roma nacupin, poxonae bapon baxua taeba, bapoxonae Nacom wunae jaintatsi, jeye:

—Jaina, apara baraponje jopa abe exanaeyo, itara ichamonae yopita xua abe exana, jei bapon.

⁴⁸Daxita pomonae xua baxua taeumena baxota, barapomonae pia bo benawibiya. Poxonae namtotha enapona, daxita barapomonae nantacari cuainbopenapona poxoru bichocono ajuntucoyenetane xua Jesús

pewisiwatsi. ⁴⁹Ichitha pomonae Jesús peyaitae jiwi, iru yabuxino, powaxi Jesús puna dendenatsi Galilea nacua werena, daxita barapomonae Jesús tajũ wetaeumeinyatsi poxonae ichamonae Jesús bexotsi.

Meje yabara poxonae Jesús petupaein ibo muthutha yauxatatabotatsi
(Mt 27.57-61; Mr 15.42-47; Jn 19.38-42)

⁵⁰Iruru pebin popona, bapon pewun José, Arimatea tomarapin. Arimatea tomara eca Judea nacuatha. Bapon pentacui xanepanaein. Yawano beta pepoponaein Nacom peitutha tatsi. José, bapon jiwana caein pomonae judiomonae pia pecanamata caitorobi bicheito tatsi. ⁵¹Barapon José yabara jume cowuntsiya wuna ewateiba po coyenewa xua poxonae Mesías patopaetsica pon jiwi itorobiya peewatsinexatsi. Poxonae pomonae pecanamata caitorobi bicheito exana poxonae Jesús bexotsi, baxua José jopa peburuya nacayabara nanta xeinaeyo. ⁵²José Pilato siwa poinchi. Pilato wucatsi Jesús petupaein, José wuca. ⁵³José naeto wepichica Jesús petupaein. Bapoxonae José mata quiyontabareca barapo pexeinya paparuwatha. Bapoxonae José ibo muthu iya boya, po muthu jiwi muthu tofobobapona. Barapo muthutha cataunxuae petupaein ichun jopa boyaetsi. ⁵⁴José baxua exana po mataqueitha pewun penacui xaxainchi matakabi poxonae judiomonae ba weta daxita xua penacuitsiwa pewnaeya poxonae jopaena pentaquei seicae matakabi. Barapo pentaquei seicae matakabi imoxoyo jopaena.

⁵⁵Powaxi Jesús puna dendenatsi Galilea nacua werena, barapowaxi pona muthutha, petanexa xua Jesús muthutha xotsi. ⁵⁶Poxonae barapowaxi bo benawibiya, bapoxonae nacui wnaetajeba petuxueiwan yawa penasiwanno, xua Jesús petupaein tsixaxaintajebatsi.

Meje yabara poxonae Jesús equeicha asu juina
exanatsi petupae cuiru coyene weya
(Mt 28.1-10; Mr 16.1-8; Jn 20.1-10)

24 ¹Barapowaxi botha cuicuina peseicae matakabitha, Moisés pia peitorobi coyeneya pepaebixae, barapo matakabi yabara.

Poxonae judiomonae pia pentaquei seicae matakabi tatsi yapu caewaba bapoxonae patopa matakabi po matakabi xua copiya ducua cae semanatha. Barapo matakabitha poxonae aena pentha tsina, yabuxi pona muthu beya ichaxota Jesús boca. Barapowaxi capona petuxueiwan yawa penasiwanno xua bayatha xaxaintajeba. Barapowaxi cueyabatsi icha yabuxi. ²Poxonae barapowaxi barapo muthu beya pata, barapowaxi taerucupa xua po ibo panawatha yauxatatababota xua pin ibo panawa barapo ibo muthu bayatha cou yaupataxubabota. ³Barapowaxi joniya muthiya ichitha barapowaxi jopa taeyo xua Jesús pon Pecanamataxeinaein petupaein pebocuaewa. ⁴Barapowaxi yabara

najüntü coyene cabenaeca. Jopa yaputaeyo xua exana tsipei jopa taeyo xua Jesús petüpaein boca. Barapowaxi tsita naitütatsi nacueyatabe pebinbe ponbe xua asiya uncuabe, xuano xua yawa paparuwa nama xatatabe, po paparuwa bichocono daedaena. ⁵Barapowaxi bichocono junuwa, pijunuwi irabe necobareca. Barapo pebinbe barapowaxi baraichi, jeibe:

—¿Eta xua metha petüpaie cuiru coyenewatha panecobompame pon equeicha asü barapo petüpaie cuiru coyene weya? ⁶Xote jopa bocaeyo bapon. Bayatha bapon asü petüpaie cuiru coyene weya. Payabara jume nanta xeinare xua bayatha bapon paca tsipaeba poxonae cataunxuae Galilea nacuaatha popona. ⁷Paca jeye: ‘Xan ponxaein Nacom Tananeitapetsin, bewa necaenaetsina pomonaetha pomonae abe peexanaewi. Barapo abe peexanaewi naetotha tüparucua neexanadutsina. Ichitha equeicha po matabi acoibibetha asün juina neexanaena petüpaie cuiru coyene weya’, paca jei Jesús, jei barapo pebinbe xua barapowaxi tsipaebatsi.

⁸Nexata barapowaxi baxua jume cui yabara nanta xeinarüçüpa xua bayatha barapowaxi tsipaebatsi, xua Jesús tsipaeba. ⁹Poxonae barapowaxi müthü wenawibiya tomara beya, barapowaxi daxita paeba pocotsiwa tane. Jesús pia peitorobiwi tatsi pomonae xua once poyobe barapomonae tsipaebatsi, ichamonaeno tsipaebatsino, pomonae Jesús jume cowüntatsi. ¹⁰Powaxi yopita, xua powaxi Jesús pia peitorobiwi tsipaebatsi, ichowayo pewün María Magdalena powa Magdala tomarapiwayo, irü ichowayo Juana, ichowayo María, Santiago pena tatsi, yawanorü ichowaxino powaxi saya napona. ¹¹Ichitha Jesús pia peitorobiwi tatsi nanta xeina xua barapowaxi jopa xainyeyo, yawano jopa jume cowüntsichi barapowaxi.

¹²Bapoxonae Pedro müthü becuinaepoinya. Müthü tututha tane xua meisa paparuwa boca. Bapon pia bo benawiya. Bapon baxua yabara nanta xeina nawita.

**Meje yabara poxonae Jesús pebinbe tsita naitüta
namtotha poxonae Emaús tomara beya ponabe
(Mr 16.12-13)**

¹³Barapo matabitha Jesús pijimonae tatsi jiwanae namtotha ecaponabe, siwa ponabe tomara, po tomara pewün Emaús. Barapo tomara eca once po kilómetrobe xua Jerusalén tomara weya.

¹⁴Baraponbe yabara natsipaebecaponabe namtotha xua mexuaetha exana.

¹⁵Poxonae cataunxuae yabara natsipaebecaponabe yawa yabara najume matsontsonobecaponabe, bapoxonae Jesús imoxoyo caquita uncuatabe yawa naponano. ¹⁶Bequein baraponbe Jesús tainchi, ichitha baponbe jopa ita cui canaüpaetsibe xua Jesús peyaitaewatsi. ¹⁷Nexata Jesús yainyaba, baponbe baraichibe, jeye:

—¿Eta xua namtotha yabara pana natsipaebecaponamebe? jei Jesús.

Baponbe juntu wecoyeya naruntababe peyabara natsipaebecaponaexaebe xua mexuaetha exana. ¹⁸Ponbe penacueyatsixaebe caein pewun Cleofas. Bapon Cleofas Jesús jume notatsi, jeye:

—Daxita pomonae jinompa Jerusalén tomaratha, daxita barapomonae yaputane xua exana barapo maticabintha. ¿Meisa xam compam jopa yaputaem xua mexuaetha exana? jei.

¹⁹Nexata Jesús baraibe baponbe, jei:

—¿Eta xua exanara barapo tomaratha? jei.

Baraponbe jume notabe, jeibe:

—Apara pana natsipaebecaponanbe xua jiwi exana, pajan: ‘Xua po coyeneya Jesús Nazaret tomarapin cana exanatsi’, pajan. ‘Pon Nacom peitorobi jume papaebin, pon peitupanae petsita itutsi coyenein exana Nacom pia peayapusu itorobi coyeneya tatsi’, pajan. ‘Pon xanepanaya pecueicueijein Nacom peitutha tatsi, xuano xua jiwi peitutha tatsi’, pajan.

²⁰Sacerdotemonae pata tanecanamataxeinaewi iru pata pecanamata caitorobiwi piraichi Jesús cobe waetabatsi pia Pilato peitorobinexa soldadomonae xua Jesús teparucua peexanaenexa tsainchi naetha.

²¹Bequein pawunaewatan xua Jesús patopa xua peyawenaenexa tsane Israel nacuapiwi xua barapo Israel nacuapiwi panenebiya peexanaenexatsi, ichitha bapon jopa capanenebiyaeyo barapomonae. Yawano acoibi po maticabibe pu caewa poxonae Jesús bexotsi. ²²Yabuxi, powaxi xua paxan jiwana pan, barapowaxi pona muthu beya poxonae aena pentha tsina. Pona ichaxota Jesús boca. Barapowaxi pana tsipaeba xua tane. Daxua pana nenabenaeca exana bichocono. ²³Barapowaxi pinae jopa taeyo Jesús petupaen. Bapoxonae pana netsipaeba xua pinae barapowaxi tsita naitutatsi matatsunpiwi. Pinae matatsunpiwi namchi: ‘Bayatha Jesús asu’, jei pinae. ²⁴Bapoxonae pata jiwimonae, barapomonae jiwana muthu beya pona. Barapomonae bara tane baxua, xua yabuxi yopita. Ichitha Jesús petupaen jopa taetsi, jeibe xua Jesús tsipaebatsi.

²⁵Nexata Jesús jume nota baraponbe, jeye:

—Paxam pomonae jopa peyaputae jiwi pam, xuano xua bewayo pajume cocowuntaponame pocotsiwa bayatha Nacom peitorobi jume pepaebiwi paeba. ²⁶Paxam payaputaneme xua Mesías pon Nacom itapeta, copiya bewa peraxa exanaeinchi. Nacom cana exanaena xua bapon patopaena Nacom pia peitorobi nacua beicha xua pexeinaenexa tsane Nacom pia peayapusu itorobi coyenewa tatsi, jei Jesús.

²⁷Nexata Jesús tsipaeba baraponbe xua daxita i dapo diborontha Jesús yabara paebatsi Nacom Pejume Diwesitha. Copiya matha Jesús yaputane exana po diwesin xua Moisés tina xua Jesús yabara paebatsi. Bapoxonae equeicha Jesús yaputane exana xua po diwesi Nacom peitorobi jume pepaebiwi tina, xua Jesús yabara paebatsi.

²⁸Jesús, iru barapo pebinbe imoxoyo pata tomaratha, po tomara siwa ponaena. Barapo pebinbe naruntababe, ichitha Jesús mexeya maisa pona namto tomara weya. ²⁹Ichitha baponbe Jesús jume daunweya baraichi, jeye:

—Pana nebaru ecare, apara bayatha tabopiya tsanaicha, quirei tsanaicha apara, jeibe.

Daxota Jesús puna joniya ichaxota baraponbe patopabe xua barponbe pebaru ecaenexa tsainchibe. ³⁰Nexata poxonae Jesús baru eca pexaethopaewatha baponbe, bapoxonae Jesús wecobe pita pan. Paxa barai: “Axa, maisa juntu coyene weiweinan xua pata tana necatsiwam barapo pan”, jei. Bapoxonae Jesús epa janaxuba pan. Baponbe catatsibe. ³¹Poxonae Jesús baxua exana, caena bapoxonae baponbe Jesús yaitainchi. Baponbe yaitaebabe. Bapoxonae Jesús yacuinaya jemeicha aichurucuae tsanaya. ³²Baponbe natsipaebabe, najeibe:

—Maisa juntu coyene weiweinsibe poxonae namtotha naca tsipaebecaponabe. Bapon naca yaputane exanabe xua bapon peyabara paebiwatsi Nacom Pejume Diwesitha, jei baponbe.

³³Bapoxonae caena yacuinaya caibe iyabe Jerusalén tomara beya. Baraxotiya Jerusalén tomaratha baponbe caxinabe penacaetutsi jiwi pomonae once poyobe pomonae Jesús pia peitorobiwi tatsi. Iruru nanacaetuta pomonae cueyaba xua pomonae once poyobe pia pecueyabiwichi. ³⁴Barapo penacaetutsi jiwi namchi baponbetha, jeye:

—Apara xainyei. Bara Jesús pon Pecanamataxeinaein, asu. Apara bapon Jesús Simón tsita naitutatsi, jei barapo penacaetutsimonae.

³⁵Nexata baponbe daxita yabara paebabe barapo penacaetutsi jiwitha xua baponbe namtotha cuidubecapoinchibe. Matauta paebabeno xua baponbe matapainya yaitaebabe xua Jesús yaitaebatsi poxonae Jesús pan epa janaxuba, xuano xua poxonae catatsibeno pan.

Meje yabara poxonae Jesús tsita naituta pijimonae Jerusalén tomaratha
(*Mt 28.16-20; Mr 16.14-18; Jn 20.19-23*)

³⁶Poxonae cataunxuae tsipaebabe barapo diwesi, bapoxonae Jesús jemeicha tsita naituta barapomonae peitabaratha. Jesús jacobá barapomonae, jeye:

—Barabu Nacom junte ma jinompa paca cana exana, jei Jesús barapo penacaetutsimonaetha.

³⁷Barapomonae bichocono nabenaeca, yawa bichocono cuitaya junuwa. Barapomonae nanta xeina xua metha Jesús perowatsi tainchi. ³⁸Ichitha Jesús barai barapo penacaetutsimonae, jeye:

—¿Eta xua metha junuwiya pana nabenaecame? ¿Eta xua metha ainya unthuton pam? ³⁹Pana necobe taema, yawa pana netaxu taema. Apara bara xan tsocuaein. Pana nejayabare, yawa pana neyaputaema xua xan

pepa jiton. Dowatsi bapana jopa wi ducuae, yawa bapana jopa piwa ducuae. Ichitha aunxuae nama yatsicaewa xaniwaicha pana netaneme xua xan pepa jiton icha paxam paichim, jei Jesús.

⁴⁰Poxonae baxua Jesús najume weta, nacobe wan itúba, yawa nataxu wan itúba. ⁴¹Ichitha came awiya barapomonae jopa jume cowuntsiyo poxoru barapo diwesi barapomonae tsita jume xeicatsi yawa barapo diwesi yabara najuntú coyene cabenaeca exanatsi. Jesús jeye:

—¿Paxam xote penabanaewiyo paxeiname? jei Jesús.

⁴²Nexata barapomonae Jesús catatsi duweiyo, poyo seba. ⁴³Jesús wecobe pita, yawa xane barapomonae peitútha tatsi. ⁴⁴Bapoxonae Jesús namchi barapomonaetha:

—Caena bayatha paca tsipaebatsi poxonae cataunxuae paca barú ecatsi. Paca jeichiche: ‘Daxita po coyenein neyabara tina, daxita baxuan peneyabara jeixae, bewa necana exanaena. Daxita xua Moisés po diwesintha neyabara tina, bewa necana exanaena. Daxita pocotsiwa Nacom peitorobi jume pepaebiwi neyabara tina, bewa necana exanaena. Daxita xua salmos penaxúnae weixi diwesintha neyabara tina, bewa necana exanaena’, paca jeichiche, jei Jesús.

⁴⁵Jesús barapomonae yaputane exana xua Nacom Pejume Diwesi paeba. ⁴⁶Jesús barai barapomonae, jeye:

—Nacom Pejume Diwesitha neyabara jei: ‘Mesías bewa túpaena, yawa equeicha asú tsane po matabi acoibibe petúpae coyene cuiru weya.

⁴⁷Yawano bewa barapomonae Mesías pia pejume cowunchiwichi bewa tsipaebina daxita nacuantha Nacom Pejume Diwesi tatsi Mesías pia peayapusú itorobi coyenyatha tatsi. Copiya petamropata notsinexa Jerusalén tomara weya. Barapomonae jei tsane jiwitha: Bewa icha jüntú coyene Nacom patsita xeinaem xua bapoxonae Nacom painya nepaca cayabara jüntemainaewa tsane abe painya neexanae cuiru coyenewa, jei tsane barapomonae’, jei Nacom Pejume Diwesitha, jei Jesús. ⁴⁸Equeicha Jesús barai pijimonae, jeye:

—Paxam daxita jiwi patsipaebiname daxita xua pataneme. ⁴⁹Matauta pataemano xua pacata itorobicaeinchi Nacom pia Pejumope túnaxú tatsi xua bayatha Taxa yabara paca tsiwúnae muxu duta. Barapo Nacom pia Pejumope túnaxú tatsi yawa patopaena peayapusú itorobi coyenewa. Paenare xote Jerusalén tomaratha, beya poxonae barapon yawa pacata patopaena pia peayapusú itorobi coyenewa Nacom pia nacua tatsi wetsica, jei Jesús.

Meje yabara poxonae Jesús athabe juinya
Nacom pia peitorobi nacua beicha tatsi
(Mr 16.19-20)

⁵⁰Nexata Jesús pijimonae barú pona Jerusalén tomara weya, Betania tomara bebarú iya. Jesús namaxú yoicha itaboco beicha

yawa tsipaeba Nacomtha xua pijimonae tatsi nexa, xua pijimonae petayawenaenexatsi. ⁵¹Poxonae cataunxuae Jesús tsipaebuncua Nacom xua pijimonae tatsi nexa, bapoxonae Jesús athabe juinya exanatsi peitaboco beicha, Nacom exana. ⁵²Poxonae Jesús pijimonae tatsi baxua tane, bapoxonae barapomonae Jesús pecoutha tatsi namchi: “Maisa Wanacanamataxeinaein wunaé”, jei. Barapomonae Jerusalén tomara beya juntu coyene weiweinaya caibe nawibiya. ⁵³Barapomonae Jesús pia peitorobi jiwi tatsi Nacom pin pia botha, baxota Nacom jopa juniya wunaé jainteibichi.

Baja Lucas.